


ساتو سورت

دالم

الكتاب



คัมภีร์ ซามูเอล ฉบับที่หนึ่ง

หนังสือเล่มที่เก้าใน
พระคัมภีร์ภาคแรก

كتاب 1 سموئيل

سورت یغ کسمیلن دالم
الكتاب سوچی بهاکین یغ فرتام

بالیق درفد بهاس اصل
معناش دغن بهاس لغة

ตุ ป.ณ. 229 หลักสี่ กรุงเทพฯ 10210

- 2543 -

هوراين چارا حال سورت 1 سموئيل

سجاره نبي داؤد راج يځ ترمشهور ايت. اد تولىس ده دالم كتاب سموئيل، هق اورغ بياس بهاگي جادي دوا بواه سورت نام 1 سموئيل دغن 2 سموئيل يائيت سورت يځ كسمبيلن (9) دغن يځ كسقولوه (10) دالم الكتاب. الكتاب ايت ترماسوق تورات، زبور، كتاب نبي ۲ دولو دغن انجيل.

بيلا نبي موسى ماتي ده توهن سوروه اورغ نام يشوا باوا فواق دي «بني اسرائيل» ايت، بري ماسوق دالم نكري كنعان، هق توهن جنجي ده نق بري كا نبي ابراهيم دغن كتورونن دي. فواق ايت كنا دوق سوچي انتوق توهن، تا بري بوات هق معصية سروف بغسا ۲ لائين هق تا فرچاي كا توهن. (سودارا ۲ بوليه باچ سجاره ايت دالم كتاب يشوا)

تافي اورغ اسرائيل كهور ۲ تيغكل جالن هق توهن لتق انتوق دي. سروف ايات هق كات: «تيف ۲ اورغ دوق بوات هق مان دي سنديري كات موليق». لفس ايت لبه كورغ 130 تاهون، توهن فيليه سئورغ نام سموئيل انتوق جادي نبي دغن فمريته اتس بني اسرائيل، نق باوا فواق ايت بري تورت سوروهن توهن سمولا.

سورت 1 سموئيل اين رويت چارا حال ماس دي. ديهاله هق كنا لتق راج انتوق اورغ اسرائيل، مولا ۲ راج ساول، لفس ايت نبي داؤد. تنتو سودارا ۲ نق باچ قيصة نبي داؤد، هق اد دالم سورت اين.

ڪتاب 1 سموئيل

سورت يڄ ڪسمبيلن (9)
دالم الڪتاب بهاڪين يڄ فرتام

باب 1

ايلڪانه باو^۱ ڪلوارڪ دي ڪي ڪا شيلوه

1 اد سئورغ فواق ايفرائيم، نام دي ايلڪانه، هق ماري
دڪمفوغ رامه، دڪليواسن بوكيت هق جادي ميلي فواق
ايفرائيم. ايلڪانه اين جادي انق جروهه، تو دي نام ايليهو
انق توهو، هق جادي فواق زوف، سفواق بسر دالم فواق
اورغ ايفرائيم ايت. ² دي اد بيني دوا اورغ، نام حنه دغن
فنيه. فس فنيه بوليه انق باق اورغ، تافي حنه مندول.

3 ڪنف^۲ تاهون، ايلڪانه برجالن ڪي ڪا شيلوه، نق سمبه
ڪا توهن يڄ مهاڪواس دغن بوات قربان ڪا دي، ڪران امام^۲
هق ڪرج ڪا توهن دوق اد ده دشلوه، نام دي هوفني دغن
فينيهس، انق هق امام نام عيلي. ⁴ ڪنف^۲ ڪالي ايلڪانه بوات
قربان ايت، دي بهاڪي داڪيغ ڪا فنيه دغن انق^۲ دي جنتن
بتينا سڪيان سئورغ. ⁵ تافي ڪا حنه دي بري داڪيغ دوا ڪالي
ڪندا ڪران ڪاسيه ڪا دي سوغڪوه، تاڪيرا ڪات انق حنه
تاء، توهن بري مندول. ⁶ تافي بيني مودا جادي سترو
دغن حنه، دوق ڪيچيق حال اين سعمور نق بري دي ساڪيت
هاتي.

7 جادي سروف ايت ڪنف^۲ تاهون. افيل حنه ڪي ڪا
رومه توهن نق بوات قربان، بيني مودا دوق ڪيچيق هودوه
بري حنه ترياق مناغيس تائسير ماڪن اف سڪارا.

8 فس لاڪي دي ايلڪانه دوق تاڻ دي سعمور کات: اوه حنه،
 باءِ اف مو دوق ترياق مناغيس تائسیر ماکن اف؟ مو تائسه
 دوق سوسه هاتيله. تائچوکوف انتوق مو که، هق اڪو دوق
 کاسيه کا مو اين؟ کاسيه ايت موليق فد انق سفولوه اورغ.

حنه دوق کيچيق دغن امام عيلي

9 فد ساتو تاهون، لفس ماکن جاموان دالم تمفت سوچي
 هق توهن دشيلوه ايت، حنه فون باغون دولو نق کي مينتائ
 دعا دتوهن. تکه ايت امام عيلي دوق مپاتوق اتس کريسي
 دتفي فينتو هق رومه سوچي.¹⁰ فس حنه دوق بردعا دغن
 ترياق مناغيس کران دي براس هنجور دالم هاتي.

11 فس دي بوات فرجنجين دغن توهن، کات: اوه يا
 توهن، توهنله هق دوق مرينته اتس سکل کواس ۲، مينتائله
 توهن امبيق فادول کا اڪو هق جادي همب توهن اين.
 تيغوقله ستارا مان کسوساهن کو، فس ايغثله کا فرمينتائ
 همب اين. کالو توهن بري اڪو بوليه انق جنتن سئورغ،
 اڪو فون منيات نق سره دي بري جادي اورغ ناصريت هق
 کنا دوق سوچي انتوق توهن سعمور، تاليه ماکن هارق اتوا
 اير بواه زبيت هق ماسم، فس تائيه کرت رمبوت اتوا
 چوکور کفلا سکالي فون.

12 حنه دوق کاچغ بردعا بالس ايت لام جوک، فس عيلي
 فرهاتي تيغوق کا مولوت دي دوق برکرق ۲ تائبوي سوارا،
¹³ کران دي دوق بردعا دالم هاتي ساج. امام عيلي کامق
 کات دي مابوق سروف اورغ ماکن اير زبيت هق ماسم.
¹⁴ دي فون کات کا حنه: مو نق دوق مابوق لام مان لاڪي؟
 مو برادوله فد ماکن اير بواه زبيت ماسم سروف اين.

15 تافي حنه جواب کات: يا توان کورو، امب بوکن مابوق کران ماکن ارق اتو ایر زبیت هق ماسم فون، تافي لاني امب براس سوسه هاتي سوغکوه، فس لاني دوق توبیت سموا کسوساهن دالم هاتي بري توهن دغر. ¹⁶ جاغن توان کورو سفک کات امب این اورغ بتینا هق کلاکوان تاءمولیق. امب دوق بردعا لام بالس این کران اد کسوساهن برت ساعث اتس ديري امب.

17 بیلا دغر بالس ایت، عیلي فون اوچف سلامت کا حنه کات: موده ۲هن، توهن هق اورغ اسرائیل نق بري هق میک دوق مینتاء دغن دي. ¹⁸ حنه فون کات: مینتاء له توان کورو تریما امب دغن بائیک سعمور. لفس ایت دي توبیت کي ماکن ناسي دغن هاتي سنغ تاءبراس سوسه ده.

حنه بولیه انق جنتن، نام دي سموئيل

19 دینیهارې ایسوق، حنه باغون کي سکالي دغن سموا اورغ دالم کلوارک ایلکانه ایت، انتوق نق سمبه کا توهن دولو، باروله نق کلیق کا تمفت دي دکمفوغ رامه. فس بیلا سمفي کیلیران ایلکانه کي تیدور دغن حنه، حنه فون لکت فروت سلالو، کران توهن تریما ده دعا دي. ²⁰ بیلا سمفي بولن، حنه فون برانق بولیه انق جنتن، فس لتق نام دي سموئیل، معنائ «هق مینتاء دتوهن»، کران دي کات: اکو مینتاء انق این دغن توهن.

21 فس سمفي ماس هق ایلکانه نق باوا کلوارک دي کي بوات قربان کا توهن ستاهون سکالي دشیلوه، فس نق فلس نیاه هق دي جنجي ده دافن توهن دسیتو. ²² تافي حنه تاءکي. دي کات: ننتي انق کیت لفس فیق دولو،

بارو امب نق کي سره دي کا توهن بري دوق درومه هق توهن ايت سعمور.²³ لاكي دي فون کات: بواتله هق مان مو نمفق کات موليق. ننتيله بري دي لفس فيق دولو، تافي بري جاديله ايكوت هق مان توهن جنجي ايت.

حنه سره انق دي کا توهن

24 افبيل لفس فيق ده، حنه فون کي کا شيلوه، فس دي باوا انق دي سموئيل کي سکالي، نق بري دي دوق درومه توهن ايت سعمور. ولو انق دي کچيک لاكي فون، دي کنا باوا کي، فس دي باوا کي لمبو جنتن عمور تيک تاهون، کندوم دبو سفولوه کيلو دغن اير زيت ماسم هق بوه دالم بکس کوليت کمبيغ.

25 بيلا سوده ده کرج سمبليله لمبو جنتن ايت، دي فون باوا سموئيل کي سره کا امام عيلي.²⁶ فس حنه کات کا امام بالس اين: توان کورو ايغت کا دق، امب اين اورغ بتينا هق بياس کيچيق دغن توان دسيني دولو، تکه امب دوق بردعا مينتا دغن توهن.²⁷ اينيله انق جنتن هق امب مينتا دغن توهن ماس ايت، فس توهن بري ده.²⁸ سبب ايتوله امب نق سره دي کليق کا توهن بري کرج انتوق دي سعمور هيدوف. بيلا سره ده، ايلکانه فون دوق سمبه کا توهن دسيتو.

باب 2

حنه دوق فوجي کا توهن

1 فد ماس ايت جوک، حنه دوق فوجي کا توهن دغن فرکتان اين: توهنله هق بري اکو سوک گمبيرا،

- دياله هق بري اكو قواة سماغت،
لاني اكو بوليه دوق سوک کا سترو ۲ کو،
کران توهن تولوغ اكو بري بوليه دوق دغن سلامت.
- 2 تاءاد نام هق سوچي سروف نام توهن،
تاءاد سیاف هق بوليه بنديغ دغن دي،
دياله توهن کيت هق دوق کجت سعمور،
سروف باتو بسر هق تاءبرکرق.
- 3 فواق مو هق دوق اغکيت ديری دغن کيچيق بسر،
مو برادوله فد کيچيفن ايت، بري دوق سېف،
کران توهن دياله ربي اتس سموا،
هق بوليه تاهو بلاک، فس دياله هق دوق تيمبغ
فربواتن مائسي سموا.
- 4 عسکر ۲ هق کاکه، توهن بوليه بري فاته سنجات ۲ دي،
اورغ ۲ هق لمه، توهن بري بوليه تريما کواس هق دي.
- 5 اورغ هق بوليه ماکن کپغ دولو ۲،
لاني دي کنا سره ديری جادي کولي اورغ،
باروله نق بوليه ماکن سيکيت،
فس اورغ هق بياس دوق لافر دولو، لاني دوق کپغ ده.
اورغ هق اد انق بايق اورغ ده،
انق دي نق تيغکل کي بري دي دوق سئورغ.
اورغ هق بياس دوق مندول،
دي بوليه برانق سمفي توجوه اورغ،
- 6 توهنله هق بوليه بري ماتي،
فس دي بوليه بري هيدوف کليق سمولا.
دي بري اورغ کنا ماسوق دالم قبور،
فس دي بري اورغ بوليه هيدوف کليق.

- 7 توهنله هق بري اورغ جادي مسكين اتوا كاي،
فريغكت رنده اتوا فريغكت تيغكي فون، توهن بري.
- 8 اورغ مسكين هق جادي سمفه دفنداغن اورغ،
توهن بوليه اشكيت بري دوق سڪالي دغن انق راج.
اورغ هق دوق دتمفت هينا فون،
توهن بري نائيڪ كا تمفت هق مليا.
دنيا اين، توهن لتق اتس الاسن هق كوكوه،
فس الاسن ايت فون اصل ماري دتوهن جوڪ.
- 9 توهن دوق جاڪ هيدوفن
اورغ هق طاعة كا دي سعمور، تافي اورغ هاتي جاهت
نق كنا فوتوس كي دوق دالم كلف.
تاءاد سياف بوليه برجاي دغن كواس هق دي سنديري.
- 10 اورغ هق جادي سترو دغن توهن نق كنا بناس،
تڪاهن توهن كا اورغ ايت سروف كوروه دلاغيث.
كران توهن نق كرت سين سموا اتس دنيا،
دي نق بري كواس كا راج هق دي،
راج هق توهن فيليه ايت نق منغ سعمور.
- 11 لفس ايت ايلكانه كليق كا رومه دي درامه، تافي سموئيل
دوق باوه فرينته امام عيلي دسيٽو، انتوق نق جادي اورغ
هق كرج كا توهن.

انق جنتن هق امام عيلي ايت كلاڪوان تاءموليق

- 12-13 امام عيلي اد انق دوا اورغ هق جادي امام جوڪ. دي
اورغ هاتي تاءموليق، هق فندغ هينا كا توهن، فس كرج
جادي امام انتوق اورغ رامي فون، دي تاءڪيرا مستحق.

بيلا اورغ ماري بوات قربان، فس دوق جرغ داکيغ دالم کاوه، کولي هق امام ايت ماري دغن سرافغ مات تيک،¹⁴ تیکم داکيغ هق مان دي نق دالم کاوه ايت انتوق توان دي. دي بوات بالس ايت کا سموا اورغ اسرائيل هق باوا قربان ماري کا شيلوه.

15 لبيه ۲ لاكي، کولي امام ايت تائنتي بري اورغ باکر لمق قربان ايت دولو، ايکوت اتوران هق کنا بوات، تافي دي ماري کات کا اورغ بوات قربان: بريله سلالو، داکيغ منته انتوق تو امام. دي نق فغکغ سنديري، تأسير تريما هق مو ربوس ايت.¹⁶ کالو اورغ ايت کات: ننتيله بري کيت باکر لمق دولو، لفس ايت اميقله هق مان مو نق. کولي فون کات: دق! کنا بري سلالو. کالو تأسير بري، امب نق امبيق جوک.¹⁷ بالس ايتوله، انق ۲ امام عيلي دوا اورغ ايت بوات دوسا بسر دفنداغن توهن دغن بوات هينا کا قربان ۲ هق اورغ سره انتوق توهن.

18 فد ماس ايت، بودق سموئيل دوق کرج انتوق توهن دغن فاكي باجو ايفود هق بوات دغن کائين لينين سروف امام.¹⁹ فس کنف ۲ تاهون، تکه ايلکانه کي بوات قربان دسيتو، امق سموئيل جاهيت باجو کچيک هق بارو، باوا کي کا دي.

20 فس کنف ۲ تاهون امام عيلي دوق اوچف سلامت اتس ايلکانه دغن بيني دي، کات: جاديله توهن بري انق ۲ لائين لاكي کا بيني توان اين، کنتي انق هق دي سره کليق کا توهن. لفس ايت ايلکانه دغن حنه برجالن کليق کا رومه دي.²¹ فس توهن تورون رحمة اتس حنه، بري بوليه انق لاكي، جنتن تيک اورغ، بتينا دوا اورغ. فس انق دي

سموئيل كهوړ ۲ بسر تکه دي دوق کرج انتوق توهن دسیتو.

امام عیلي دغر حال انق دي ایت.

22 عیلي فون كهوړ ۲ توا ده، فس دي دغر خبر، چارا حال

سموا فرکارا هق انق دي دوق بوات کا اورغ اسرائیل،
سمفي کا بودق بتینا هق کرج دهلامن تمفت سوچي ایت،
هق دي امبیق کي تیدور. ²³ عیلي فون کي کات کا انق دي:

23 سبب اف مو دوق بوات فرکارا ۲ ایت؟ اکو دغر

دسموا اورغ، حال کلاکوان جاهت هق مو. ²⁴ هي انق
کو، برادوله. تاءمولیق سوغکوه، خبر هق اکو دغر
سموا اورغ دوق کیچیق لاني.

25 کالو اورغ بوات ساله کا اورغ، توهن نق بري جالن

بولیه جادي بایک سمولا: تافي کالو اورغ بوات ساله
کا توهن، سیاف نق تولوغ دي جادي بایک سمولا؟
تافي انق ۲ عیلي تأسیر دغر کا دي، کران توهن
چادغ ده نق بري انق عیلي ایت ماتي. ²⁶ بودق
سموئيل كهوړ ۲ بسر. توهن برکنن کا دي. سموا
اورغ فون برکنن کا دي جوک.

اورغ ماري مېمفي فرکتان توهن کا عیلي

27 اد سئورغ هق توهن سوروه کي کا تمفت امام عیلي

کات کا دي:

یا عیلي، اینیله فرکتان توهن انتوق مو:

اکو بیاس بري توئ نینیق مو دغن کلوارک دي بولیه
کنل دغن اکو، تکه دي دوق جادي همب فرعون
دنکري مصیر دولو. ²⁸ اکو فیلیه دي دالم سموا فواق

اسرائيل، انتوق نق بوات كرج جادي امام كا اكو. ديهاله هق كنا بوات قربان اتو كي فراسف كمپن دالم تمفت هق سوچي انتوق اكو. ديهاله هق بوليه فاكي باجو ايفود هق امام تكه دوق متهادف اكو. فس اكو بري كا كلوارك تو نينيق مو بوليه تريما دايغ درفد سموا قربان ۲ هق اورغ اسرائيل باوا ماري نق باكر انتوق اكو.

29 سبب اف كلوارك مو دوق طمع، نق بوليه ليه دقربان ۲ هق اكو سوروه ايت. هي عيلي، باءاف مو دوق ائگيت انق ۲ مو ليه فد مو دوق ائگيت اكو؟ باءاف مو بري دي دوق كموق دغن ماكن دايغ ۲ هق موليق دقربان هق اورغ اسرائيل باوا ماري انتوق اكو؟

30 دغرله فركتان ربي اتس سموا، توهن اورغ اسرائيل: دولو اكو جنجي ده كات اورغ دكلوارك مو نق كرج جادي امام كا اكو بوات سلام ۲، سروف اورغ دكلوارك تو نينيق مو دولو. تافي لاني توجوان كو لائن سوغكوه. كران اورغ هق بري حرمة كا اكو، اكو فون نق بري تريما حرمة، تافي اورغ هق دوق هينا كا اكو، اكو فون نق بري دي كنا هينا.

31 دغرله عيلي، تاءلام ده اكو نق بري فوتوس كواس مو دغن كواس كلوارك مو. كلوارك مو فون تاءاد سئورغ هابوق هق بوليه هيدوف سمفي توا. ³² فد ماس كسوساهن ايت، كلوارك مو نق تيغوق دغن هاتي دوق ايغين نق كا كماجوان هق اكو نق بري كا اورغ لائن دنكري اسرائيل، تافي انتوق كلوارك مو، تاءاد

سئورغ هابوق هق بوليه هيدوف سمفي توا. ³³ تافي
بوكن سمو ايت هق كنا ماتي. اكو نق بري اد سئورغ
دالم كلوارك مو هق بوليه دوق كرج جادي امام لاكي.
دي نق دوق دغن اير مات منيله سعمور دغن كران
سوسه هاتي. اورغ ۲ لائين دالم كلوارك مو فون،
سموا ايب نق ماتي كنا بونوه دغن فدغ.

34 انق مو هوفني دغن فينيهس نق ماتي فد هاري هق
تولا، جادي تندا انتوق مو. ³⁵ تافي اكو نق فيليه
سئورغ جادي امام، اورغ هق دوق طاعة ستيا كا اكو.
دي نق بوات ايكوت كهندق كو سعمور، فس اكو نق
بري كلوارك دي دوق كجت سعمور. انق چوچو دي
فون نق كرج جادي امام كا راج هق اكو نق فيليه،
سمفي سلام ۲. ³⁶ اورغ دالم كلوارك مو هق دوق اد
لاكي، نق ماسوق سجود دافن امام ايت، انتوق نق
تريما دويت سده اتوا بوليه روتي سكفيغ. دي نق
مينتا ۲ سوغكوه ۲ بري اد كرج دغن فواق امام، انتوق
نق بوليه ماكن هاري ۲.

باب 3

بودق سموئيل دغر سوارا توهن تغه مالم

1 فد ماس ايت، سموئيل جادي بودق لاكي، فس دي دوق
كرج كا توهن دباوه فرينته امام عيلي. ماس ايت، فركتان
توهن كورغ تورون كا اورغ اسرائيل، فس دالم ميمفي فون
توهن كورغ بري نمفق اف ۲ هق فليق.

2 فد ساتو مالم، عيلي دوق تيدور دتمفت دي. دي توا
ده، مات فون كلابو. ³ فس سموئيل دوق تيدور دالم تمفت

سوچي دکت دغن فتي فرجنجين هق توهن . تکه ايت فليتا
ميپق دالم تمفت سوچي دوق پالا لاکي .⁴ فس توهن فغکيل
کا دي کات: سموئيل، هي سموئيل! سموئيل فون جواب:
يا توان، امب دوق سيني! ⁵ فس دي باغون کي کا تمفت
عيلي، کات: هاو غ ماري ده توان کورو! تافي عيلي کات:
دق، اکو تافغکيل. کيله تيدور دتمفت مو سمولا! دي فون
کي تيدور.

6 فس توهن فغکيل فول کات: سموئيل، هي سموئيل!
دي فون باغون کي کا تمفت عيلي فول، کات: هاو غ ماري
کران توان کورو دوق فغکيل. تافي عيلي کات: دق! اکو
تافغکيل هاو غ سکالي. کيله تيدور دتمفت مو سمولا .⁷
سموئيل تافهاو کات توهن هق فغکيل دي، کران توهن
تافياس تورون فرکتان مان کا دي لاکي.

8 توهن فون فغکيل سموئيل کالي يغ کتيک، سموئيل فون
باغون کي کا تمفت عيلي فول، کات: هاو غ ماري کران
توان کورو دوق فغکيل لاکي! بارو عيلي نمفق کات
توهن له هق فغکيل بودق ايت .⁹ دي فون سوروه سموئيل
کات: کيله تيدور دتمفت مو، فس کالو دغر سوارا فغکيل
فول، هاو غ جوابله: همب توهن اين ننتي نق دغر اف ۲
هق توهن نق رويت! سموئيل فون کي تيدور دتمفت دي
فول.

10 توهن فون ماري کا تمفت سموئيل، فغکيل دي سروف
ايت فول. فس سموئيل جواب کات: همب توهن اين ننتي
نق دغر اف ۲ هق توهن نق رويت. ¹¹ توهن فون رويت
کا دي بالس اين:

فرهاتيله بائيك ۲ فركتان اكو اين. تالام، اكو نق
بوات ساتو فركارا هق بسر دنكري اسرائيل اين سمو
اورغ نق دغر دغن تركجوت. ¹² هاري ايت، اكو نق
بري جادي سمو فركارا هق اكو رويت ده دولو كات
نق جاتوه اتس كلوارك عيلي ايت. هق مان اكو
مولائي بوات، اكو نق بري سلسي ده.

13 فس اكو رويت ده كا عيلي ايت، كات اكو نق جاتوه
حكوم اتس كلوارك دي بوات سلام ۲، كران دي تاهو
ده حال دوسا بسر هق انق دي بوات ايت تركجي
سوځكوه، فس دي لق تالارغ انق دي ايت. ¹⁴ سبب
ايت اكو كرت سين ده كا عيلي، كات ولو دي بوات
قربان بايق مان فون تاءاد جالن كلوارك دي نق لفس
فد حكومن اين.

15 لفس ايت، سموئيل تيدور لاكي سمفي فاكلي، فس دي
كي بوك فينتو ۲ دتمفت سوچي ايت دولو. دي تائبراني
كي رويت كا عيلي فركارا هق توهن بري پات كا دي.
¹⁶ تافي عيلي فځكيل كا سموئيل كات: هي سموئيل، هي انق
اكو. دي فون جواب: امب دوق سيني.

17 فس عيلي تاڻ دي: اف هق توهن بري تاهو كا هاوځ
سمالم؟ رويتله سمو فركارا، جاځن سوسوف اف ۲ كا اكو.
كالو تائرويت، ننني توهن نق حكوم اتس مو! ¹⁸ فس
سموئيل رويت كا دي سمو دغن تائسوسوف اف سكارا.
لفس ايت، عيلي كات: بري جاديله ايكوت كهندق
توهن، كران توهنله ربي اتس سمو.

19 لفس ايت سموئيل كهوړ ۲ بسر، فس توهن دوق سڪالي دغن دي. اف ۲ هق سموئيل رويت كات نق جادي كو دافن جادي سوغكوه تاسيلف سكارا. ²⁰ فس اورغ اسرائيل سموا، امبيق دنكري فواق دان سمفي كا موقيم بيعير شيبا، تاهو ده كات سموئيل جادي نبي هق بوليه هارف. ²¹ لفس ايت توهن دوق برهوبو غ دغن سموئيل لاكي دشيلوه دغن تورون فركتان كا دي. فركتان سموئيل ايت فون توبيت كي سمفي كا سموا اورغ اسرائيل.

باب 4

فتي فرجنجين هق توهن ايت كنا رمفس

1 فد ماس ايت، اورغ فلسطين فاكټ كي نق بوات فرغ دغن اورغ اسرائيل. عسكر ۲ اسرائيل فون توبيت كي نق برلاون دغن دي. خيمه اورغ اسرائيل دوق دتمفت نام عيبنيزر. خيمه اورغ فلسطين فول دوق دتمفت نام افيق. ² اورغ فلسطين هق توبيت كي سرغ دولو، فس دوا فواق ايت دوق برلاون. سود سڪالي اورغ فلسطين منغ. فس اورغ اسرائيل امفت ريبو اورغ ماتي كنا بونوه دفادغ فرغ ايت.

3 بيلا عسكر ۲ اورغ اسرائيل كليق كا خيمه، كتوا ۲ دي تا: سبب اف توهن بري كيت هاله كا اورغ فلسطين هاري اين؟ بايك كيت كي كا شيلوه امبيق فتي فرجنجين هق توهن باوا ماري سيني، نق بري توهن دوق سڪالي دغن كيت، فس دي نق بري سلامت فد سترو ۲ كيت. ⁴ دي فون سوره اورغ كي كا شيلوه، فس فواق ايت باوا ماري فتي فرجنجين هق توهن يغ مهاكواس، ديهاله هق دوق برتحت داتس خروبيم ايت.

فس انق امام عيلي هق نام هوفني دغن فينيهس، كي سكالي
دغن فتي فرجنجين ايت.

5 افيلا فتي ايت ماري سمفي كا خيمه اورغ اسرائيل،
سموا اورغ ايت فون فاكت برسورق دغن سوارا درس بوليه
دغر كي جائوه. ⁶ بيلا اورغ فلسطينا دخيمه دي دغر سوارا
ايت، دي فون كات: سبب اف اورغ عبراني دوق سورق
دغن سوارا درس كيتو لالو؟ بيلا دي دغر كات فتي سوچي
هق توهن سمفي ده كا خيمه اورغ اسرائيل، ⁷ دي فون
براس تاكوت كات: اوه سوسهله كيت. كواس برهالا ۲
ماسوق ماري ده كا خيمه دي. تائباس جادي بالس اين
لاكي. ⁸ اوه تروق سوغكوه كيت. سيف هق بري بوليه
سلامت فد كواس برهالا ۲ سروف ايت؟ برهالا ۲ ايتوله هق
جاتوه بالا ۲ بسر اتس اورغ مضير، تكه دي دوق دكليواسن
بوکيت دولو.

9 کيت کنا بري قواة سماغث، فس کنا كي برلاون دغن دي
سروف انق جنتن. اورغ کيت فلسطينا تأسير تندوق كا اورغ
عبراني اين. دي بياس جادي همب كا کيت دولو. لاني
کيت کنا جادي همب كا دي که؟ ماريله کيت، كي برلاون
دغن دي سروف انق جنتن.

10 اورغ فلسطينا فون توبيت كي برلاون بالس ايت، فس
اورغ اسرائيل هاله كا دي، لاري کليق كا تمفت دي
ماسيغ ۲. جادي بونوهن بسر سوغكوه. عسکر ۲ اسرائيل هق
ماتي فد هاري ايت، تيك فولوه ريبو اورغ. ¹¹ فس فتي
فرجنجين هق توهن کنا رمفس كي. انق امام عيلي دوا
اورغ ايت فون، کنا بونوه جوک فد هاري ايت.

کمائين عیلي

12 اد سئورغ عسکر دالم فواق بینجامین، هق توبیت دتمفت فرغ هوغکل کي کا شیلوه سلالو، فس سمفي فد هاري ایت. دي سويق ده باجو بوه دبو تانه اتس کفلا جادي تندا کسوساهن بسر.¹³ تکه ایت امام عیلي فون دوق مپاتق اتس کریسي دتفي جالن. دي دوق ننتي بالس ایت کران بیمبغ کا فتي فرجنجین هق توهن. بیلا اورغ ایت سمفي، دي ماسوق دالم کمفوغ نق رویت خبر دي. سموا اورغ دکمفوغ فون ترکجوت دغر، فس فاکت منأوغ دغن سوارا درس.

14 عیلي دوق دغر دتمفت دي، فس تاڻ کات: اف بوپي کیکیر ایت؟ اورغ ایت فون هوغکل ماري نق رویت خبر کا دي فول.¹⁵ فد ماس ایت عیلي توا ده، عمور دي سمبیلن فولوه لافن، مات فون کلابو تأنمفق ده.¹⁶ فس اورغ ایت رویت کا دي: امب تیغکل دتمفت فرغ هاري این، هوغکل ماري دسینی سلالو. عیلي فون تاڻ دي: اوه هاوغ، جادي بالس مان دتمفت فرغ ایت؟¹⁷ اورغ ایت فون جواب: اورغ اسرائیل کیت هاله ده، دوق لاري کا اورغ فلسطیا، فس باپق اورغ ماتي کنا بونوه. انق توئ امام کدوا ۲ فون ماتي ده، فس فتي فرجنجین هق توهن کنا رمفس کي جوک.

18 بیلا دي دغر حال فتي فرجنجین ایت، عیلي فون ربه ترلنتغ فد کریسي دي دافن فینتو کربغ ایت، فاته تکق ماتي سلالو، کران توا ده توبوه فون کموق بسر. دي دوق جادي کتوا دالم نکري اسرائیل سلام امفت فولوه تاهون.

مننتو عيلي ماتي برانق

19 فس مننتو عيلي هق جادي بيني فينيهس ايت سمفي بولن دكت نق برانق. بيلا دي دغر كات فتي فرجنجين ايت كنا رمفس ده، توؤ منتوا دي ماتي، فس لاكي دي ماتي جوكد، دي فون ساكيت فروت نق برانق سلالو، فس انق توبيت ده تافي امق دي دوق تروق نق ماتي.

20 تغه دي نق ماتي ايت، اورغ بتينا هق دوق تولوغ كات: جاغن دوق تاكوتله، مو بوليه ده انق جنتن، تافي دي تاءامبيق فادول اتوا جواب اف. ²¹ بلوم فد ايت. دي دان لتق نام كا انق دي «ايكابود»، معنائ «كمليان تاءاد ده»، کران دي کات: ²² کمليان هق اورغ اسرائيل تيغکل کي ده، سابيت فتي فرجنجين هق توهن کنا رمفس ده.

باب 5

فتي فرجنجين ايت دوق دغن اورغ فلسيا

1 افيلا اورغ فلسيا بوليه ده فتي فرجنجين ايت، دي فون باوا تورون دعينيزر، کي کا کوت دي نام اشدود، ² فس باوا ماسوق دالم تمفت برهالا دي هق نام داکون. دي فون لتق فتي سوچي ايت بلاتور دغن برهالا ايت. ³ فاکي ايسوق، بيلا اورغ اشدود باغون کي کا تمفت برهالا ايت، دي نمفق داکون ايت ترباليق دوق سوغکور دافن فتي فرجنجين هق توهن. دي فون فاکت ائکيت داکون کي لتق دتمفت هق سديا.

4 تافي ايسوق، دي نمفق داکون ايت ترباليق فول دوق

دائفن فتي هق توهن سروف دولو. كفلا دغن تاغن کلچت سوکو دوق دبندول فينتو، توبوه ساج هق دوق دسيتو. ⁵ سبب ايتوله امام ۲ هق کرج دتمفت داکون دغن اورغ ۲ اشدود هق ماري سمبه کا برهالا دي، سمفي کا ماس لاني فون، سموا اورغ تأسير جيچق اتس بندول فينتو، تمفت تاغن دغن كفلا برهالا دي جاتوه دولو.

6 فس توهن تورون بالا هق برت اتس اورغ اشدود، بري تاکوت سوغکوه دغن فپاکيت تروق هق جادي بيسول، بري باپق اورغ ماتي دکليواسن ايت. ⁷ بيلا اورغ اشدود نمفق بالس ايت، دي کات: توهن هق اورغ اسرائيل دوق حکوم کا کيت، فس کا برهالا کيت داکون جوک. فتي سوچي هق دي فون تالیه تاروه ده دتمفت کيت. ⁸ دي فون فغکیل راج ۲ اورغ فلسيتيا ماري مشواره چارا حال اين، کات: کيت نق بوات بالس مان دغن فتي سوچي هق توهن اورغ اسرائيل ايت؟ راج ۲ فون کات: کنا باوا کي کا کوت کت فول. دي فون باوا فتي کي کا تمفت ايت.

9 بيلا سمفي ده دسيتو، توهن تورون بالا اتس اورغ دتمفت ايت فول، بري تاکوت سمفي هيلغ سماغت، کران اورغ توا مودا باپق اورغ ماتي دغن فپاکيت نائیک بيسول. ¹⁰ فس اورغ هنتر فتي فرجنجين ايت کي کا کوت ايکرون فول. تافي افبيلا اورغ ايکرون نمفق کات فتي ايت سمفي ده، دي فاکت توبيت سوارا کات: دي هنتر فتي هق توهن اورغ اسرائيل ايت ماري سيني نق بري فواق کيت ماتي هابيس.

لفس ايت اورغ فغکیل راج ۲ فلسيتيا ماري مشواره سکالي

لاکي، فس فواق ايت ستوجو کات: فتي هق توهن اورغ اسرائيل مستي کنا توبيت فد نکري کيت. بائیک کيت هنتر فتي ايت کليق کا تمفت اصل هق دي، تأسير بري اورغ کيت کنا ماتي هابيس دغن کواس دي، کران سموا اورغ تاکوت کا ماتي سمفي کا هيلغ سماغث، سبب توهن تورون بالا هق برت سوغکوه اتس نکري کيت.¹² اورغ هق تائماتي فون جادي فپاکيت بيسول ايت جوک، فس سموا اورغ فاکت لغکق کا لاغيت مينتا فرتولوغن کا ديوا ۲ دي دغن سوارا درس.

باب 6

فتي فرجنجين هق توهن کليق کا نکري اسرائيل

1 فتي فرجنجين هق توهن دوق دنکري فلسيا توجه بولن ده،² لفس ايت اورغ فلسيا فاکت فغکيل امام ۲ دغن بومور منيغوق هق دي ماري مشواره کات: نق بوات بالس مان دغن فتي هق ربي اتس سموا ايت؟ فس کالو هنتر کليق کا تمفت دي، کنا بوات اف کاتيقي؟³ فواق بومور ۲ فون جواب: کالو هنتر کليق، تألپه هنتر کي ساج، تنتو کنا هنتر دغن بارغ انتوق بري لفس کسلاهن کيت، باروله فپاکيت کيت نق هيلغ ده، فس کيت نق بولپه تاهو سبب اف توهن دي دوق حکوم کيت دغن بالا بالس اين.

4 فس اورغ فلسيا تاڻ لاکي: بارغ مان هق کيت کنا هنتر کي انتوق توهن دي؟ بومور ۲ ايت فون جواب: کيت کنا امبيق امس ماري بوات روف سروف بيسول هق بري اورغ ساکيت ايت ليم بوتير. فس کنا بوات روف تیکوس ليم ايکور فول، کران اورغ فلسيا کيت جادي ليم فواق

دغن ليم راج، فس سموا فواق كيت كنا بالا ايت سروف بلاك.⁵ كيت نق بوات حرمة كا توهن دي دغن بوات روف سروف فركارا هق بري خيانه كا نكري كيت لاني. كالو بوات بالس ايت، بڭكالي توهن دي نق برادو تا توروون بالا اتس كيت ده، فس دي نق تيڭكل برهالا ۲ كيت، تا بري جادي اف ۲ ده دالم نكري كيت اين.

6 اف فائده كيت دوق كرس هاتي سروف فرعون دغن رعيت ۲ دي دنكري مصير دولو؟ هق توهن اورغ اسرائيل بوات كا دي ماس ايت، بري نمفق سروف اورغ مصير بودوه ساج. فس سود سڪالي كنا لفس سموا اورغ اسرائيل ايت بري توبيت كي.

7 فس بومور ۲ ايت فسن لاكي كات: كيت كنا بوات بالس اين. كنا بوات كريتا لمبو هق بارو، فس كنا چاري ايبو لمبو هق انق دوق فيق لاكي دوا ايكور، لمبو هق تا بياس كرج مناريق لاكي، فاسغ دي بري تاريق كريتا. انق لمبو ايت كنا كوروغ دالم كندغ درومه جاغن بري تورووت ايبو.⁸ فس كنا امبيق فتي هق توهن دي ماري لتق اتس كريتا. بارغ ۲ هق بوات دغن امس فون، هق كيت كنا سره كا توهن نق بري لفس ڪسلاهن ايت، كنا بوه دالم فتي سا لاكي، كي لتق اتس كريتا ايت جوڪ. فس كنا لفس لمبو دغن كريتا ايت بري كي سنديري.

9 كيت فون كنا فرهاتي تيڭوق ڪجادين ايت. كالو فتي نق ڪليق كا نكري دي، تنتو لمبو نق تورووت جالن كي ڪو بيت شيميش، فس كيت بوليه تاهو كات توهنله هق دوق توروون بالا اتس كيت. كالو دق، كيت بوليه تاهو كات

فپاڪيت ايت جادي سنديري، تاءُ ماري دتوهن دي.

10 اورغ فلسطينا فون بوات بالس ايت. دي امبيق ايبو لمبو
دوا ايكور هق انق دوق فيق لاکي، فس کوروغ انق دي دالم
کندغ درومه. ايبو دي، اورغ کي سغکوت دنيغ نق بري
تاريق کريتا. " فتي فرجنجين توهن فون دي لتق اتس
کريتا سکالي دغن فتي هق بوه روف ۲ بيسول دغن روف
تيکوس هق بوات دغن امس ايت.

12 ايبو لمبو ايت فون برجالن کي بتول توجو کوؤ بيت
شيميش بلغ ۲ دوق برده. دي تاءُ فاليج کوؤ کانن اتوا کوؤ
کيري، فس راج ۲ اورغ فلسطينا دوق توروٽ دي کي سمفي
دکت بندر بيت شيميش هق دوق دانتارا دوا نکري ايت.

13 فرياغ ايت، اورغ بيت شيميش تغه دوق مغمم کندوم
دچله بوکيت دالم تمفت دي ايت. بيلا دي لغکق تيغوق فتي
هق توهن دوق ماري بالس ايت، سموا اورغ فاكت سوک
هاتي. ¹⁴ لمبو ايت فون هيريت کريتا ماري سمفي دتانه
اورغ بيت شيميش هق نام يشوا، فس برهنتي دسيتو دکت
دغن باتو بسر. اورغ بيت شيميش فاكت رومبق کريتا ايت
سلاو نق بوات کايو افي. فس لمبو ايت دي سمبليه بوات
قربان هق کنا باکر انتوق توهن.

15 اورغ دالم فواق ليوي فون ماري اغکيت فتي هق توهن
کي لتق اتس باتو بسر ايت، سکالي دغن فتي هالوس هق بوه
بارغ ۲ امس. فس اورغ بيت شيميش باوا ماري بناتغ ۲
لاين انتوق بوات قربان کا توهن. اد هق سمبه کا توهن
دغن باکر هابيس، فس اد قربان برهوبوغ راحيم هق اورغ

فاکت ماکن. ¹⁶ فواق لیم راج ایت فون دوق ننټي تیغوق سموا کجادین ایت. لفس ایت دي کلیق کا تمفت دي دکوت ایکرون، فد هاري ایت جوک.

17 امس هق بوات دغن روف بیسول ایت، اورغ فلسټیا سره کا توهن نق بري لفس کسلاهن دي. اد لیم بوتیر انتوق لیم کوت دي، هق نام اشدود، کازا، ایشکلون، کت دغن ایکرون. ¹⁸ روف تیکوس لیم ایکور ایت فون، دي سره کا توهن جوک انتوق کوت راج ۲ دي، فس انتوق سموا تمفت دنکري دي، تاٴکیرا بندر هق اد فاکر باتو اتو کمفوغ ۲ هق تاٴاد فاکر. باتو هق بسر، تمفت اورغ کي لتق فتي فرجنجین ایت، دوق اد لاکي دتانه یشوا اورغ بیت شیمیش ایت، جادي تندا سمفي کا ماس لاني.

19 تافي اد اورغ بیت شیمیش توجوه فولوه اورغ هق توهن بري ماتي کران دي بوک تیغوق دالم فتي سوچي هق توهن ماس ایت. فس اورغ بیت شیمیش دوق سوسه هاتي ایغت کا اورغ دي هق کنا حکومن برت بالس ایت.

20 اورغ بیت شیمیش ایت فون کیچیق سام سنديري کات: سیاف براني دوق دکت دغن رٴبي اتس سموا، توهن هق سوچي بالس ایت؟ فتي ایت کنا توبیت فد تمفت کیت کي کا فواق مان فول؟ ²¹ دي فون سوروه اورغ کي کا تمفت نام کریات جیاریم نق رویت کا اورغ دسیتو کات: اورغ فلسټیا هنتر کلیق ده فتي فرجنجین هق توهن. کیله امبیق باواٴ کلیق کا تمفت مو.

باب 7

1 اورغ كريات جياريم فون ماري امبيق فتي ايت باوا¹ كي
 لتق دالم رومه اورغ نام ايينادب هق دوق داتس ساتو
 بوكيت. فس دي فيليه انق ايينادب هق نام عيلياز بري دي
 دوق سوچي انتوة، توغكو فتي فرجنجين هق توهن سعمور.
² فتي ايت فون دوق دكريات جياريم لام جوک، لبيه کورغ
 دوا فولوه تاهون. سلام ايت فون اورغ اسرائيل دوق سوسه
 هاتي کران نق تريما فرتولوغن دغن توهن.

نبي سموئيل مولا ئي مريته اتس اورغ اسرائيل

3 فس سموئيل تکه اورغ^۲ اسرائيل کات: کالو فواق مو
 نق فالیغ توروت توهن دغن سوغکوه^۲ هاتي، مو کنا بواغله
 برهالا^۲ هق اورغ بغسا لائين دوق فوجا، دغن روف^۲
 اشتروت ايت. مو کنا بري هاتي دوق توجو کو^۲ ربي اتس
 سموا، فس دوق توروت دي ساج، باروله دي نق تولوغ مو
 بري لفس فد کواس اورغ فلسيا.⁴ اورغ اسرائيل فون بواغ
 برهالا^۲ بعال دغن روف^۲ اشتروت ايت، فس دوق سمبه کا
 توهن یغ اسا.

5 لفس ايت سموئيل سوروه اورغ اسرائيل ماري برهيمفون
 دمیزفه. دي کات: اکو نق بردعا مینتا^۲ توهن بري تولوغ
 فواق مو.⁶ سموا اورغ ايت فون ماري برهيمفون دمیزفه،
 دي کي چیدق ایر ماري چواه دائفن تمفت سمبه کا
 توهن، لفس ايت سموا اورغ فاکت براود تائمکن
 اف سکارا سمفي کلف، بلغ^۲ دوق مفاکو کسلاهن دي کا

توهن ، کات: اورغ اسرائيل کيت بردوسا ده. بالس توله، سموئيل کرت سين اتس اورغ اسرائيل دمیزفه.

اورغ فلسټيا ماري سرغ اورغ اسرائيل دمیزفه

7 بيلا راج ۲ فلسټيا دغر کات اورغ اسرائيل دوق برهيمفون، دمیزفه ايت، دي فون فاكت کي نق سرغ فواق اسرائيل دسيتو. بيلا اورغ اسرائيل دغر حال ايت، دي براس تاكوت سوغکوه،⁸ دي فون کي مينتا دغن سموئيل کات: بردعاله دغن ربي اتس سموا توهن کيت، جاغن برادو، انتوق نق بوليه سلامت فد تاغن اورغ فلسټيا.

9 سموئيل فون کي امبيق سئیکور انق بيریغ هق تالفلس فيق لاکي، بوات قربان هق باکر هابيس انتوق ربي اتس سموا، توهن هق اورغ اسرائيل، بلغ ۲ دوق بردعا مينتا فرتولوغن دغن توهن انتوق سموا فواق دي. توهن فون تريما دعا دي.¹⁰ تغه ۲ سموئيل دوق سره قربان، اورغ فلسټيا فون ماسوق دکت نق سرغ. تافي فد هاري ايت، توهن تورون هليلينتر دغن بوپي درس سکالي، بري اورغ فلسټيا ترکجوت سمفي هيلغ فيکران. دي فون فاكت لاري کا اورغ اسرائيل.¹¹ اورغ اسرائيل فون توبيت دمیزفه همبت اورغ فلسټيا بلغ ۲ بونوه، دکت نق سمفي کا تمفت نام بيت کر، دکاکي بوکيت.

12 لفس ايت، سموئيل امبيق باتو بسر ستوغکول کي لتق دتفي جالن انتارا میزفه دغن شين. فس دي لتق نام باتو ايت عيبنيزر، معنات: «باتو فرتولوغن»، کران دي کات: سمفي سکت نيله توهن تولوغ کيت ده.

13 بالس توله اورغ فلسطينا كنا هاله ده، فس توهن تاهن دي
تأبري لفكر ماسوق تمفت ۲ هق اورغ اسرائيل سلام
سموئيل دوق هيدوف. ¹⁴ فس تمفت ۲ هق اورغ فلسطينا
بياس رمفس داورغ اسرائيل دولو، سموا ايت دي سره
كليق هابيس، سمفي كا انتارا نكري دي، يائيت سموا
تمفت هق باليق سان كوت كت دغن كوت ايكرون هق
اورغ فلسطينا ايت. سموا كليواسن هق اورغ فلسطينا دوق
بوات پاڻ فون، اورغ اسرائيل بوليه بري لفس فد كواس
دي. فس سموا اورغ امور فون دوق سېف جوڳك تأبوات
اف سكارا كا اورغ اسرائيل فد ماس ايت.

15 سموئيل دوق مريته اتس اورغ اسرائيل سلام دي دوق
هيدوف. ¹⁶ كنڦ ۲ تاهون دي برجالن كي انتوق نق
فيقت بوکو ۲ اورغ اسرائيل دتيك تمفت، يائيت بيت
ايل، كيلكل دغن ميزفه. ¹⁷ لفس ايت دي كليق كا كمفوڳ
دي درامه، تمفت دي دوق مريته اتس اورغ اسرائيل
سعمور. دسيتوله سموئيل بوات ساتو مزبه، تمفت نق سره
قربان انتوق توهن.

باب 8

اورغ اسرائيل مينتا بري اد ساتو راج

1 افيلا سموئيل توا ده دي بري انق ۲ دي بوات كرج
جادي حاكم اتس اورغ اسرائيل. ² هق سولوڳ نام يوئيل،
هق بوغسو نام ابيا. كدوا ايت فون دوق فيقت بوکو ۲
اورغ اسرائيل دكليواسن بيعير شيبا. ³ تافي دي تأتوروت
چنتوه ايه دي. دي دوق چاري كليهن ساج، دغن ماكن
سواف، فس دوق كرت سين دغن تأعاديل.

4 کتوا ۲ اورغ اسرائيل فون فاکت مشواره، لفس ايت،
فواق دي کي کا کمفوغ رامه نق کيچيق دغن سموئيل.
5 دي کات: توان اين توا ده، فس انق ۲ تاءتوروت چنتوه
هق موليق سروف توان اين. سبب ايتوله نق مينتاء توان لتق
سئورغ جادي راج اتس فواق کيت، بارو نق بوليه دوق
سروف نکري ۲ لائين سموا. 6 بيلا سموئيل دغر کات فواق
ايت نق بري اد راج، دي تاءستوجو. دي فون کي سلالو
بردعا کا توهن، 7 فس توهن بري تاهو کا دي کات:

توروتله سموئيل، هق مان فواق دي مينتاء ايت. بوکن
مو هق دي تولق، تافي اکو اينيله هق دي تاءسير بري
جادي راج اتس دي ده. 8 جق دماس اکو باوا فواق
دي توبيت فد نکري مصير دولو، فواق دي بياس
تيغکل اکو، فس توروت هق لائين، لاني دي نق بوات
بالس ايت دغن مو جوک. 9 مو کنا توروتله هق مان
دي نق، تافي بري امران کا دي دولو، فس رويت بري
ارتي چارا ۲ راج نق مريته.

فرکتان توهن کا اورغ هق مينتاء نق کا راج

10 سموئيل فون کي رويت سموا فرکتان توهن کا فواق
هق مينتاء نق کا راج ايت. 11 دي کات: دغرله چارا حال راج
هق نق مريته اتس مو. دي نق امبيق انق ۲ جنتن مو انتوق
جادي عسکر ۲ دي. ستغه اورغ نق باوا کریتا ۲ کودا اتوا
نائیک کودا ايت، فس ستغه اورغ لاکی نق هوغکل کي دافن
فواق ۲ ايت. 12 دي نق فيليه کفلا ۲ عسکر ايکوت هاتي دي
سنديري، تاءکيرا هق مريته اتس ليم فولوه اورغ اتوا هق
مريته اتس سريبو اورغ فون. دي نق سوروه انق ۲ مو کي
بوات سنجات ۲ اتوا الت ۲ کریتا کودا انتوق عسکر ۲ دي.

فس بيلا سمفي فرياغ برکالا اتوا مځتم فون دي نق فقسا
انق ۲ مو کي بوات کرج هق دي دولو. ^{۱۳} انق ۲ بتينا مو،
دي نق امبيق کي بوات کرج برکولي دغن باکر روتي اتوا
بوات ميپق واغي انتوق اورغ درومه دي.

14 دي نق امبيق تانه ۲ مو هق توبيت حصن موليقي، سروف
کبون زبیت دغن کبون زيتون، انتوق نق نديه کا منتری ۲
دي. ^{۱۵} دي نق امبيق حصن دالم تانه ۲ هق مو، سکيان دالم
سفلوه، انتوق نق هديه کا منتری ۲ دغن عسکر ۲ دي.
^{۱۶} انق ۲ کولي مو بتينا جنتن، دغن بناتغ ۲ هق مو فاکي
بوات کرج فون، هق مان موليقي سکالي دي نق امبيق کي
بوات کرج هق دي. ^{۱۷} کمبيغ بيریغ هق مو دوق فیرا فون،
دي نق چابوت سئیکور دالم سفلوه انتوق ديري دي،
فس فواق مو سموا کنا دوق سروف همب کا دي سعمور.
^{۱۸} فد ماس ایت مو نق فغکیل دغن سوارا درس مینتا
فرتولوغن دتوهن سابیت راج هق فواق مو دوق مینتا نق
بري اد لاني، تافي فد ماس ایت، توهن تأسیر دغر
فرمینتان مو.

19 بالس توله فرکتان سموئيل، تافي اورغ اسرائيل تأسیر
دغر امران دي. فواق ایت کات: دق! کیت نق بري اد راج
جوک ۲ ^{۲۰} سروف نکري ۲ لاین. دي نق مرینته اتس کیت،
فس دیاله هق نق باوا کیت ماس نق کي بوات فرغ.

21 بيلا سموئيل دغر ده فرکتان فواق ایت، دي فون کي
مځهادف توهن، فس دوق رويت سموا فرکارا ایت کا دي.
^{۲۲} توهن فون کات: توروته هق دي نق ایت. لتقله راج کا
دي. لفس ایت سموئيل سوروه اورغ ۲ اسرائيل کلیق کا
تمفت دي ماسیغ ۲.

باب 9

توهن باوا^۱ ساءول کي کا تمفت نبي سموئيل

1 اد اورغ کاي دالم فواق بينجامين، نام دي کيش انق ابيعل، تو^۱ دي نام زيروور انق بيکوره، هق جادي فواق افياه دالم فواق هق بينجامين.² کيش اد انق سئورغ نام ساءول، توبوه دي موليق تيغکي فد اورغ لائين ستا. تاءاد سياف بوليه بنديغ دالم سموا فواق اسرائيل.

3 فس کيش ايه ساءول سائي اد هيمر بايق ايکور هق سست تاءکليق کا رومه. دي فون سوروه انق کات: مو کيله چاري هيمر^۲ ايت، فس اجق کولي سئورغ کي بوات سائين.⁴ دوا اورغ ايت فون برجالن کي لالو کو^۳ بوکيت^۲ هق نکري ايفرائيم، فس ماسوق دالم کليواسن ساليسه، تافي تائموا لاکي. دي فون ماسوق دالم کليواسن شعالم فول، تافي تاءاد دسيتو. لفس ايت دي برجالن کي رات^۲ دالم نکري بينجامين، تافي تائموا جوک.

5 بيلا دي سمفي کا تمفت نام زوف، ساءول فون کات کا کولي دي: بائيك کيت کليق، تاکوت ايه کو دوق بيمبغ کا کيت لبيه فد بيمبغ کا هيمر.⁶ تافي کولي کات کا دي: لانني کيت دکت ده دغن تمفت ساتو اورغ هق کرج کا توهن. سموا اورغ حرمة کا دي کران اف^۲ هق دي رويت، جادي سوغکوه. بائيك کيت کي کا رومه دي، بئگالي دي بوليه رويت کا کيت، کنا کي کو^۳ مان نق چاري هيمر ايت.

7 تافي ساءول کات: کيت نق باوا^۱ اف بري کا دي؟ بکلن کيت هابيس ده، فس تاءاد اف سکارا بوليه هديه کا دي. کيت اد اف کاتي^۸؟ کولي فون جواب: ها، امب اد سکفيغ

دويت فيرق هق كچيك، بوليه بري كا دي، فس دي نق رويت كو مان كيت كنا كي چاري هيمر ايت.

11-9 ساول كات: ها موليق فيكران مو. ماريله كيت كي. دي فون كي كا كمفوغ اورغ هق كرج كا توهن ايت. فس تكه دي برجالن نايك كا تمفت ايت، دي تمو دغن اورغ ۲ بتينا مودا ماري نق چيدق اير. دي فون تاڻ كات: هي ميق، اورغ منيغوق ايت، اد دسيني كا دق؟ (اورغ اسرائيل ماس دولو، بيلا دي نق مينتاء اف ۲ دغن توهن، دي كات: ماريله كيت كي چاري اورغ منيغوق. سبب هق اورغ لاني فغكيل «نبي» اورغ ماس دولو فغكيل «اورغ منيغوق».)

12 فواق اورغ بتينا سائي كات: اد. دي بارو لفس سائي. توروت كي باغتله. دي كليق هاري اين كران اورغ سيني نق بوات قربان دتمفت اتس بوكيت ايت. ¹³ كالمو ماسوق دالم بندر سلالو، تنتو توان نق تمو دغن دي بلوم فد دي نايك كا تمفت بوات قربان نق ماكن جاموان. سموا اورغ دوق ننتي دي سمفي نق بري بردعا اتس قربان، بارو اورغ هق كنا جمفوت ايت بوليه سيمفن نق ماكن. كيله سلالو، فس توان دان نق تمو دغن دي. ¹⁴ دوا اورغ ايت فون كي ماسوق دالم بندر فس تمو سلالو دغن سموئيل، تغه دي دوق توبيت كي كا تمفت قربان.

15 سسوغكوهن، توهن بري تاهو ده كا سموئيل چارا حال ساول ايت كلمارين لاكي، كات: ¹⁶ ايسوق فد ماس اين جوڪ، اكو نق بري سئورغ دالم فواق بينجامين ماري كا تمفت مو. مو كنا لتق دي جادي راج دغن چواه ميپق اتس كفلا دي. ديهاله هق نق مرينته اتس اورغ اسرائيل هق جادي ميليڪ كو. فس دي نق بري اورغ اسرائيل سلامت فد تاغن

اورغ فلسطينيا. کران اکو تیغوق ده کسوساهن اورغ هق جادي میلیق کو، فس سوارا دي سمفي ده کا اکو. بالس توله توهن کات.

17 فس بیلا سموئيل تیغوق سائل دوق ماري ایت، توهن بري تاهو کا دي سلالو کات: اورغ اینیله هق اکو رویت ده کا مو، کات دي نق مرینته اتس سموا اورغ هق جادي میلیق کو. ¹⁸ سائل فون ماسوق دکت تان سموئيل کات: توان تاهو کا دق، اورغ منیغوق ایت رومه دي دوق دمان؟

19 سموئيل فون جواب: اکو اینیله. فس هاري این اکو نق اجق مو کدوا این کي کا تمفت کرج داتس بوکیت ایت، نق بري ماکن سکالي دغن اکو. فس ایسوق فاکي اکو نق رویت سموا فرکارا هق مو نق تان. ²⁰ هیمر ۲ هق هیلغ تیک هاري ماري ده، مو تأسه بیمبغله، اورغ تمو ده.

تافي لاني اکو نق تان: سیاف دي هق فواق اسرائیل سموا دوق نق ساغت ۲؟ موله هق جادي اورغ ایت، سکالي دغن قوم کلوارک مو. ²¹ سائل فون کات: امب این اورغ بینجامین دالم فواق هق رنده سکالي دنکري اسرائیل این. فس کلوارک امب فون تائیمبول نام. سبب اف توان دوق کیچیق دغن امب بالس این؟

22 لفس ایت سموئيل باوا دي کدوا کي کا تمفت جاموان، بري دي ماسوق دودوق دافن اورغ ۲ هق کنا جمفوت ایت، اد لبیه کورغ تیک فولوه اورغ. ²³ فس سموئيل کات کا توکغ ماسق: امبیقله داکيغ فها هق اکو سوروه تاروه دولو، باوا ماریله انتوق اورغ این. ²⁴ توکغ ماسق فون باوا ماري داکيغ فها دغن بارغ ۲ هق نق ماکن سکالي،

لتق دأفن ساءول. سموئيل فون کات: ماکنله، اینيله داکيغ
 هق تاروه ده انتوق مو. سسوغکوهن دوق تاروه ده سمفي
 ماس هق منتو نق بري مو ماکن سکالي دغن اورغ ۲ اين.
 ساءول فون دوق ماکن جاموان سکالي دغن فواق سموئيل
 هاري ايت. ²⁵ بيلا سوده ده، سموا اورغ فاکت تورون فد
 بوکيت ماسوق دالم بندر فول. مالم ايت فون، سموئيل
 سيف تمفت اتس سوتوه رومه دي، بري ساءول تيدور
 دسيتو.

تندا ساءول جادي راج

26 دينيهاري ايسوق، سموئيل فغکیل ساءول کات: باغونله.
 لاني بوليه کليق ده. فس اکو نق هنتر مو کي سکرت
 جالن. ساءول فون برسيمفن نق کليق، فس سموئيل توبيت
 کي سکالي دغن دي. ²⁷ بيلا دي سمفي کا سود بندر،
 سموئيل کات کا ساءول: سوروه کولي مو برجالن کي بلغ ۲،
 فس کيت بوليه برادو دسيني سبنتر. اکو نق رويت خبر هق
 توهن نق بري تاهو کا مو.

باب 10

1 فس سموئيل امبيق جبول ميپق زيتون، فس چواه اتس کفلا
 ساءول. دي کوچوف فيفي ساءول ايت، فس کات:

توهن سوده لتق مو جادي فمرينته اتس سموا اورغ
 اسرائيل هق جادي ميليق دي. مو کنا دوق مرينته
 اتس دي انتوق بري سلامت فد سموا سترو ۲ هق دوق
 کلليغ نکري اين. اينيله تندا کات اکوله هق لتق مو
 ده. ² بيلا مو تيغکل اکو هاري اين، مو نق کي سمفي
 دکت قبور راخيل دکمفوغ زيلزه، دالم نکري بينجامين

اين لاڪي، فس مو نق تمو دغن دوا اورغ. دي فون
نق کات بالس اين: هيمر ۲ هق توان دوق چاري
ايت تمو ده، فس ايه توان تائبمبغ کا هيمر ده،
دوق بيمبغ کا توان فول. دي کات: نق کي چاري
دما انق کو؟

3 لفس ايت مو نق برجالن کي لاڪي، سموئيل کات،
سمفي کا فوهون کايو بسر دکمفوغ تابور ايت، فس
مو نق تمو دغن تيک اورغ تغه دوق برجالن کي نق
سره بارغ کا توهن دبیت ايل. سئورغ دوق هيريق
انق کمبيغ تيک ايكور، سئورغ لاڪي دوق باوا روتي
تيک توغکول، فس اورغ هق کتيک دوق باوا بکس اير
بواه زبیت. ۴ اورغ ۲ ايت نق تکور مو دغن حرمة، فس
بري روتي دوا توغکول، هق مو کنا تريما.

5 لفس ايت، مو نق برجالن کي لاڪي سمفي کا کيبياه
ايلوهيم، تمفت عسکر ۲ فلستيا بياس برخيمه. فس
تغه ۲ مو نق ماسوق کمفوغ کيبياه ايت، مو نق تمو
دغن ساتو فاسوقکن اورغ هق بياس تريما کواس روح
توهن. فواق ايت نق بلارق تورون فد تمفت سوچي
داتس بوکيت بلغ ۲ دوق مائين فرکاکس ۲ موزيق
سروف سوليغ، کمبوس، ربان دغن کدومبق. فس
کواس روح توهن بري دي دوق پاپي فوجين دغن تاري
مناري سروف اورغ کيلا.

6 لفس ايت کواس روح توهن نق تورون اتس مو ساول،
بري مو سنديري ماسوق فوجي توهن دغن تاري مناري
سکالي دغن فواق ايت. جق دماس ايت فون مو نق
براوبه جادي اورغ هق لائين فد دولو. ۷ بيلا مو تمو

ده دغن تيڪ فرڪارا ايت، مو بوليه ڪي بوات اف ۲
 هق مو براس بائڪ نق بوات، ڪران توهن دوق سڪالي
 دغن مو ده.

8 لفس ايت مو ڪنا برجالن ڪي ڪا ڪيلڪل دولو، فس
 اڪو نق ڪي تمو دغن مو انتوق بوات قربان ۲ هق سره
 ڪا توهن دغن باڪر هابيس، سڪالي دغن قربان ۲
 برهوبوڻ راحيم. مو ڪنا ننڍي دسيٽو سمفي توجوه
 هاري بارو اڪو نق سمفي، فس نق رويت بري تاهو
 اف ۲ هق مو ڪنا بوات لاڪي.

تندا ۲ هق سموئيل رويت دولو جادي اتس ساول

9 ساول فون تيغڪل سموئيل برجالن ڪي لاڪي. جق
 دماس ايت، توهن بري فراغي دي براوبه، فس تندا ۲ هق
 سموئيل رويت ده ايت، سمو جادي اتس دي، فد هاري
 ايت جوڪ.

10 بيلا ساول دغن ڪولي دي سمفي دڪت ڪمفوڻ ڪيبياه،
 بتولن فاسوڪن اورڻ هق تريما ڪواس روح توهن ايت ماري
 تمو دغن دي. فس ڪواس روح توهن تورون اتس ساول
 جوڪ، بري دي ماسوق فوجي توهن دغن سوارا درس
 سڪالي دغن فواق ايت.

11 دسيٽو اد اورڻ هق ڪنل دغن ساول. دي فون تيغوق ڪا
 ساول دوق پاپي فوجين دغن سوارا درس دالم فاسوڪن
 ايت، فس دوق ڪيچيڪ سام سنديري ڪات: باء اف انق ڪيش
 دوق بوات بالس اين؟ ساول ماسوق جادي فواق هق تريما
 ڪواس روح توهن جوڪ ڪه؟¹² اورڻ لائين فون ڪات: ڪواس
 روح توهن تائورون اتس اورڻ ڪو ايوبو باف دي.

لفس ايت، فرڪٽان اين لڪت داورغ ۲ اسرائيل کات:
 «ساول ماسوق جادي فواق هق تريما کواس روح توهن
 جوک ڪه؟»¹³ بيلا سوده ده دوق فوجي توهن دغن سوارا
 درس ايت، ساول فون قليق کا رومه.

14 فس فق سودارا دي تاڻ کات: «مو کي کمان ايت؟»
 ساول فون جواب: کي چاري هيמר ۲، فس بيلا تائموا،
 کيت کي کا تمفت سموئيل.¹⁵ فس سودارا دي دوق تاڻ
 لاڪي کات: فس سموئيل رويت اف کاتيقي؟¹⁶ ساول
 فون جواب: دي رويت بري تاهو کات هيמר ۲ کيت اورغ
 تموا ده. تافي هق مان سموئيل رويت چارا حال کنا جادي
 راج، ساول تاء سبوت.

اورغ اسرائيل تريما ساول جادي راج

18-17 لفس ايت سموئيل فغڪيل اورغ اسرائيل ماري برهيمفون
 دميرفه، کات کا دي:

اينيله فرڪٽان ربي اتس سموا توهن هق اورغ
 اسرائيل: اڪو بياس باوا فواق مو توبيت فد نڪري
 مصير، بري لفس فد کواس اورغ مصير ايت. لفس ايت
 اڪو بري فواق مو سلامت فد سموا راج هق نق بوات
 پاڻ کا فواق مو سعمور.

19 تافي هاري اين نمفق سروف فواق مو نق تولق اڪو
 توهن مو اين، هق بياس بري لفس فد سموا بالا ۲
 کسوساهن هق فواق مو دولو. فواق مو کات: دق!
 کيت نق بري اد راج هق بوليه مريته اتس کيت. سبب
 توله، مو کنا برهيمفون دسيني هاري اين دوق
 سفواق ۲ ايڪوت قوم ۲ مو، دائفن اڪو ربي اتس سموا.

20 لفس ايت سموئيل سوروه اورغ اسرائيل دودوق جادي
سفواق ۲ انتوق نق جمفوت اوندي. فس كنا كا فواق
بينجامين. ²¹ لفس ايت سموئيل بري كلوارك ۲ دالم فواق
بينجامين ايت توبيت دوق سفواق ۲، فس كنا كا كلوارك
ماتري. لفس ايت كلوارك ماتري فون توبيت دوق
سئورغ ۲، فس كنا كا ساول انق كيش. تافي بيلا اورغ دوق
چاري ساول، دي تاءاد دسيئو.

22 فس اورغ سوروه تان توهن فول، كات: كنا كا اورغ
ايت كا دق، اتوا اد اورغ لائين لائي؟ توهن فون بري
تاهو كات: كي تيغوقله، دي ايت دوق منوسوف دتمفت
تاروه بارغ ۲ فواق مو. ²³ فس اورغ ۲ فون كي امبيق ساول
ماري. بيلا دي دوق برديري دافن سموا اورغ، نمفق سلالو
كات دي اورغ توبوه تيغكي لفس. ²⁴ سموئيل فون سرو دافن
سموا اورغ ايت، كات: تيغوقله، دي حق توهن فيليه ده.
تاءاد سياف حق بوليه بنديغ دغن دي دالم سموا فواق
اسرائيل كيت. سموا اورغ فون فاكت برسورق كات:
برجياه راج كيت! بري دي هيدوف سعمور!

25 لفس ايت، سموئيل دوق هوري بري دغر كا اورغ
اسرائيل فركارا ۲ حق رعيت ۲ كنا بوات انتوق راج، فس حق
راج كنا بوات انتوق رعيت ۲ دي جوڪ. سموا فركارا ايت
فون، دي تولىس جادي ساتو سورت حق دي كي تاروه دالم
تمفت سوچي حق توهن. لفس ايت دي سوروه سموا اورغ
كليق كا رومه دي ماسيغ ۲.

26 ساول فون كليق كا رومه دي دكمفوغ كيبياه. اد
سفواق كفلا ۲ عسكر حق نام تيغكي كي هنتر ساول كليق،

کران توهن کرق هاتي دي بري سوکوځ ساءول. ²⁷ تافي اد جوک اورغ هق هاتي تاءموليق، دوق مغيقيق کات: بوليه کا دق اورغ اين بري سلامت کا فواق کيت؟ فواق ايت دوق هينا کا ساءول، تاءباوا هديه ماري کا دي سروف اورغ لائين. تافي ساءول تاءکات اف.

باب 11

اورغ امون سرغ ماسوق نگري اسرائيل

1 لفس ايت تاءلام، راج اورغ امون نام ناهش، سرغ ماسوق نگري کيلياد هق اورغ اسرائيل، فس ليغکوځ کوت جابيش. اورغ جابيش فون مينتاء دغن راج ناهش کات: کالو توانکو بوات ستوجوان دغن فواق کيت، کيت نق دوق باوه فرينته توانکو سعمور. ² راج فون جواب کات: بوليه. تافي سموا اورغ جنتن دالم فواق مو، اکو نق چوليق مات سبله کانن کنف² اورغ. بالس توله اکو نق بري سموا اورغ اسرائيل دوق مالو. ³ کتوا² دالم کوت جابيش فون کات بالس اين: مينتاله توانکو ننتي سمفي توجوه هاري بري کيت دان هنتر اورغ کي رويت خبر کا سموا تمفت هق اورغ اسرائيل کيت. کالو تاءاد سياف نق تولوغ، کيت سموا نق سره ديري کا توانکو.

4 بيلا اورغ ايت سمفي کا کمفوځ ساءول دکيبياه، دي فون رويت خبر ايت بري اورغ دغر. فس سموا اورغ براس سوسه هاتي ساغت سمفي کا ترياق مناغيس. ⁵ تکه ايت ساءول تغه دوق کليق دبنده دغن لمبو² هق دي فاكي بوات کرج، فس دي تاا سلالو: اف هق جادي بري سموا اورغ دوق ترياق تاغيس؟ اورغ فون رويت کا ساءول، خبر هق اورغ دکوت جابيش کيريم ايت.

6 بيلا ساءول دغر حال ايت، کواس روح توهن تورون اتس دي، فس دي نائيك ماره سلالو. ⁷ دي فون امبيق لمبو هق فاکي بوات کرج ايت دوا ايکور، سمبليه سلالو کرت جادي سکاتم ^۲، سوروه اورغ باوا کي سمفي کا سموا کمفوغ ^۲ دالم نکري اسرائيل، فس کات کا دي: سيف ^۲ هق تأسير توبيت ماري توروب ساءول دغن سموئيل کي بوات فرغ، نق بوات خيانه کا لمبو ^۲ دي سروف اين. فس توهن بري سموا اورغ براس تاکوت. دي فون فاکت توبيت کي بلاک.

8 راج ساءول فون بري سموا اورغ ايت برهيمفون دتمفت نام بيزيق. اورغ دالم فواق ^۲ هق اسرائيل اد تیک راتوس ريبو، فس اورغ دالم فواق يهودا اد تیک فولوه ريبو. ⁹ فس راج ساءول رويت کا اورغ ^۲ هق باوا خبر ماري دجابيش، کات: مو کليقله دولو کا کوت جابيش، رويت کا اورغ دسيتو کات: تغه ^۲ هاري ايسوق کيت نق سمفي بري فواق مو سلامت. بيلا اورغ ايت باوا خبر کليق، اورغ ^۲ دجابيش براس سوک هاتي. ¹⁰ فواق دي فون کات کا راج اورغ امون: ايسوق فواق کيت نق سره ديري بري توانکو بوليه بوات کا کيت ايکوت کهندق توانکو.

راج ساءول بوات فرغ دغن اورغ امون.

11 ايسوق، راج ساءول فون بهاکي عسکر ^۲ دي جادي تیک فواق. چره فاکي سموا ايت ماسوق سرغ خيمه ^۲ اورغ امون دغن ترکجوت، فس بوليه بونوه بابق اورغ دغن تأسرادو سمفي تغه هاري. اورغ هق تأسماتي لاکي فون دوق لاري مچه کي ماسيغ ^۲.

12 لفس ايت اورغ ۲ اسرائيل کي کا تمفت سموئيل کات:
 مان اورغ هق دوق بحس دولو تائسير بري سائول جادي
 راج؟ باوا دي ماري سيني سلالو، کيت نق جاتوه حکوم
 بونوه اتس دي. ¹³ تافي سائول سنديري کات: دق! اکو
 تائبري جاتوه حکوم بونوه اتس سياف ۲ فون، کران هاري
 اين توهن بري سلامت بسر کا اورغ اسرائيل کيت.

14 سموئيل فون کات: بائيك کيت سموا کي برهيمفون
 دکيلکل نق اڱکيت سائول جادي راج سمولا. ¹⁵ سموا اورغ
 فون فاكت کي برهيمفون دکيلکل، انتوق مفهادف توهن
 نق اڱکيت سائول جادي راج سمولا. تکه ايت جوک، دي
 سمبله بناتغ بايق ايکور جادي قربان برهوبوغ راحيم هق
 سره کا توهن بلوم فد ماکن. فس سائول دغن اورغ اسرائيل
 سموا دوق سوک ریا هاري ايت.

باب 12

فسنن نبي سموئيل هق سود

1 فس سموئيل برديري دائفن سموا اورغ اسرائيل کات:
 اکو بوات ده فرکار ۲ هق فواق مو دوق مینتاً دولو. اکو
 بري ده راج هق بوليه مريته اتس مو. ² لاني دي نق فيمفين
 فواق مو کي. اکو اين توا ده، رمبوت فون اوین، فس انق ۲
 کو بوليه دوق کرج سام مو لاکي، فس اکو دوق فيمفين
 فواق مو اين جق دماس اکو مودا لاکي سمفي کا هاري اين.
 3 لاني اکو دوق دافن فواق مو سموا. کالو سياف اد
 بوکو مان ۲، بري دي رويته دافن توهن فس دافن راج هق
 دي بري ده کا فواق مو. اد کا دق اورغ هق اکو بياس

امبيق لمبو اتوا هيمر هق جادي ميليق دي؟ اد کا دق هق اکو بياس تيفو اتوا بوات پاڻ کا دي؟ اد کا دق هق کات اکو بياس ماکن سواف انتوق بري مات کو تائمنفق هق مان عاديل؟ اڱکيتله بوکو ايت بري دغر لاني، فس اکو نق هنتر کليق سموا.

4 تافي سموا اورغ ايت جواب کات: دق! توان تائباس تيفو اتوا بوات پاڻ کا سياف، فس تائباس امبيق اف ۲ هق جادي ميليق اورغ⁵ سموئيل فون کات: بائک له! توهن سنديري جادي سقسي اتس فرکارا اين، فس راج هق بارو فيليه اين فون، دي جادي سقسي جوک، کات مو تائتمو بوکو اف ۲ هق اکو بوات. اورغ رامي فون فاکت کات: موليقله! توهن جادي سقسي اتس کيت.

6 فس سموئيل کات لاکی: ايغته کات توهن هق جادي سقسي اتس کيت هاري اين، ديهاله هق لتق موسی دغن هارون جادي فميمفين اتس فواق توئ نينيق کيت، فس باوا فواق ايت توبيت فد نکري مصير.

7 لاني اکو نق بري فواق مو دوق برديري دائفن توهن دسيني لاکی، نق بري فواق مو دغر بوکو ۲ هق اد اتس مو. مولا ۲ اکو نق رويت چارا حال فرکارا هق توهن بوات ده انتوق بري سلامت کا فواق کيت، فس کا توئ نينيق کيت دولو.

8 بيلا توئ نينيق کيت يعقوب کي دوق دنکري مصير دولو، فس اورغ مصير بوات پاڻ کا دي، توئ نينيق کيت دوق فغکيل مينتا تولوغ دغن توهن. توهن فون سوروه موسی دغن هارون باوا توئ نينيق کيت توبيت فد نکري مصير، فس ايت بري فواق کيت دوق کجت دنکري اين.

- 9 تافي لام ۲ فواق ايت لوف تاءايغت كا توهن، ربي اتس سموا . سبب ايت توهن سره دي كا تاغن سترو ۲ هق ماري سرغ نكري اين. مولا ۲، دي هاله كا سيسرا، كفلا عسكر هق راج كوت حصور، فس ايت كا اورغ ۲ فلسطين، فس كا راج نكري مواب فول. سموا ايت دوق بوات فرغ دغن اورغ اسرائيل كيت.
- 10 باروله توئ نينيق كيت فغكيل مينتا تولوغ دغن توهن سمولا، كات: كيت بوات دوسا ده، كيت تيغكل ربي هق دوق اتس سموا، كي تورت برهالا ۲ نام بعال دغن اشروت. اوه يا توهن، مينتاله بري سلامت فد كواس ۲ سترو، فس فواق اكو نق دوق سمبه كا توهن ساج.
- 11 فس توهن فون بري فنولوغ ۲ كا دي. مولا ۲ كيديون هق اورغ فغكيل جروبعال، لفس ايت بارك، جيفته، فس سمسون فول. بالس توله توهن بري فواق كيت سلامت فد سترو ۲ كيت سعمور، تاءكيرا دي ماري كوء چله مان فون، فس ايت بري فواق كيت بوليه كليق دوق دغن سنغ ليندغ فول.
- 12 تافي بيلا فواق مو اين نمفق كات ناهش راج اورغ امون ماري بوات فرغ دغن فواق مو، فواق مو فون منيدق كا توهن هق جادي راج اتس فواق مو ده، ماري چاري اكو كات: دق! فواق كيت فون نق بري اد راج جوڪ. ¹³ فس لاني تيغوقله راج هق فواق مو فيليه ايت، هق مو مينتا بري اد راج، فس اورغ اينيله هق توهن لتق انتوق مو. ¹⁴ كالمو مو دوق سمبه كا توهن دغن تاكوت كا دي ساج، فس كالمو فواق مو سكالو دغن راج مو اين دوق تورت

سوروهن توهن، فس تائ لڱر حكوم ۲ دي سڪالي، تنتو مو
نق تمو هق بائڪ سعمور. ¹⁵ تافي كالو مو تائ سير طاعة كا
توهن فس دوق لڱر حكوم ۲ دي سعمور، ننتي توهن
سنديري نق لاون دغن فواق مو، فس دغن راج مو جوڪ.

16 سبب توله اكو سوروه فواق مو دوق مڱهادف توهن
دسيني دولو، نق بري مو تيغوق فرڪارا عجائب هق توهن
نق بوات دائفن مات فواق مو اين. ¹⁷ لاني فرياغ مڱتم
ڪندوم بوڪن؟ تافي اكو نق بردعا مينتائ توهن تورو
هوجن دغن ڪوروه ڪيلت، باروله مو نق ترڪابر ڪات فواق
مو ساله سوڱڪوه دفنداغن توهن، ڪران مو دوق مينتائ بري
اد راج.

نبي سموئيل دوق بردعا فس توهن بري اد تند

18 لفس ايت سموئيل بردعا فد توهن، فس توهن بري
تورو سلالو هوجن دغن ڪوروه ڪيلت. سموا اورغ فون
براس تاڪوت كا توهن فس تاڪوت كا سموئيل جوڪ.
¹⁹ دي فون مينتائ دغن سموئيل ڪات: بري توان بردعاله فد
رٿي اتس سموا، توهن هق توان اين، جاغله بري همب ۲
توان اين ڪنا ماتي، ڪران ڪيت اورغ هق اد دوسا ده. فس
لاني ڪيت تمبه لاڪي ڪسلاهن دغن مينتائ بري اد راج.

20-21 تافي سموئيل ڪات: مو تائسه تاڪوتله. سوڱڪوه ڪسلاهن
مو بايق، تافي مو ڪنا تورو توهن دغن سوڱڪوه ۲ هاتي،
جاغن فاليغ ڪي تورو بارغ ۲ هق تائ اد ڪواس نق بري
سلامت فس تائ اد فائده جوڪ، ڪران بارغ ۲ ايت هق فلسو
ساج. ²² تنتو توهن تائ تيغڪل فواق مو هق جادي ميليق
دي، ڪران توهن دوق ايغت ڪا فرڪارا ۲ هق دي جنجي ده.

23 فس سموئيل کات لاکي: اکو اين تائسير برادو، تافي نق بردعا انتوق فواق مو سعمور^۲. کالو برادو، اکو سندیري بوات ساله کا توهن. مینتأله بري هاتي کو جائوه فد کسلاهن ایت. تنتو اکو نق مغاجر فواق مو بري بولیه بوات اف^۲ هق بتول. ²⁴ فواق مو فون کنا تاکوت کا توهن، دغن طاعة ستیا، فس کنا دوق ایفت سعمور فرکارا^{۲۱} بسر هو. توهن بوات ده کا فواق مو! ²⁵ تافي کالو مو دوق بوات ساله لاکي، تنتو فواق مو نق کنا بناس سکالي دغن راج مو.

باب 13

راج ساول بوات فرغ دغن اورغ فلسطیا

1 ساول جادي راج فد عمور تیک فولوه تاهون ده. بیلا دي دوق مرینته اتس اورغ اسرائیل دوا تاهون ده، ² دي فون فیلیه تیک ریبو اورغ بري جادي عسکر سعمور. دوا ریبو اورغ دوق سکالي دغن ساول دمیخمش دغن بوکیت^۲ دکت بیت عیل. سربو اورغ لاکي دوق دغن انق دي هق نام یوناتن دکمفوغ کیبیه دالم نکري هق فواق بینجامین. اورغ^۲ لاین راج ساول بنر بري کلیق دوق درومه دي ماسیغ^۲.

3 فس یوناتن کي سرغ تمفت عسکر^۲ فلسطیا دوق برخیمه دکیبا، فس خبر ایت سمفي کلیق کا اورغ فلسطیا دنکري دي. راج ساول فون سوروه اورغ کي سرات تمفت دالم نکري انتوق سیوف سروني بري اورغ عبراني سموا دغر خبر ایت. ⁴ بالس توله اورغ^۲ اسرائیل دغر کات راج ساول کي سرغ تمفت عسکر فلسطیا دوق برخمه ایت، فس اورغ فلیستیا دوق بنچی کا اورغ اسرائیل سوغکوه.

لفس ايت راج ساءول فغكيل اورغ اسرائيل سموا كي
برهيمفون سڪالي دغن دي دڪيلكل.⁵ اورغ فلسطين فون
ماري برهيمفون جوڪ نق برلاون دغن اورغ اسرائيل.
كريتا كودا دي اد تيڪ فولوه ريبو. عسڪر ۲ هق نائيڪ كودا
فون اد انم ريبو، فس عسڪر هق برجالن كاكي تاهابيس نق
بيلف سروف فاسير دفتي. سموا ايت ماري لتق خيمه ۲
دكليواسن ميخمش باليق تنائيك بيت هاوين.

6 بيلا اورغ ۲ اسرائيل نمفق كات دي دوق تركفيت كران
اورغ فلسطين سرغ ماسوق دغن تروق سڪالي، دي فون لاري
منوسوف دالم كوا، دالم تلاڪ، دالم لوبغ اتوا دچله ۲ باتو
داتس بوكيت.⁷ فس اد اورغ عبراني جمرغ سوغي يردن
لاري كي كا نكري كد دغن نكري كيلياڊ. تافي راج ساءول
دوق ننتي دڪيلكل لائي. عسڪر ۲ هق دوق سڪالي دغن دي
دسيٽو فون دوق كتر كناليف.

8 فس راج ساءول دوق ننتي سمفي توجوه هاري ايكوت
فسنن سموئيل، تافي سموئيل تاسمفي لائي. اورغ دالم
فواق دي فون كهور ۲ مچه كي.⁹ فس راج ساءول سوروه
اورغ باوا ماري بناغ ۲ انتوق بوات قربان كا توهن،
قربان هق كنا باكر هابيس دغن قربان هق ماكن برهوبوغ
راحيم. فس ساءول سنديري هق سره قربان ۲ ايت كا توهن.

10 بيلا سوده بوات قربان ۲ ايت، سموئيل فون سمفي.
فس راج ساءول كي سمبوت دي دغن اوچف سلامت.
¹¹ تافي سموئيل كات: بااف مو بوات بالس اين؟ ساءول
جواب: كران اكو تيغوق كات اورغ ۲ كيت كهور ۲ مچه كي،
فس توان تاهاري دالم ماس هق جنجي ايت. اورغ فلسطين

فون دوق برهيمفون ده دمىخمش،¹² فس اكو دوق بيمبغ
کات اورغ فلسطين نق ماري سرغ کيت دکيلکل اين، بلوم فد
کيت بوات قربان مينتا فرتولوغن دغن توهن. سبب توله
اکو ترفقسا کنا بوات سنديري قربان^۲ هق باکر هابيس
انتوق توهن.

13 تافي سموئيل کات: هق مو بوات ايت بودوه سوغکوه.
مو تا جاک حکوم هق توهن مو، ربي اتس سموا.
توجوان توهن نق بري مو دغن کتورونن مو دوق مريسته
اتس اورغ اسرائيل سلام^۲.¹⁴ تافي لاني فرينتهن مو نق
کنا فوتوس ده. سبب ايت توهن نق فيليه سئورغ لاکي
کنتي مو، اورغ هق دي برکنن، فس اورغ ايت توهن نق
لتق جادي راج اتس اورغ^۲ هق جادي ميليقي دي، کران مو
تأبوات توروت هق توهن سوروه ايت.

15 لفس ايت سموئيل تيغکل دکيلکل کي کو لاین. ساول
فون باوا عسکر^۲ هق دوق دغن دي لاکي کي کا کيبياه
دالم نکري هق فواق بينجامين. تکه ايت، دي بيلغ عسکر^۲
هق دوق سکالي دغن دي، فس اد انم راتوس اورغ ساج.
¹⁶ لفس ايت ساول دغن انق دي يوناتن دوق برخيمه دکيبا.
تافي اورغ فلسطين دوق برخيمه دمىخمش لاکي.

17 اورغ فلسطين اد عسکر تيک فواق هق توبيت کي
سعمور^۲، انتوق نق رمفس بارغ^۲ اورغ اسرائيل. اد
سفواق هق توبيت کي کو کمفوغ اوفرا دکليواسن شوال.
¹⁸ سفواق لاکي توجو کي کو بيت هورون، فس هق
کتیک ايت برجالن کي کو بوکيت^۲ دتفي نکري دکت
دغن فادغ زبوئيم.

19 فد ماس ايت، تاءاد سئورغ هابوق جادي توکغ بسي
 دالم نكري اسرائيل، کران اورغ فلسطينا تائبري علمو کا
 اورغ عبراني چارا حال بوات الة اف ۲ دغن بسي، کران
 تاکوت اورغ عبراني نق فندي بوات سنجات انتوق ديري
 دي. ²⁰ فس اورغ اسرائيل کنا کي برهوبوغ دغن اورغ
 فلسطينا سعمور، کالو نق بائیکي اتوا اسه فرکاکس هق
 بوات دغن بسي، سروف مات بکالا، فنولق، چق، کافق اتو
 سادف فون، ²¹ دي کنا اوفه دويت دوا کفيغ انتوق اسه
 مات بکالا اتوا چق، فس سکفيغ انتوق کافق اتوا سرافغ.
²² بيلا سمفي فرياغ نق بوات فرغ، اورغ اسرائيل تاءاد
 سئورغ هابوق هق فاکي سنجات بوات دغن بسي، ملينکن
 راج سؤول دغن انق دي يوناتن.

23 فد ماس ايت جوک، اورغ فلسطينا سوروه عسکر سفواق
 لاکي کي جاک دساتو جالن هق بوليه مپليت دچله بوکيت
 انتوق اورغ هق توبيت ماسوق دميخمش.

باب 14

يوناتن کي بونوه اورغ فلسطينا

1 فد ساتو هاري، يوناتن انق سؤول دوق کيچيق دغن
 اورغ مودا هق دوق باوا سنجات دي سعمور، کات:
 ماريله کيت کي کا تمفت عسکر فلسطينا دوق جاک باليق سان
 بوکيت ايت. تافي دي تائبري تاهو کا ايه دي دولو.

2 تکه ايت راج سؤول دوق برخيمه دباوه فوهون کايو
 بسر دمیکرون، دکت دغن کمفوغ کيبياه، فس فواق هق انم
 راتوس اورغ ايت دوق سکالي دغن دي. ³ امام هق فاکي
 ايفود ايت دوق سکالي دغن راج جوک. نام دي اهيجا،

اهيجا، ايه دي نام اهيتوب، اديق هق ايكابود. كدوا ايت جادي انق امام فينيهس، توؤ دي نام عيلي، امام بسر هق كرج كا توهن دشيلاه دولو. فس فواق راج ساول ايت تاهو كات يوناتن كي كمان.

5-4 بيلا يوناتن نق كي كا خيمه اورغ فلسطين، دي كنا لالو كوؤ جالن مپليت دچله بوكيت. اورغ هق ماري دكيبياه نق كي باليق سان، كنا لڱكه نائيك كوؤ باتو ستوڱكول. باتو ايت اورغ لتق نام «باتو بوزيز». فس بيلا لفس جالن هق مپليت ايت، اد باتو بسر سا لاكي هق كنا لڱكه تورون، بارو سمفي كا ميخمش. باتو ايت فول اورغ لتق نام «باتو سيني».

6 يوناتن كات كا انق تاغن هق باوا سنجات دي: ماريله كيت لڱكه بوكيت كي كا تمفت اورغ كفور ايت. هارف توهن نق تولوغ كيت. كران تاءاد سياف بوليه تاهن توهن تاءبري برجايا، تاءكيرا دغن دوا تيك اورغ اتوا دغن اورغ رامي.⁷ انق تاغن دي فون كات: بواتله هق مان توان نق، امب ستوجو نق دوق سڪالي دغن توان سعمور.

8 يوناتن كات: تيغوقله، كيت نق لڱكه نائيك كا تمفت اورغ ايت بري دي تيغوق كيت دولو.⁹ كالو دي كات: ننتيله دسيتو، اكو نق تورون كي كا تمفت مو، كيت كنا دوق ديام دسيتو تاء نائيك كي بوات اف كا دي.¹⁰ تافي كالو دي كات: ماريله نائيك كا تمفت كيت، كيت فون كنا نائيك سرغ سلالو، كران هق ايت جادي تندا كات توهن نق بري فواق ايت جاتوه كا تاغن كيت.

11 دوا اورغ ايت فون كي تنجوق دير دي كا اورغ فلسطين دتمفت دوق برجاك. فس اورغ فلسطين كات:

تيثوقله، اورغ عبراني توبيت ده دالم لوبغ ۲ هق دي دوق منوسوف ايت. ¹² لفس ايت دي فغكيل كا يوناتن دغن انق تاغن يوناتن كات: ماريله نأيك كا تمفت اين، كيت اد هق نق تنجوق كا مو. يوناتن كات كا انق تاغن دي: ماري كيت كي سلالو. توهن نق بري دي جاتوه كا تاغن كيت اورغ اسرائيل اين.

13 يوناتن فون مفاكق نأيك كوء باتو بسر ايت سكالې دغن انق تاغن دوق توروت بلاكغ دي. دي فون تركم اورغ فلسطينا بري ربه، فس انق تاغن دي ماري بونوه سلالو. ¹⁴ دالم فرلاوانن هق مولا ۲ ايت، يوناتن دغن انق تاغن دي بوليه بونوه لبه كورغ دوا فولوه اورغ دالم كليواسن هق سمفيت ايت.

15 بيلا دغر خبر ايت، اورغ فلسطينا سموا هق دوق دخيمه بسر اتو. ددارت ۲، هق توبيت كي رمفس بارغ ۲ اورغ اتو هق دوق جاك دتمفت ۲ كچيك، سموا ايت براس تاكوت دغن كتر كنالېغ. فس بيلا جادي تانه بركوچق كاتيغ، اورغ فلسطينا كهوور تاكوت لاكي سمفي هابيس فيكران.

اورغ فلسطينا كنا هاله

16 اورغ ۲ هق راج ساول فون دوق جاك دبوكت كيبياه دالم نكري بينجامين، فس دوق فرهاتي تيغوق كا اورغ فلسطينا ماس ايت، نمفق كادوه برجالن كي ماري. ¹⁷ راج ساول فون سوروه اورغ كات: بيلغ اورغ دالم فواق كيت، سيف هق تاءاد! فس اورغ ايت نمفق كات يوناتن دغن انق تاغن ديهاله هق تاءاد دسيتو.

18 فس سائول سوروه امام اهيجا، کات: کيله امبيق فتي
فرجنجين هق توهن باوا ماري سيني. فد ماس ايت اورغ
اسرائيل بياس باوا فتي فرجنجين کي سکالي دغن عسکر ۲
اسرائيل. ۱۹ تغه ۲ راج دوق کيرا دغن امام، بوپي سوارا
کهور ۲ درس لاکي دخيمه اورغ فلسٽيا. فس راج کات کا
امام: برادو دولو، تاسه بوات اف لاکي.

20 فس راج سائول باوا سموا عسکر دي توبيت کي سلالو،
نق برلاون دغن اورغ فلسٽيا. بيلا سمفي دسيٽو، نمفق
اورغ فلسٽيا دوق سليرق هابيس سمفي کا بونوه سام
سنديري. ۲۱ اد اورغ عبراني هق دوق سکالي دغن اورغ
فلسٽيا دالم خيمه دي ايت، فس لاني فواق ايت توبيت
ماري دوق سبله راج سائول دغن يوناتن فول. ۲۲ اد جوک
اورغ ۲ اسرائيل هق دوق منوسوف دالم بوکيت دکليواسن
ايفرائيم ايت. بيلا دغر کات اورغ فلسٽيا تغه دوق لاري،
فواق دي فون ماسوق ماري نق لاون، فس دوق تولوغ
همبت اورغ فلسٽيا کي. ۲۳ فرلاوانن ايت ملارت کي سمفي
باليق سان بيت هاوين. بالس توله توهن بري سلامت کا
اورغ اسرائيل ماس ايت.

کجادين ماس دوق فرغ ايت

24 عسکر ۲ اسرائيل دوق دغن سوسه سوغکوه هاري ايت،
کران راج سائول لارغ دي دغن سومفه کات: اورغ مان ۲
هق ماکن اتوا مينوم فون، بلوم فد اکو بوليه بالس کا
سترو ۲ کو، اورغ ايت نق کنا سومفه. سابيت ايت، عسکر ۲
تاماکن اف سکارا فد هاري ايت. ۲۵ جادي، سموا اورغ
کنا برجالن لالو کي کو هوتن دتمفت اد مادو ۲ دوق

برسارغ. فس منيسن مادو ايت فنوه منيليه توبيت برتيتيق^۲ سمفي كا تانه. ²⁶ عسکر ۲ هق لالو کي ايت فون، نمفق منيسن مادو هق دوق برتيتيق تورون ايت، تافي تاءاد سئورغ هق براني کي امبيق سيکيت بوه دمولوت، کران تاکوت کا سومفاهن راج.

27 تافي يوناتن تاءاهو لاکي کات ايه دي لارغ سموا اورغ تاءبري ماکن اف۲. دي فون هولور توغکت چوچه دالم سارغ مادو امبيق ماري کچف سيکيت. مات دي فون براس سکر سلالو. ²⁸ فس اد عسکر سئورغ ماري رويت کا دي کات: ايه توان برسومفه ده اتس سموا اورغ، کات اورغ مان هق ماکن اف۲ هاري اين نق کنا سومفه. سبب ايت، کيت سموا براس نق جادي فيتم. ²⁹ يوناتن کات: هق ايه کو بوات کا اورغ کيت هاري اين تروق ساغت. تيغوقله، اکو براس سکر مات کران ماکن منيسن مادو سيکيت. ³⁰ کالو عسکر ۲ کيت بوليه ماکن بارغ هق دي تمو دتمفت سترو ۲ کيت هاري اين، تنتو دي بوليه بونوه اورغ فلستيا کهور ۲ بابق لاکي.

31-32 اورغ اسرائيل فون دوق همبت بونوه اورغ ۲ فلستيا، امبيق دميخمش کي سمفي کا عيجالون، فس سموا اورغ ايت لتيه دغن هابيس ريغ. بيلا دي تمو کمبيغ بيریغ دغن لمبو ۲ هق سترو دي، دي فون سمبله سلالو، فس ماکن منته ۲ دغن تاءباسوه بري توبيت داره دولو.

33 اورغ کي رويت کا راج سائل کات: يا توانکو، اورغ ساله کا حکوم توهن دغن ماکن داکيغ هق تاءاد باسوه بري

توبيت داره. راج کات: اوه، مو بوات درهاک سوځکوه!
 کيله امبيق باتو بسر ماري لتق دسيني،³⁴ لفس ايت سوروه
 سمو اورغ باوا^۱ بناتغ دي ماري سمبله اتس باتو اين، بارو
 بوليه کي ماکن. جاغلنه بوات دوسا دغن ماکن داکيغ هق
 تائباسوه توبيت داره سروف ايت! مالم ايت سمو اورغ
 باوا^۲ لمبو^۲ دي ماري سمبله دسيتو.³⁵ راج ساول فون
 سوروه اورغ سوسون باتو^۲ بوات تمفت قربان کا توهن.
 جادي کالي يغ فرتام هق راج ساول بوات تمفت قربان
 انتوق توهن بالس ايت.

36 لفس ايت راج ساول کات کا عسکر^۲ دي: ماريله کيت
 کي سرغ اورغ فلستيا سلالو مالم اين. کيت بوليه رمفس
 بارغ^۲ دي سمفي چره، فس بونوه دي تائبري تيفکل سئورغ
 هابوق. عسکر^۲ فون جواب: بواتله ايکوت کهندق توانکو.
 تافي امام دي کات: بائیک کيت مينتائ دغن توهن دولو.
 37 ساول فون مينتائ دغن توهن، کات: کيت کنا کي سرغ
 اورغ فلستيا کا دق؟ فس، کيت نق منغ اتس دي کا دق؟
 تافي توهن تائجواب اف هاري ايت.

38 راج ساول فون سوروه فواق کتوا^۲ ماري برهيمفون،
 کات: کيت نق تاهو سياف هق بوات دوسا هاري اين؟
 39 اکو برسومفه اتس نام توهن يغ مهايدوف هق بياس
 بري اورغ اسرئيل کيت برجاي، کات اکو نق جاتوه حکوم
 بونوه اتس اورغ هق بوات ساله ايت، تائکيرا يوناتن انق کو
 سنديري. تافي سمو اورغ دوق ديام تائکات اف سکارا.

40 فس ايت ساول کات کا فواق کتوا^۲ ايت: اکو نق
 بهاکي سمو اورغ جادي دوا فواق. اکو دغن انق کو يوناتن

نق دوق سبله اين، فس فواق مو سموا كنا دوق سبله ايت. سموا اورغ كات: بائيك، بواتله ايكوت كهندق توانكو.

41 لفس ايت سائل بردها كات: يا ربّي هق دوق اتس سموا، توهن اورغ اسرائيل كيت، سبب اف توهن تائبري تاهو اف سكارا كا فواق اكو؟ كالو اكو اتوا انق كو يوناتن اين هق ساله، مينتالّه بري توهن تنجوق كو جالن «اوريم»، تافي كالو فواق ايت هق ساله، مينتالّه بري توهن تنجوق دغن «توميم». فس كنا كا سائل دغن يوناتن، سبله فواق كتوا ايت، دق! ⁴² فس سائل سوروه اورغ بوات سكالې لاكي نق تنجوق كات دي اتوا يوناتن هق ساله، فس كنا كا يوناتن.

43 سائل فون تاڻ يوناتن: مو بوات ساله اف؟ يوناتن فون جواب كات: امب ماكن منيسن مادو سيكيت، هق چوچه دغن توغكت كو. امب دوق اد ده دسيني، حكومله امب بري ماتي. ⁴⁴ سائل كات: كالو اكو تاءحكوم مو مينتالّه بري توهن امبيق پاوا كو سلالو.

45 تافي سموا اورغ فاكت كات كا سائل: سوغ فاتوت كه نق جاتوه حكوم اتس يوناتن، هق بري سموا فواق اسرائيل كيت بوليه منع اين؟ دق! تالّيه بوات بالس ايت. كيت برسومفه اتس نام توهن يغ مهايدوف ايت، كات كيت تائبري توانكو بوات اف كا دي، ولو نق چابوت سئورت رنبوت هق يوناتن فون، كران توهنله هق بري دي بوليه منع هاري اين! بالس توله اورغ رامي بري يوناتن سلامت فد حكوم بونوه. ⁴⁶ لفس ايت راج سائل برادو فد سرغ اورغ فلستيا، بري سموا ايت كليق كا نكري دي سمولا.

فرينتاھن راج سائول دغن ڪلوارڪ دي

47 دالم ماس سائول دوق مريٽه جادي راج اتس اورغ اسرائيل، دي دوق بوات فرغ سعمور دغن سترو ۲ هق دوق ڪليلغ نڪري دي، سروف فواق موءاب، فواق امون، فواق ايدوم، فواق راج ۲ هق ماري دزوبا، فس دغن اورغ فلسطينا جوڪ. دمان دي بوات فرغ دغن فواق ۲ ايت فون، فواق دي بوليه منغ سعمور.⁴⁸ دي ڪي برلاون دغن تائاکوت ڪا سياف. اورغ عماليڪ فون هاله ڪا دي جوڪ، سهيغڪ اورغ اسرائيل سموا بوليه دوق سنغ، تاءاد سياف براني ماسوق رمفس بارغ ۲ دالم نڪري دي.

49 راج سائول اد انق ليم اورغ، جنتن تيڪ بتينا دوا. هق جنتن نام يوناتن، ايشوي دغن مليڪي شوا، فس هق بتينا نام ميراب دغن ميخل.⁵⁰ بيني سائول، نام اهيٺوام انق اهيٺماز. فس ڪفلا عسڪر هق راج نام ابير انق نير. دي جادي فق سودارا سائول.⁵¹ ڪيش ايه هق سائول دغن نير ايه هق ابير جادي دوا براديق. ڪدوا ايت جادي انق هق ابيعل.

52 راج سائول تاءبرادو فد بوات فرغ دغن اورغ فلسطينا سعمور هيڊوف. فس افبيلا دي تمو دغن اورغ مودا هق ڪاڪه دغن براني، دي اجق ماسوق جادي عسڪر دي سلالو.

باب 15

چارا حال بوات فرغ دغن اورغ عماليڪ

1 سموئيل ڪي رويت ڪا راج سائول ڪات: توهن له هق هنتر امب ماري چواه ميپق لتق توانڪو جادي راج. فس لاني توهن اد هق نق رويت بري دغر ڪا توانڪو.

- 2 اينيله فركتان توهن، ربي هق يڄ مها کواس:
- اكو نق جاتوه حکوم اتس اورغ عماليك، کران دي
دوق برلاون دغن اورغ اسرائيل تڄه دوق برجالن
ماري دنکري مصير ماس دولو.
- 3 لاني مو کنا کيله بونوه اورغ ۲ عماليك ايت، فس
سموا هق جادي ميليقي دي مو کنا بوات بري بناس
هابيس. بونوهله سموا اورغ، جنتن بتينا، بودق ۲
سمفي کا بودق ۲ هق بارو برانق، فس بناتڄ ۲ دي،
لمبو، کمبيڄ بيریڄ، اونتا دغن هيمر، سموا ايت
مو کنا بري بناس هابيس.
- 4 راج ساول فون سوروه عسکر ۲ دي ماري برهيمفون
دموقيم تلائيم. عسکر ۲ سموا ايت اد دوا راتوس ريبو
اورغ، فس اد لاکي عسکر ۲ هق ماري دنکري يهودا سڦولوه
ريبو اورغ. ۵ راج ساول باوا فواق دي کي منوسوف دساتو
تمفت دڄله ۲ بوکيت دکت دغن کوت اورغ عماليك.
- 6 دي فون سوروه اورغ کي رويت کا اورغ بڄسا کيني هق
دوق دالم نکري عماليك، نق بري دي لاري توبيت دولو،
سبب دي تأسير بري بناس کا فواق ايت سکالي دغن اورغ
عماليك. فسنن راج ساول کا دي: مو توبيتله دولو، کران
فواق ايت بياس بوات بائیک کا اورغ اسرائيل دغن تنجوق
کسياڄ بلس، تکه اورغ اسرائيل توبيت ماري دنکري مصير
دولو. اورغ کيني فون توبيت کي فد نکري اورغ عماليك
سلالو. ۷ لفس ايت راج ساول کي سرغ نکري عماليك بري
هاله کا دي، امبيق دکليواسن هاويله سمفي کا کليواسن
شور هق دوق سبله تنائیک دغن نکري مصير.

8 اورغ ۲ عماليڪ ايت، راج ساءول بونوه بري هابيس،
 ملينڪن راج دي اڪاڻ هق ساءول ايڪت ماري تاءونوه لاکي.
 9 بناتغ هق موليق سروف ڪمبيغ بيريج دغن لمبو ۲ هق اد
 انق ده، سڪالي دغن بارغ ۲ اورغ عماليڪ، دي تاءسير بوات
 خيانه. بارغ ۲ هق تاءترفاڪي ساج، هق دي سوروه بوات
 خيانه.

توهن تيغڪل ساءول تاءفادول ڪا دي ده

10 فس توهن تورو فرڪتائ دي ڪا سموئيل بالس اين:
 11 اڪو براس سسل هق اڪو بئر بري ساءول جادي راج،
 دي فاليغ تيغڪل اڪو، فس دي تاءتوروت فسنن ڪو.
 بيلا سموئيل دغر حال ايت، دي براس موريه، فس دي
 دوق مينتاء دعا دغن توهن سفنجغ مالم. ¹² ايسوق فاڪي دي
 توبيت ڪي چاري راج ساءول، تافي اورغ رويت ڪا دي ڪات
 راج ڪي ده ڪا بوڪيت ڪرميل نق بوات تمفت فرايغائن انتوق
 دير دي سنديري. فس لاني دي دوق برجالن ڪي ڪا
 ڪيلڪل فول.

13 بيلا دوا اورغ ايت برتمو ده، راج ساءول توبيت ماري
 تڪور سموئيل، ڪات: مينتاءله توهن تورو رحمة اتس توان
 اين. امب بوات توروت ده سموا فرڪارا هق توهن سوروه.
 14 سموئيل ڪات ڪا دي: ڪالو ڪيتو، سبب اف لاني سوارا
 ڪمبيغ بيريج دغن لمبو ۲ دوق ماسوق تليغا اڪو؟

15 ساءول ڪات: اوه، فواق توله هق باوا بناتغ ۲ ڪليق
 دتمفت اورغ عماليڪ. دي فيليه تاروه هق مان موليق انتوق
 بوات قربان ڪا توهن مو، ربي هق دوق اتس سموا.
 تافي هق لائين سموا، ڪيت بري بناس هابيس.

16 سموئيل کات: ننٽي دغر هق مان توهن رويت بري تاهو
کا اکو سمالم. راج ساول کات: رويتله. ¹⁷ سموئيل فون
رويت بالس اين: ايغٽله، دولو مو سنديري کات مو
تاجادي اف. لفس ايت مو بوليه جادي کتوا اتس سموا
اورغ اسرائيل، کران توهن له هق لتق مو بري جادي راج.

18 فس توهن سوروه مو کي بوات ساتو کرج انتوق دي،
دغن بري بناس کا اورغ عماليڪ، بغسا هق جاهت ايت.
توهن سوروه مو بوات فرغ سمفي بري همفوس هابيس
سموا اورغ ايت. ¹⁹ سبب اف مو تاطاعة کا توهن، تافي مو
کادوه کي رمفس بارغ ۲ دي؟ توهن تابرکنن سوغکوه هق
مو بوات ايت.

20 ساول فون کات: تافي اکو بوات توروٽ سوروهن
توهن ده. اکو کي بوات کرج هق توهن سوروه. اکو بري
بناس هابيس بغسا عماليڪ، فس باوا کليق اکاڪ راج
عماليڪ ماري دسيني. ²¹ تافي دالم سموا هق کنا بري بناس
ايت، عسکر ۲ امبيق بناتغ هق موليق باوا ماري کا کيلکل
اين اتوق بوات قربان کا توهن مو ربي اتس سموا.

22 تافي سموئيل کات:

هق مان توهن برکنن لبيه؟ کي بوات قربان هق باکر
هابيس انتوق دي، اتو بوات توروٽ سوروهن دي؟
تنتو، طاعة کا توهن موليق لاڪي فد بوات قربان،
فس دوق فادول کا دي، هق ايت لبيه فد باکر لمق ۲
هق بيريج جنتن اتس تمفت قربان ايت.

23 کران بوات لڱکه حکوم ۲ توهن ايت دوسا بسر سروف
توروٽ بومور منيغوق، فس هاتي تکبور ايت

دوسا بسر جوڪ سروف فوجا برهالا. سابيت مو
تاءُ فادول كا سوروهن توهن سبب توله توهن تاءُ سير
فادول كا مو فس دي تاءُ بري مو جادي راج ده.

24 بيلا دغر بالس ايت ساءول فون كات: سوغڪوه اكو
بردوسا. اكو لغڪر ده سوروهن توهن، فس تاءُ تورت فسنن
مو جوڪ. اكو بوات بالس ايت ڪران تاڪوت كا عسڪر ۲ ڪو،
فس بوات تورت دي.²⁵ سبب ايت اكو مينتاءُ معاف.
امفونله دوسا اكو. فس ڪيله برجالن سڪالي دغن اكو انتوق
سمبه كا توهن دڪيلڪل.

26 تافي سموئيل كات: اكو تاءُ سير ڪي ڪمان ده دغن مو.
ڪران مو تاءُ فادول كا سوروهن توهن، فس توهن فون تاءُ سير
فادول ده كا مو. دي تاءُ بري مو جادي راج ده.²⁷ لفس ايت
سموئيل فاليغ نق ڪي، تافي ساءول فڪغ باجو جوبه دي
هيريٽ بري چاريق.

28 سموئيل كات كا دي سلالو: بالس نيله توهن سوده
هيريٽ ڪواس جادي راج اتس اورغ اسرائيل ايت بري
لوچوت دتاغن مو هاري اين. ڪواس ايت توهن نق بري كا
اورغ لائين هق فراغي موليق فد مو.²⁹ توهن يغ مها مليا
هق اورغ اسرائيل، دي تاءُ بوهو غ اتوا توڪر هاتي، دي بوڪن
مائسي هق بياس توڪر هاتي سعمور.

30 ساءول فون كات: اكو بردوسا ده، تافي جاغن بري اكو
مالو دافن ڪتوا ۲ اورغ اسرائيل. ماريله ڪيت ڪي سڪالي
سمفي كا ڪيلڪل، فس اكو نق سمبه كا ربي اتس سموا،
توهن مو دسيتو.³¹ سموئيل فون فاليغ ڪي كا ڪيلڪل سڪالي
دغن ساءول. فس ساءول دوق سمبه كا توهن دسيتو.

32 لفس ايت سموئيل کات: راج اورغ عماليك هق نام اکاڙڪ ايت، باوا له ماري دسيني. راج اکاڙڪ فون برجالن ماسوق کهور ۲. دي براس تاکوت کران دوق ايغت کا کسيقساڻ ماتي. 33 سموئيل فون کات کا دي: فدغ مو بياس بونوه بري ماتي انق ۲ اورغ بتينا باپق اورغ. لاني، امق مو فون نق هيلغ انق دي سروف ايت جوک. سود کيچيق، سموئيل فون چابوت فدغ تاکير اکاڙڪ سمفي ماتي، فس چينچغ مایت بري هنچور دافن تمفت قربان هق توهن دکيلکل.

34 لفس ايت سموئيل کليق کا تمفت دي درامه، فس راج ساول فون کليق کا تمفت دي دکيبياه. 35 جق دماس ايت سموئيل تائمومو موک دغن ساول ده سمفي دي هابيس عمور، تافي دي دوق دغن سوسه هاتي سعمور سابيت دوق ايغت کا ساول. فس توهن فون براس سسل کران دي بئر بري ساول جادي راج اتس اورغ اسرائيل.

باب 16

توهن فيليه سئورغ لاگي نق بري جادي راج

1 لفس فد ايت توهن کات کا سموئيل: لام مان لاگي مو نق دوق سوسه هاتي اتس ساول، کران اکو چابوت دي ده تائبري جادي راج اتس اورغ اسرائيل؟ امبيقله ميپق زيتون بوبوه دالم بکس هق بوات دغن تندوق، فس کيله کا رومه جسي دکمفوغ بيت لاهيم، کران اکو فيليه ده سئورغ دالم انق ۲ دي نق بري جادي راج هق اکو برکنن.

2 سموئيل کات: يا توهن کو، بوليه که اکو کي بوات بالس ايت؟ کالو راج ساول دغر حال اين، تنتو دي نق

بونوه اكو. توهن فون كات: امبيقله لمبو بتينا هق مودا
 باوا^۱ ڪي سڪالي، فس رويت ڪا اورغ دڪمفوغ ايت ڪات:
 اكو نق سمبليه لمبو اين بوات قربان ڪا توهن دسيني.^۳ مو
 ڪنا فغڪيل جسي ڪي ڪا تمفت قربان جوڪ. لفس ايت اكو
 نق رويت لاڪي هق مان مو ڪنا بوات. سبب اكو نق بري مو
 چواه ميپق اتس ڪفلا ساتو اورغ هق اكو نق بري جادي راج.
 فد ماس ايت اكو نق بري تاهو نام دي.

4 سموئيل فون بوات ايڪوت هق توهن سوروه. دي ڪي
 ڪا ڪمفوغ بيت لاهيم، فس ڪتوا^۲ دسيٽو توبيت ماري
 سمبوت دي دغن ڪتر ڪناليغ ڪات: توان ماري اين نق
 اوچف سلامت اتس ڪمفوغ اين ڪه؟^۵ سموئيل جواب ڪات:
 نق اوچف سلامت. اكو ماري نق بوات قربان ڪا توهن
 دسيني. فواق مو ڪنا بري چوچي ڊيري دولو، فس ماري
 بوات قربان سڪالي دغن اكو. لفس ايت سموئيل ڪي سوروه
 جسي دغن انق^۲ دي بوات سروف ايت جوڪ.

6 بيلا جسي سمفي ڪا تمفت قربان سڪالي دغن انق^۲ دي،
 سموئيل فون تيغوق ڪا انق سولوغ جسي هق نام ايلياب.
 دي فيڪر ڪات: تنتوله اورغ اين هق توهن نق سوروه چواه
 ميپق.^۷ تافي توهن ڪات ڪا سموئيل:

مو تاءه تيغوق ڪا اورغ ايت ڪات توبوه موليڪ موڪ
 چوميل، ڪران اكو تائفيليه دي. اكو هق جادي ربي
 اتس سموا اين تاءڪيرا سروف هق مائسي ڪيرا.
 مائسي دوق تيغوق ڪا روف ساج، تافي اكو دوق
 تيغوق ڪا هاتي.

8 لفس ايت جسي سوروه انق دي نام اينادب ماري دوق
 دائفن سموئيل، تافي سموئيل ڪات: دق! بوڪن اورغ اين

هق توهن فيليه. ⁹ فس جسي سوروه انق دي نام شامه ماسوق فول، تافي سموئيل كات: دق! بوكن اورغ اين لاكي. ¹⁰ بالس ايت له جسي بري انق ² دي ماسوق دافن سموئيل سمفي توجهه اورغ. تافي سموئيل كات: دق! اورغ هق توهن فيليه تاءاد دالم فواق اين.

11 لفس ايت سموئيل تاڻ جسي كات: سموا انق مو ماري بلاك ده كه؟ جسي جواب: اد سئورغ لاكي هق بوغسو، نام دائود. دي دوق فيرا كمبيغ بيريج دبندغ. سموئيل كات: سوروه اورغ كي توروبت دي ماري سلالو، سبب كيت تاليه ماسوق ماكن اف ² سبلوم دي ماري. ¹² جسي فون سوروه اورغ كي توروبت انق بوغسو. بيلا دي ماري سمفي ده، نمفق كات دي اورغ جاعق، توبوه موليقي دغن مات جرنه. فس توهن كات كا سموئيل: جيلا اورغ اين. كيله چواه ميپق اتس كفلا دي.

13 سموئيل فون امبيق تندوق هق بوبوه ميپق، كي چواه اتس كفلا بودق ايت دافن كاكق ² دي سموا. جق دهاري ايت، توهن توروبت روح دي اتس دائود دغن كواس فنوه. لفس ايت سموئيل كليق كا تمفت دي دكمفوغ رame.

كواس روح توهن تاءدوق ده دغن ساءول

14 لفس فد ايت كواس روح توهن تاءدوق ده دغن ساءول، فس توهن بنر بري كواس ² هق جاهت ماري اوسيق ساءول. ¹⁵ اورغ ² دالم رومه ساءول فون كات كا دي: نمفق سروف اد كواس جاهت هق توهن بنر بري ماري اوسيق توانكو بري سوسه هاتي بالس اين. ¹⁶ ميتتاله توانكو سوروه همب ² اين

کي چاري اورغ هق فندي مائين کمبوس، بري ماري دوق سيني. فس بيلا کواس ايت ماري اوسيق توانکو، دي بوليہ مائين کمبوس دافن توانکو بري هيلغ سوسه هاتي.

17 سائل فون کات کا همب دي: کيله چاري اورغ سروف ايت انتوق اکو، فس باوا دي ماري دسيني.¹⁸ اد اورغ مودا دالم فواق راج ايت هق کات: يا توانکو، امب بياس تمو اورغ هق فندي مائين کمبوس. دي جادي انق جسي دکمفوغ بيت لاهيم. دي اورغ براني هق فندي بوات فرغ فس کيچيفن دي اد ايسي. دي اورغ توبوه موليق، فس توهن دوق سکالي دغن دي سعمور.

19 سابيت ايت، راج سائل سوروه اورغ کي کا رومه جسي، کات: انق مو دائود هق دوق فيرا کمبيغ بيريج ايت، راج سوروه کي کا رومه دي.²⁰ جسي فون امبيق روتي، کمبيغ مودا سئیکور دغن اير بواه زبيت دالم بکس کوليت، کي موات اتس هيمر، فس سوروه انق دي دائود ايت باوا کي کا رومه راج سائل.

21 بيلا سمفي دکوت راج، دائود ماسوق مغهادهف سائل سلالو، فس راج بري کرج کا دي. راج برکنن سوغکوه کا دائود، بري دي جاک سموا فرکاکس² فرغ هق راج سنديري.²² فس راج هنتر خبر کليق کا جسي کات: اکو برکنن کا دائود، بنرله بري دي دوق کرج کا اکو سعمور.

23 فس بيلا کواس جاهت هق توهن بنر بري ماري ايت دوق اوسيق سائل، دائود فون امبيق کمبوس دي مائين، فس سائل براس سنغ دغن سکر هاتي سلالو، کران کواس هق بري بوسن ايت تيغکل دي کي.

باب 17

کوليات توبيت ماري دافن عسکر ۲ اسرائيل

(کوليات اين ستغه اورغ فغکيل دي «جالوت»)

1 فد ماس ايت، اورغ فلسطين سوروه عسکر ۲ دي سمو ماري برهيمفون ۱ ساتو تمفت انتوق نق برفرغ، تمفت ايت نام سوکوه دنکري يهودا. دي دوق برخيمه دتغه سوکوه دغن اسکه، دتمفت نام ايفيس داميم. ² راج ساول فون سوروه عسکر ۲ اسرائيل ماري برهيمفون سروف ايت جوک. فواق دي دوق برخيمه دتغي چله هق بوکيت عيله، فس دي ننتي نق برلاون دغن عسکر ۲ فلسطين دسيتو. ³ فواق فلسطين فون دوق دکاکی بوکيت باليق ايت، فواق اسرائيل دوق دکاکی بوکيت باليق اين، فس دتغه ايت جادي فادغ.

4 اد سئورغ عسکر هق مشهور سکالي دالم فواق فلسطين، نام دي کوليات، هق ماري دکوت کت. توبوه دي بسر، تيغکي تیک میت. ⁵ دي فاکی توفي هق بوات دغن تمباک. باجو فون تمباک جوک، هق برت لیم فولوه کیلو لبیه. ⁶ فس دکاکی دي تيفيق دغن تمباک جوک سمفي کا لوتوت. لمبيغ دي اد دوا فونتوغ، اد هق هالوس سا، بوات دغن تمباک هق سلیت دباليق بلاکغ. ⁷ فس سا لاکی دوق دتاغن دي، هق مات بسی، برت توجوه کیلو. هولو دي سروف تياغ لایر. فس اد عسکر سئورغ لاکی دوق فکغ فنفیس دافن دي.

8 کوليات اين توبيت ماري دافن سمو اورغ، فس دي فغکيل کا فواق اسرائيل هق دوق برباريس باليق سان، کات: باءاف فواق مو توبيت ماري دوق برباريس سروف

اورغ نق بوات فرغ؟ اكو اين اورغ فلسطينا بوكن؟ فس فواق مو سموا عسكرا ۲ هق ساءول. فيليه سئورغ دالم فواق مو بري دي ماري برلاون دغن اكو دسيني. ۹ كالو دي بوليه بونوه اكو، فواق اكو نق جادي همب مو، تافي كالو اكو منغ، فس بونوه دي، فواق مو فون كنا جادي همب كا فواق اكو.

10 بالس توله كوليات دوق كيچيق بسر دافن سموا فواق اسرائيل كات: بريله سئورغ دالم فواق مو ماري، فس كيت بوليه برلاون هاري اين. ۱۱ راج ساءول سكالې دغن سموا فواق دي فون دوق دغر فركتان كوليات ايت، فس فواق دي براس لمه سماغت دغن تاكوت ساغت.

چارا حال ايه داءود دغن كلوارك دي

12 ايه داءود نام جسي هق فواق ايفرات، دوق دكمفوغ بيت لاهيم، دنكري اورغ يهودا. دي اد انق جنتن لافن اورغ، فس تکه ساءول نائيك جادي راج، جسي ايت توا ده. ۱۳ انق جسي هق کاکک تيک اورغ کي جادي عسکرا ۲ راج ساءول، فس لاني دي دوق بوات فرغ سكالې دغن راج. هق سولوغ نام دي ايلياب، هق کدوا نام ايينادب، هق کتيک فول نام شامه.

14 داءود جادي انق بوغسو، فس تکه کاکک ۲ دي دوق دغن راج ساءول، ۱۵ داءود بياس کي کا تمفت راج دوق برخيمه ايت، لفس ايت کليق فيرا کمبيغ بيريف هق ايه دي فول دبیت لاهيم. ۱۶ فد ماس ايت جوک، کوليات توبيت دافن فواق اسرائيل فغکيل ماري نق برلاون دغن دي، فاکي فتغ کنف ۲ هاري تاءرادو، سمفي امفت فولوه هاري.

دأود کي کا تمفت عسکر ۲ دوق برفرغ

17 جادي، جسي ايت کات کا انق دي دأود: مو کنا باوا^{۱۷} کي مکانن کا کاکق ۲ مو دتمفت فرغ، کندوم هق بوات مکانن کريغ سفلوه کيلو، روتي سفلوه توغکول.^{۱۸} فس امبيق منتیک کرس سفلوه توغکول انتوق کتوا عسکر اتس فواق دي. مو کيله سلالو، جسي کات، فس تيغوقله کاکق ۲ مو دوق بالس مان، فس باوا^{۱۹} کليق اف ۲ هق دي کيريم جادي تندا.

19 فد ماس ايت راج سائل دغن سمو اورغ دي دوق هادف کا عسکر ۲ فلستيا دفادغ عيله.^{۲۰} دأود فون باغون دينهاري، امبيق سمو بارغ ۲ ايت کي، ايکوت هق ايه دي سوروه. کمبيغ بيريج دي سمو، دي کيريم کا اورغ فيرا. بيلا سمفي دسان، دي نمفق عسکر ۲ تغه دوق ماسوق باريس نق برلاون، بلغ ۲ دوق برسورق دغن سوارا درس.^{۲۱} بالس توله فواق اسرائيل دغن فواق فلستيا کدوا ايت دوق دالم باريس دي ماسيغ ۲ ننتي نق بوات فرغ.

22 دأود فون کيريم بارغ ۲ ايت کا اورغ هق دوق جاگ بارغ باليق بلاکغ، لفس ايت هوغکل کي کا تمفت عسکر دوق برباريس، نق تمو دغن کاکق ۲ دي دسيتو.^{۲۳} تغه ۲ دي دوق کيچيق دغن کاکق دي، نمفق کوليات اورغ فلستيا هق مشهور ايت، توبيت ماري دافن سمو اورغ. فس دي دوق فغکيل کا فواق اسرائيل سروف سعمور. دأود فون دوق دغر فرکتان دي.^{۲۴} فس عسکر ۲ اسرائيل سمو ترهوندور لاري تاسير تمو دغن کوليات، کران تاکوت ساغت.

25 عسکر ۲ اسرائيل فون دوق کيچيق سام ۲ سنديري کات:

مو تيفوق کا دق اورغ هق توبيت ماري دافن سموا اورغ؟
 دغرله بالس مان دي کيچيق بسر کات دي نق لاوان دغن
 فواق اسرائيل کيت. اورغ مان هق بوليه بونوه کولييات،
 راج نق بري منيکاح دغن انق دي، فس نق بري هرت بايق،
 فس اديق براديق دي سکالي دغن ايه فون بوليه دوق بيبس
 سعمور، تا'کنا باير حصن مان ۲ دالم نکري اسرائيل اين.

26 دا'ود فون تان عسکر ۲ هق دوق دکت، کات: اورغ هق
 بوليه بونوه کولييات دغن هافوس کهينان هق لکت دنام
 اورغ اسرائيل کيت، اورغ ايت نق بوليه اف؟ سبب اف
 اورغ کفور اين براني نق لاوان دغن عسکر ۲ اسرائيل هق
 ماري دغن نام توهن يغ مهايدوف؟ ²⁷ عسکر ۲ ايت فون
 جواب کا دا'ود کات: بالس توله راج نق بري کا اورغ هق
 بونوه کولييات.

28 کاکق دا'ود هق نام ايلياب ايت، دغر هق مان اديق دي
 کات کا عسکر سائي، فس دي نائيک موريه کات: مو ماري
 با'اف کا تمفت اين؟ فس مو تيغکل کا سياف بيریغ ۲
 امفت ليم ايکور هق مو دوق فيرا دفادغ ايت؟ ها، اکو
 تاهو ده فراغي مو براغين تيغکي، فس هاتي مو تا'موليق.
 توجوان مو ماري دسيني نق تيفوق اورغ دوق فرغ ساج.
²⁹ دا'ود جواب کات: ساله کاف امب دوق تان اورغ؟
³⁰ فس دي فاليغ کا اورغ لائين فول تان لاكي حال ايت.
 اورغ دسيو فون جواب سروف سائي جوک.

31 اورغ هق دغر فرکتان دا'ود چارا حال کولييات ايت،
 بري سمفي کا راج ساول. فس راج سوروه اورغ باوا' دا'ود
 ماري کا تمفت دي. ³² دا'ود فون کات کا راج: يا توانکو،
 جاغن بري فواق توانکو هيلغ سماغت سابيت اورغ فلسيا.

همب توانكو نيله نق كي لاون دغن دي. ³³ راج ساءول
كات: ايه! مو تائليه كي لاون دغن اورغ ايت. مو اورغ
مودا لاكي، دي جادي عسكر برفولو ۲ تاهون ده.

34 تافي داءود كات: همب توانكو بياس دوق فيرا كمبيغ
بيريج انتوق ايه، فس افبلا سيغا اتوا برواغ ماري نق تركم
كمبيغ بيريج نق باوا كي، ³⁵ امب فون همبت كي بونوه،
فس هيريق انق بيريج كليق دمولوت دي. بيل دي فاليغ نق
كيكير، امب فكغ جبيغ دي بلغ ۲ كاتق بري ماتي. ³⁶ بالس
توله امب بياس بونوه بناتغ بيغكيغ سروف ايت، فس اورغ
كوفر اين فون، امب بوليه بري ماتي سروف ايت جوڪ،
كران دي براني نق لاون دغن عسكر ۲ هق ماري دغن نام
توهن يغ مهايدوف. ³⁷ دياه ربتي اتس سموا، هق بياس
بري امب سلامت فد كوڪو سيغا اتوا كوڪو برواغ ايت، فس
تنتوله دي نق بري امب سلامت دتاغن اورغ فلسطين ايت
جوڪ. راج ساءول فون كات: كالو كيتو مو كيله فس اكو
نق مينتا بري توهن دوق سڪالي.

38 لفس ايت راج ساءول بري كا داءود فكاين عسكر هق
دي سنديري. راج فون تولوغ بوبوه فكاين ايت كا داءود،
سروف توفي دغن باجو هق بوات دغن تمباڪ. ³⁹ فس داءود
بوبوه تالي كنديت دغن فدغ فنجغ هق راج. تافي بيل دي
چوب نق برجالن كي نمفق كات تائليه كران دي تائباس
فاكي فركاكس سروف ايت. دي فون كات كا راج: امب
تائليه كي دغن فكاين اين، تائباس دغن دي. ⁴⁰ لفس ايت
دءود بواغ سموا ايت امبيق توغكت دي ساج، توبيت كي.
تغه دي برجالن كي ايت، دي برادو دتفي چارق هق اد
دسيتو، كوتيف انق ۲ باتو ليم بوتير هق بولت، بوبوه دالم

جائيل دي. لفس ايت دي فکڻ توبير دتاڻن انتوق نق بوات
بيدس، بارو دي هادف کي کوؑ اورځ فلسٽيا ايت.

دائود منڻ لاون دڻن گوليات

41 گوليات فون دوق هادف ماري کوؑ دائود جوک، فس
عسکر هق فکڻ فنڦيس دي دوق برجالن ددافن. ⁴² بيلا
گوليات نمڦق دائود دي فون فندځ رنده کا دي کران دائود
بودق لاکي، چوميل، کوليت فون ليچين. ⁴³ دي کات: ها!
اکو اين انجيڻ که، مو ماري دڻن توڻکت ايت؟ فس دي
دوق سومڦه دائود دڻن سبوت نام ديوا ۲ دي. ⁴⁴ لفس ايت
دي فڻکيل کا دائود کات: ماريله دسيني. اکو نق امبيق مو
بري کا بوروځ ايريڻ دڻن بناڻځ دهوتن ماکن.

45 دائود کات کا گوليات:

مو ماري باوا فدځ دڻن لمبيڻ، تافي اکو ماري دڻن
نام ربي اتس سموا هق جادي کڦلا اتس بريبو ۲
کواس، دياله توهن هق دوق باوا عسکر اسرائيل
کي. توهن توله هق مو براني دوق لاون اين. ⁴⁶ فد
هاري اين جوک، توهن نق سره مو کا تاڻن اکو بري
بوليه بونوه، فس اکو نق کرت تکق امبيق کڦلا مو.
لبيه ۲ لاکي اکو نق بري مایت ۲ فواق فلسٽيا مو سموا
کا بوروځ ايريڻ دڻن بناڻځ دهوتن جادي مکانن دي
هاري اين. بالس توله سموا هق دوق اتس بومي بوليه
تاهو کات توهن هق سبئر ايت دوق سکالي دڻن فواق
اسرائيل. ⁴⁷ فس سموا اورځ هق دوق دسيني فون بوليه
تاهو کات، توهن تا بري منڻ دڻن سنجات هق
مائسي، دق! فرلاوانن اين جادي هق توهن سنديري،
دياله هق نق سره فواق مو کا تاڻن اکو اين.

48 لفس ايت ڪوليٽ توبيت نق تمو دغن داءود. داءود فون هوڻڪل ڪي نق تمو دغن دي دافن باريسن عسڪر ۲ ايت. ⁴⁹ بلڻ ۲ دوق ڪي ايت، داءود سلوق دالم جابيل دي امبيق انق باتو سبوتير توبير ڪي، فس ڪنا دداهي ڪوليٽ سلالو. باتو ايت فون تمبوس ماسوق دالم ڪفلا، فس ڪوليٽ ربه سوڪور ڪا تانه.

50 بالس توله داءود بوليہ منڻ دغن تاءفاڪي فدڻ سڪالي. دي بونوه ڪوليٽ بري ماتي دغن انق باتو سبوتير ساج. ⁵¹ لفس ايت دي هوڻڪل ڪي جيڇق اتس توبوه ڪوليٽ، چابوت فدڻ هق ڪوليٽ ايت، تاڪير دي ڪرت ڪفلا بري فوتوس. بيلا عسڪر ۲ فلسٽيا نمفق ڪات اورڻ دي هق مشهور ايت ماتي ده، سموا فواق دي فون فاليڻ لاري سلالو.

52 فواق اسرائيل دغن فواق يهودا فون فاڪت برسورق سڪالي دغن سوارا درس. فس سموا ايت فاڪت همبت اورڻ فلسٽيا ڪي، سمفي ڪا فينتو ڪوت ڪت دغن ڪوت ايڪرون. عسڪر ۲ فلسٽيا هق اد لوڪ، دوق ربه سود ۲ جالن، امبيق دموقيم شعارائيم ڪي سمفي ڪا ڪوت ۲ دي سائي ايت.

53 بيلا عسڪر ۲ اسرائيل سوده ده همبت اورڻ فلسٽيا ايت، دي فاليڻ ڪليق رمفس بارڻ ۲ هق اورڻ فلسٽيا تيڻڪل دتمفت خيمه دي. ⁵⁴ فس داءود باوا ڪفلا ڪوليٽ ايت ڪي ڪا ڪوت يروسليم، تافي فرڪاڪس فرڻ هق ڪوليٽ، دي امبيق تاروه دالم خيمه دي ده.

دائود مفهادف راج سائول فول

55 تکه دأود توبیت کي نق برلاون دغن کولیات ایت، راج سائول دوق تیغوق دي برجالن کي، فس دوق تاڻ کفلا عسکر دي هق نام ابنیر کات: هي ابنیر. بودق ایت انق سیاف؟ ابنیر جواب: اوه توانکو، امب فون تائاهو جوکډ. ⁵⁶ راج سوروه دي: کیله تاڻ اورغ، بودق ایت انق سیاف.

57 بیلا دأود سوده بونوه کولیات، دي کلیق کا خیمه اورغ اسرائیل، فس ابنیر باوا دي ماسوق مفهادف راج سائول، دغن باوا کفلا کولیات کي جوکډ. ⁵⁸ راج فون تاڻ دي: هي هاوغ، مو انق سیاف؟ دأود فون جواب: همب توانکو این، جادي انق جسي، هق دوق دکمفوغ بیت لاحیم.

باب 18

1 لفس فد دأود ماسوق کیچیق دغن راج سائول، فس یوناتن انق سائول ماري نق برسائین دغن دأود. کدوا ایت فون جادي سائین رافت، فس یوناتن کیرا کات پاوا دأود مهل سروف پاوا دي سندیري.

2 جق دماس ایت، سائول بري دأود دوق سکالي دغن دي، تائبر بري کلیق کا تمفت ایه دي. ³ فس یوناتن بوات فرجنجین کات دي نق جادي سائین دغن دأود سعمور، کران دي کیرا کات پاوا دأود مهل سروف پاوا دي سندیري. ⁴ لفس ایت دي چابوت باجو جوبه هق دي بري کا دأود، فس باجو بسی، فدغ، باو انق فانه دغن تالي کندیت هق دي فون، سموا ایت دي هدیه کا دأود.

5 بيلا راج سائول سوروه دائود توبيت ڪي بوات اف ۲،
دائود فون بوليه بوات دغن برجاي سعمور. فس سائول لتق
دي جادي ڪتوا اتس عسڪر باپق اورغ. منتري ۲ سائول فون
ستوجو دغن هق راج بوات ايت. رعيت ۲ سموا فون سوڪ
هاتي جوڪ.

راج سائول براس بردغڪي ڪا دائود

6 لفس فد ڪجادين دائود دغن ڪوليٽ، راج سائول تيغڪل
فادغ فرغ ايت باوا عسڪر ۲ دي ڪليق. فس اورغ ۲ بتينا
فاڪت توبيت سمبوت دي دڪمفوغ ڪنف ۲ تمفت. فواق ۲
ايت دوق پاپي لاڪو دغن تاري مناري، فس دغن مائين
فرڪاڪس موزيق ڪران سوڪ هاتي. ۷ فس اد ساتو لاڪو هق
اورغ بتينا دوق پاپي دالم فواق ۲ دي، ڪات:

راج سائول بياس بونوه بريبو ۲ اورغ،
تافي دائود بوليه بونوه برفولوه ۲ ريبو.

8 راج سائول تا برڪنن فرڪتائ دالم لاڪو ايت، فس دي
براس موريه. فيڪران دي بالس اين: ديما فوجي دائود ڪات
دي بونوه سفولوه ريبو، تافي اڪو اين بوليه بونوه سريبو
ساج. ستارا مان لاڪي دائود نق ڪنا اڱڪيت، ملينڪن نق
اڱڪيت دي بري جادي راج؟ ۹ جق دهاري ايت، سائول
فرهاتي تيغوق ڪا دائود سعمور.

10 لفس فد ايت سهاري لاڪي سائول دوق درومه، فس
دائود دوق مائين ڪمبوس دافن دي سروف سعمور. تيبا ۲
توهن بنر بري ڪواس هق جاهت ايت تورون اتس سائول
بري دي دوق مناوغ دغن سوارا درس سروف اورغ ڪيلا.

11 بتولن، لمبيغ دوق دتاغن ساول. دي اڱڪيت لنچر دغن
توجوان نق تيكم داود بري لكت ددينديغ. تافي داود
بوليه هاليق سمفي دوا كالي.

12 جق دماس ايت، ساول براس تاكوت كا داود، کران
توهن تيغكل دي كي دوق سڪالي دغن داود. ¹³ لفس ايت
ساول سوروه داود كي جادي كتوا عسکر اتس سريبو اورغ
دتمفت جاوه فد رومه دي. داود فون باوا فواق ايت كي
ماري بوات فرغ سعمور. ¹⁴ فس اف ۲ هق دي بوات فون
برجاي بلاك، کران توهن دوق سڪالي دغن دي.

15 بيلا ساول تيغوق کات داود برجاي سعمور، دي براس
کهور ۲ تاكوت لاکي. ¹⁶ تافي اورغ ۲ اسرائیل برکنن کا
داود سروف دغن اورغ ۲ يهودا، کران داود له هق باوا
عسکر ۲ كي بوات فرغ سعمور.

راج بري داود منيکاح دغن انق دي

17 ساول کات کا داود: کالو مو ستوجو نق كي بوات فرغ
دغن قواة هاتي انتوق اکو، فس انتوق توهن جوک، اکو نق
بري مو منيکاح دغن انق سولوغ کو هق نام ميرب. فيکران
ساول بالس اين: جاغن بري اکو بوات اف کا دي، بلرله
بري اورغ فلسيتيا بوات.

18 تافي داود کات: بالس مان اورغ سروف اکو اين نق
جادي منتو راج؟ کلوارک ايه کو فريغت رنده دالم فواق
اسرائیل. ¹⁹ تافي، بيلا سمفي ماس ميراب بوليه منيکاح دغن
داود، ساول تآبري. دي بري منيکاح دغن اورغ نام
ادريعیل هق ماري دکمفوغ مهولة.

20 انق راج ساءول سئورغ لاکي هق نام ميخل دوق برکنن کا داءود، فس بيلا ساءول دغر خبر ايت دي سوک هاتي. ²¹ دي فون فيکير کات: موليق اکو بري انق منيکاح دغن داءود. بئکالي دي نق تاريق هاتي داءود بري لکت کا دي، فس اورغ فلسيا بوليه بونوه دي دغن موده ۲۰. لفس ايت دي کي کيچيق دغن داءود سکالي لاکي کات: لاني اکو ستوجو ده نق بري مو جادي منتو اکو.

22 لفس ايت راج ساءول سوروه اورغ ۲ دي کي سام داءود کيچيق دغن سوليت کات: راج برکنن سوغکوه کا مو، فس کيت سموا فون برکنن جوک. موليقله مو جادي منتو دي. ²³ فواق ايت فون کي رويت کا داءود بالس ايت، تافي داءود جواب کات: جادي منتو راج ايت، مو کامق کات فرکارا کچيک که؟ اورغ سروف اکو هق تاءاد نام فس مسکين؟

24 فواق ايت فون کليق رويت کا راج هق مان داءود کيچيق ايت. ²⁵ فس راج ساءول سوروه دي کي فول، کات بالس اين: نق منيکاح دغن انق راج ايت، تاءکنا بلنجا اف سکارا، ملينکن اد ساتو کرج هق راج نق سوروه. مو کنا کي بونوه اورغ فلسيا سراتوس اورغ، فس باوا ماري کوليت کمالوان دي کا راج، انتوق نق بالس کا سترو ۲ دي. توجوان ساءول نق بري داءود کنا بونوه داورغ فلسيا.

26 فواق ايت فون کي رويت کا داءود بالس ايت، فس داءود ستوجو دغن سوک هاتي نق جادي منتو راج. ²⁷ دي فون توبيت سلالو دغن فواق دي کي بونوه اورغ فلسيا سراتوس اورغ بلوم فد سمفي جنجي. کوليت ۲ کمالوان فواق ايت فون، داءود باوا ماري بيلغ دافن راج ساءول،

انتوق بري بوليه جادي منتو راج. لفس ايت راج ساول
کنا بري انق دي ميخل ايت منيکاح دغن دأود.

28 لاني ساول نمفق کات توهن دوق سکالي دغن دأود
سوځکوه، فس انق دي ميخل فون دوق کاسيه کا دأود
جوک. ²⁹ لفس ايت ساول فون کهور ۲ تاکوت لاکي کا
دأود، فس دالم هاتي دي دوق جادي سترو دغن دأود
سمفي ماتي. ³⁰ فس بيلا راج ۲ اورغ فلسيا توبيت ماري
بوات فرغ، دأود بوليه منغ سعمور، لبيه فد سموا کتوا
عسکر هق لائين. فس نام دأود فون ترمشهور.

باب 19

راج ساول بوات پاڻ کا دأود

1 ساول دوق کيچيق دغن يوناتن سکالي دغن منتري ۲،
چارا حال بونوه دأود ايت. تافي يوناتن جادي سائين رافت
دغن دأود. ² فس دي کي رويت کا دأود کات: ايه کو اد
چادغن نق بونوه مو. فاکي ايسوق مو کنا کي منوسوف
دتمفت هق اورغ تاهو. ³ فس تکه اکو توبيت کي برجالن
دغن ايه، اکو نق برادو دکت تمفت مو دوق منوسوف، فس
نق کيچيق دغن ايه چارا حال مو. فس بيلا اکو دغر اف ۲
چارا حال مو، اکو نق رويت بري مو تاهو سلالو.

4 يوناتن فون دوق کيچيق دغن ايه دي، فس دوق فوجي
دأود کات: يا ايه، جاغلله بوات دوسا سابيت دغن دأود
هق تائباس بوات ساله اف ۲ کا ايه. سموا هق دي بوات
ايت موليق بلاک، فس اد فائده کا ايه جوک.

5 ايغٽله ايه، بالس مان دي جوغ سره پاوا دي، تکه توبيت کي بونوه کوليات ايت. فس هاري ايت جوک، توهن بري کمنانن بسر کا اورغ اسرائيل کيت. ايه فون سوک هاتي بيلا تيغوق هق دأود بوات هاري ايت، بوکن؟ سبب اف، لاني ايه نق بونوه دي هق تائباس بوات ساله، دغن تاءاد بوکو مان ۲ فون؟

6 سأل فون دغر هق انق دي نصيحة ايت، لفس ايت دي بوات فرجنجين برسومفه دغن نام توهن يغ مهايدوف، کات: اکو تائبونوه دأود ده. ⁷ يوناتن فون فغکیل دأود توبيت ماري، فس رويت سموا فرکارا بري دغر. لفس ايت دي باوا دأود ماري تمو دغن راج سأل فول، فس دأود دوق کرج کا سأل سروف دولو.

8 فد ماس ايت اورغ فلسيا توبيت بوات فرغ فول. دأود فون کي سرغ دي دغن بونوه بايق اورغ. فس اورغ فلسيا فون لاري کا دي.

راج سأل نق بونوه دأود سکالي لاگي

9 فس، کواس جاهت هق ماري دتوهن ايت جاتوه اتس سأل فول. تکه ايت دي دوق دالم رومه دغن لمبيغ دوق دتاغن، فس دأود دوق ماین کمبوس دسيتو جوک. ¹⁰ تيبا ۲ سأل اغکيت لمبيغ نق تیکم دأود بري لکت ددينديغ، تافي لمبيغ دوق لکت ددينديغ ساج، دأود فون هاليق ديري، فس مالم ايت دي لاري توبيت فد رومه سأل.

11 سأل سوروه دوا تیک اورغ کي توغکو دأود درومه فد وقت مالم، ننتي نق بونوه دأود دينهاري ايسوق. تافي ميخل کي رويت کا لاگي دي کات: کالو ابغ تالاري سلالو

مالم اين، دينهاري ايسوق اورغ نق ماري بونوه. ¹² فس ميخل فون هولور دأود تورون كو فينتو ناتغ بري دي لاري كي. ¹³ لفس ايت، دي امبيق ساتو برهالا ماري لتق اتس كاتيل، فس امبيق بنتل بوات دغن بولو كمبيغ، كي لتق دكفلا. سمو ايت فون دي تودوغ دغن كائين سليموت.

14 بيلا اورغ هق راج ساول ماري نق ايكت دأود، ميخل فون كات: دي دوق ساكيت. ¹⁵ تافي ساول سوروه دي كي فول، كات: مو كنا اوسوغ دي ماري دغن كرغ، اكو نق بونوه دي جوكت. ¹⁶ تافي بيلا اورغ ايت ماسوق نق ايكت دأود، دي تمو دغن برهالا هق دوق اتس كرغ دغن بنتل هق لتق دكفلا. ¹⁷ فس ساول تاڻ ميخل كات: سبب اف مو تيفو بالس اين، بري سترو اكو بوليه لاري لفس كي؟ ميخل فون جواب: دي كات، كالو تاڻ بري دي لفس كي، دي نق بونوه امب.

دأود لاري كي كا تمفت نبي سموئيل.

18 دأود فون لاري كي كا تمفت سموئيل دموقيم رame، فس رويت سموا فركارا هق ساول بوات كا دي. لفس ايت دأود كي سڪالي دغن سموئيل، دوق منوسوف دكمفوغ نام نايوت. ¹⁹ فس ساول دغر كات دأود دوق دنايوت دالم موقيم رame. ²⁰ دي فون سوروه اورغ كي ايكت دأود، تافي عسڪر ۲ ساول سمفي دسيتو، دي نمفق اورغ ۲ دوق تاري مناري فوجي كا توهن دغن سوارا درس، فس سموئيل دوق باوا دي. فس ڪواس روح توهن فون تورون اتس عسڪر ۲ ساول جوكت بري دي ماسوق دوق تاري مناري دغن فوجي كا توهن سڪالي دغن فواق ايت.

21 بيلا سائول دغر حال ايت، دي سوروه اورغ لائين کي فول، فس جادي سروف ايت جوک. سائول فون سوروه اورغ کي سکالي لاکي، فس جادي سروف ايت جوک.

22 لفس ايت سائول توبيت کي سنديري. بيلا سمفي دکت رامه، دي تاڻ اورغ هق دوق دتفي تلاک دبندر سيکو، کات: سموئيل دغن دائود ايت دوق دمان؟ اورغ ايت کات: دوق دکمفوغ نايوت، دالم موقيم رامه.

23 سائول فون توجو کي کا نايوت، فس تغه برجالن کي ايت، کواس روح توهن تورون اتس دي بري دي دوق فوجي کا توهن دغن سوارا درس جوک، فس دي برجالن کي دغن تاري مناري تائبرادو سمفي کا کمفوغ نايوت ايت. ²⁴ فس دي چابوت هابيس فکايين دتوبوه دي، دوق تاري مناري بلغ ۲ مپايي فوجين دغن سوارا درس دافن سموئيل دسيتو. لفس ايت دي تيدور دغن تلنجغ سمفي سهاري سمالم. لفس ايت فرکتائين اين لکت دکيچيفن اورغ اسرائيل، کات: «سائول ماسوق جادي فواق هق تريما کواس روح توهن جوک که؟»

باب 20

يوناتن دوق تولوغ دائود فول

1 لفس ايت دائود لاري توبيت فد کمفوغ نايوت درامه ايت، کليق کي چاري يوناتن کات: اکو بوات اف؟ ساه بوکو مان؟ اکو بوات دوسا اف کا ايه مو بوليه دي نق بونوه اکو؟ ² يوناتن کات: دق! مو تائکنا کيچيق حال بونوه. ايه کو تائباس سوسوف اف سکارا چادغن دي کا اکو. کالو دي نق بوات هق مو سغک ايت، مستي دي کنا رويت کا اکو دولو. ³ تافي دائود جواب: ايه مو تاهو دغن چرف کات اکو

چرف کات اکو جادي سائين رافت دغن مو. فيکران دي:
جاغن بري تاهو کا يوناتن، دي نق سوسه هاتي. اکو بوليہ
جامين اتس نام توهن يڄ مهايدوف، کات لاني اکو
تاءُجاءُوه فد ماتي. ⁴ يوناتن کات: اف ۲ هق مو نق سوروه،
اکو نق تولوغ بوات انتوق مو.

5 داءُود کات: مالم ايسوق سهارى بولن، هق اکو کنا کي
ماکن جاموان سکالي دغن راج. اکو نق مينتاءُ مو بئر بري
اکو کليق، فس اکو نق کي منوسوف دلوار سمفي فتح
لوسا. ⁶ کالو ايه مو تيفوق کات اکو تاءُاد، مو رويته کا
دي کات: داءُود مينتاءُ دغن امب سوغکوه ۲، بئر بري دي
کليق کا کمفوغ دي دبیت لاهيم، کران ستاهون سکالي
فواق دي کنا بوات قربان دسيتو. ⁷ کالو ايه مو کات:
تاءُافله. هق ايت تندا کات موليق انتوق اکو. تافي کالو
نمفق کات دي نق موريه، مو بوليہ تاهو سلالو کات
توجوان دي انتوق اکو تاءُموليق.

8 مينتاءُله بري مو تولوغ اکو دغن کاسيه کسياغ بلس،
دغن ايغت کا فرجنجين کيت. تافي کالو اکو اد اف هق
ساله سوغکوه، بائيله بري مو سنديري بونوه اکو. اف
فائده باوا اکو کي کا ايه مو بري دي بونوه ساج؟ ⁹ تافي
يوناتن کات: جاغله کيچيق بالس ايت. کالو اکو دغر کات
ايه کو نق بوات اف هق تاءُموليق، تنتو اکو نق رويت کا
مو. ¹⁰ داءُود فون تاڻ يوناتن لاکي کات: بالس مان اکو نق
بوليہ تاهو کالو ايه مو کيچيق هودوه حال اکو؟ ¹¹ يوناتن
کات: ماريله کيت توبيت کي کا تمفت باليق لوار. کدوا
ايت فون کي.

12 فس يوناتن کات: اڪو نق جنجي دغن نام رٿي اتس سموا، توهن اورغ اسرائيل کيت، کات اڪو نق کي تاڻ ايه ڪو چارا حال مو. فس کالو توجوان دي موليٰق، تنتو اڪو نق هنتر خبر ايت کا مو، ايسوق اتوا لوسا فد ماس سروف اين جوڪ.¹³ کالو توجوان دي نق بونوه مو، لبیه ۲ لاکي اڪو نق بري تاهو کا مو. کالو اڪو تائولوغ مو بريله توهن امبيق پاوا ڪو سلالو. فس اڪو نق مينتا توهن دوق سکالي دغن مو، سروف دي دوق سکالي دغن ايه ڪو.

14 فس يوناتن کات لاکي: سلام اڪو دوق هيڊوف اين، مو ڪنا تنجوقله کا اڪو کاسيه ڪسياغ بلس هق ماري دتوهن، فس کالو اڪو ماتي ده،¹⁵ مينتاله تنجوق کاسيه ڪسياغ بلس سروف ايت کا اورغ درومه تڱڪ اڪو کاتيٰق. فس بيلا توهن بري فوتوس ده سموا اورغ هق جادي سترو ۲ مو سمفي تاء ده داتس موڪ بومي اين، جاغله بري فوتوس نام اڪو يوناتن اين درومه تڱڪ مو.

16 بلس توله يوناتن بوات جنجي دغن قوم ڪلورڪ دائود. ¹⁶ فس دي کات: يا دائود، اڪو نق مينتا توهن جاتوه حڪوم اتس سموا اورغ هق جادي سترو ۲ مو.¹⁷ يوناتن فون سوروه دائود بوات جنجي دغن برسومفه سکالي لاکي، ڪران ڪدوا ايت کاسيه مو اڪو سوڱڪوه، سبب يوناتن ڪيرا کات پاوا دائود مهل سروف پاوا دي سنڊيري.

18 فس يوناتن کات کا دائود: ايسوق، بيلا اورغ دوق ماڪن جاموان اوال بولن، اورغ بوليٰه نمفق کات ڪريسي مو دوق ڪوسوغ.¹⁹ ننٽي سمفي لوسا، فس کي کا تمفت هق مو بياس کي منوسوف دولو، دڪت دغن باتو ۲ هق دوق تمبوغ ايت.

20 اڪو فون نق توبيت ڪي بوات برلاتيه مانه دتمفت ايت.
اڪو نق فانه ٽيڪ ڪالي فنتيغ ڪوٺ باتو ۲ ايت، ²¹ فس نق
سوروه همب ڪو ڪي ڪوتيف انق فانه ڪليق. ڪالو اڪو سوروه
دي ڪي ڪوتيف باليق سيني فد تمفت مو، معناڻ مو بوليه
توبيت ماري دغن سلامت، ڪران اڪو بوليه ڄامين اتس نام
توهن يغ مهايدوف ڪات تاءُ اد بهيا ده.

22 تافي، ڪالو اڪو سوروه دي ڪي ڪوتيف باليق سان فد
تمفت مو، معناڻ مو ڪنا ڪي ڄاوه فد تمفت اين، ڪران
هق ايت ڄادي تندا ڪات توهن هق سوروه مو ڪي. ²³ فس
چارا حال فرجنجين مو دغن اڪو ايت، مينتاه توهن بري
ڪمس سعمور.

24 دائود فون ڪي منوسوف بالس ايت. فس بيلا سمفي
اوال بولن ايت، راج ساول فون ماسوق نق ماڪن ڄاموان.
²⁵ دي ڪي دوق ڊڪريسي دي سروف سعمور، دتفي
دينديغ. ڪتوا عسڪر دي هق نام ابير دوق سبله راج، فس
يوناتن دوق دافن ايه دي ايت. تافي ڪريسي دائود دوق
ڪوسوغ. ²⁶ ساول تاءُ ڪات اف مالم ايت. دي سڻڪ ڪات
دائود تاهيه ماري لاکي، ڪنا ننڍي بري سوچي ڊيري ايڪوت
اتوران اوڪام دولو.

27 تافي مالم هق ڪدوا، ڪريسي دائود دوق ڪوسوغ لاکي،
بارو ساول تان يوناتن ڪات: باءُ اف انق جسي ايت تاهي ماري
ماڪن ڄاموان؟ ڪلمارين تاهي ماري، مالم اين فون تاهي ماري
جوڪ. ²⁸ يوناتن جواب ڪات: دائود ماري مينتاه دغن
امب سوڻڪوه ۲ بئر بري دي ڪليق ڪا رومه دي دبیت لاهيم
²⁹ ڪات ڪلوارڪ دي نق بوات قربان درومه، فس ڪاڪق دي
فڻڪيل سوروه ڪليق. دي فون ماري مينتاه ڪبيران دغن امب

کران جادي سائين، نق بري بوليه کليق تمو دغن اديق
براديق دي درومه. امب فون بئر بري. سبب ايت، دي
تأماري ماکن جاموان هق ايه اين.

30 ساول فون نايك موريه سلالو، فس کات کا يوناتن: مو
انق درهاک بوکن انق اکو، تنتو امق مو بوات زنا. اکو
تاهو ده مو دوق سوکوڻ دأود سعمور، نق بري چمر نام
بائيک هق مو، فس سمفي کا نام امق مو جوک. ³¹ سلام
دأود انق جسي ايت دوق اد اتس بومي اين، مو تأاد
هرافن نق بوليه جادي راج. کيله امبيق دي ماري سلالو،
کران دي مستي کنا ماتي. ³² تافي يوناتن کات: سبب اف
دي کنا ماتي؟ دي بوات اف هق ساله؟

33 ساول فون اغکيت لمبيغ دي لنچر کي کو يوناتن.
بالس ايت يوناتن تاهو کات ايه دي نق بونوه دأود
سوڻکوه ۲. ³⁴ دي فون باغون سلالو تيڻکل تمفت جاموان
دغن موريه ساغت ۲. فس دي تأماکن اف سکارا فد مالم
يغ کدوا هق جاموان ايت، کران دي سوسه هاتي سوڻکوه
ايغت کا دأود، هق ايه دي بوات بري نام چمر بالس ايت.

35 فاکي ايسوق فول، يوناتن توبيت کي کا تمفت هق دي
جنجي ده دغن دأود، فس دي باوا بودق سئورڻ کي
سکالي. ³⁶ دي کات کا بودق ايت: اکو نق برلاتيه مانه، فس
مو کنا کي چاري انق ۲ فانه ايت باوا ماري سيني. بودق
ايت فون هوڻکل کي نق امبيق انق ۲ فانه باوا کليق. فس
يوناتن فانه سفونتوڻ لاکي بري جاوه فد بودق ايت.

37 بيلا دي کي نق امبيق انق فانه ايت، يوناتن فون ملاوڻ
کات: انق فانه دوق باليق سان فد مو لاکي. ³⁸ کيله سلالو

جاغن دوق ننتي دسيتو. بودق ايت فون كي امبيق انق فانه ايت باوا³⁹ كليق كا توان دي. بودق ايت تاهو اف، يوناتن دغن دأود ساج هق تاهو حال ايت.⁴⁰ لفس ايت، يوناتن بري سموا فركاكس دي كا بودق ايت، سوروه كليق كا رومه.

41 بيلا بودق ايت كي ده، دأود فون توبيت بلاكغ باتو² ايت، فس دي تنجوق حرمة كا يوناتن دغن سجود تيك كالي، لفس ايت باغون فلوق دي دغن كوچوف دفيقي. كدوا ايت فون دوق ترياق مناغيس، تافي دأود هق مناغيس لاكي فد يوناتن.⁴² فس يوناتن كات: برجالن كيله دغن سلامت سجهترا. اكو نق مينتا³ دغن توهن، ربي اتس سموا ايت، بري دي جاك فرهوبوغن مو دغن اكو اين بري تافوتوس، سمفي كا انق چوچو كيت ماس كو⁴ دافن. لفس ايت دأود تيغكل كي. فس يوناتن فون كليق كا تمفت دي دالم كوت.

باب 21

دأود لاري فد راج سائل

1 افيلا دأود تيغكل فد تمفت راج سائل، دي كي سلالو. چاري اھيميلخ دبندر نوب. بيلا دأود سمفي دسيتو، اھيميلخ فون توبيت ماري دغن كتر كنالغ، دي تاڻ دأود كات: سبب اف توان ماري دسيني سئورغ؟

2 دأود جواب كات: اكو ماري بوات كرج انتوق راج. دي فسن كا اكو تائري رويت كا سياف حال اين. فس اكو جنجي ده دغن فواق اكو نق تمو دغن دي دساتو تمفت تغه جالن.³ لاني اكو ماري نق مينتا⁴ مكانن انتوق فواق اكو.

اد اف هق بوليه بري سلالو؟ كالو اد روتي ليم توغكول فادن ده. كالو تاءاد روتي، بارغ لائين فون تاءاف.

4 امام جواب کات: روتي هق لائين تاءاد. اد هق سره ده انتوق تمفت سوچي هق توھن ساج. تافي كالو فواق توان دوق سوچي تاءبرستوبوه دغن اورغ بتينا ماس لاني، تاءافله، امب بوليه بري. ⁵ داءود فون کات: امب جامين کات فواق امب دوق سوچي بلاک. عادة کيت کنف ۲ کالي توبيت، سمو اورغ کنا دوق سوچي. لبيه ۲ لاکي هاري اين، کران کيت بوات کرج هق مستحق انتوق راج. ⁶ امام فون بري کا داءود، روتي هق باوا توبيت دتمفت سوچي ايت، سبب هق لائين تاءاد. امام کنا سالين روتي ايت کنف ۲ هاري، بواغ هق لام بوبوه هق بارو.

7 جادي، هاري ايت اد سئورغ فواق راج ساول هق ماري نق فلس نياة دتمفت سوچي ايت. فس دي تيغوق داءود دوق اد دسيتو. نام اورغ ايت دوئيک، فس دي جادي کتوا اتس سمو اورغ هق فيرا بناتغ ۲ راج ساول.

8 تکه ايت داءود دوق کيچيق دغن امام کات: اد کا دق سنجات هق بوليه بري کا امب لاني؟ کران راج سوروه کي سلالو، فس امب توبيت دغن کادوه ۲، تاءدان نق کليق امبيق فدغ اتوا فرکاکس هق لائين. ⁹ امام کات: فدغ هق کولييات اد دسيني، اورغ فلسيا هق توان سنديري بونوه دفادغ عيله ايت، دوق باروت دغن کائين باليق بلاکغ تمفت تاروه باجو ايفود. هق ايت ساج اد دسيني. كالو توان نق، امبيقله! داءود فون کات: ها! تاءاد ده هق لائين لبيه فد ايت. بريله کا امب.

دأود کي دوق دغن اورغ فلسټيا

10 بالس توله، دأود تيغکل فد تمفت دي لاري کا راج سؤول. فد هاري ايت جوکډ، دي کي سمفي کا کوت کت هق راج اخيش. ¹¹ فس منتري ۲ دسيتو دوق کيچيق دغن راج، کات: اورغ اين که دأود، هق جادي راج دنکري اسرائيل؟ فس بوکن دي که هق اورغ پاپي تکه دي دوق بلارق، کات:

راج سؤول بياس بونوه بريبو ۲ اورغ،
تافي دأود بوليه بونوه برفولو ۲ ريبو.

12 دأود دغر هق اورغ ايت دوق کيچيق، فس لکت دهاتي دي سهيغکډ دي تاکوت سوغکوه ۲ کا راج اخيش. ¹³ سايت ايت، بيلا اورغ ماسوق دکت، دأود فون بوات سروف اورغ فونه اوتق. دي دوق منوليس اتس فينتو فاکر کوت، فس بري اير ليور منيليه توروون لکت دجغکوت.

14 راج اخيش فون کات کا منتري ۲ دي: باءاف مو باوا اورغ سروف ايت ماري سيني؟ مو تاءنمفق که دي کيلا؟ ¹⁵ تاءچوکوف لاکي که اورغ کيلا دسيني، بوليه مو باوا ماري سئورغ لاکي بري مائين کيلا دافن اکو؟ باءاف مو باوا دي ماسوق رومه اکو؟

باب 22

دأود لاري کي منوسوف دالم بوکيت دنکري يهودا

1 لفس ايت دأود لاري توبيت فد کوت کت، کي دوق دساتو کوا دالم بوکيت د ادولم. بيلا کاکق ۲ دي دغر حال ايت، دي فاکت کي کا تمفت دأود سکالي دغن سموا اورغ

درومه ايه دي. ² اورغ ۲ لائين فون کي چاري دائود جوکڻ،
 هق مان کنا پاڻ، هق مان تائيه باير هوتغ، اتوا هق تائسير
 دوق ده دتمفت دي. سموا اورغ ايت کي جادي فواق
 دائود. اد لبیه کورغ امفت راتوس اورغ هق تورو
 دائود ماس ايت.

3 لفس ايت دائود تورو کي کا ميزفه دنکري مؤاب، نق
 برهوبوغ دغن راج مؤاب. دائود کات: مينتائله توانکو بنر
 بري ايو باف امب ماري دوق دغن توانکو دسيني، سهيغک
 امب بوليه تاهو سکت مان توهن نق بوات انتوق امب. ⁴
 لفس ايت، دائود تيغکل ايو باف دي دتمفت راج مؤاب
 سلام دي دوق منوسوف دالم بوکيت ايت.

5 توهن تورو خبر کا اورغ نام کڻ، سوروه دي کي کا
 تمفت دائود، کات: مو تائکنا دوق منوسوف دبوکيت ده.
 مو تورو کيله دوق، دالم هوتن دنکري يهودا. دائود فون
 کي دوق دالم هوتن هق نام هيريث.

ساول سوروه بونوه امام ۲ بري ماتي هابيس

6 راج ساول فون دغر کات اورغ تمو ده تمفت دائود کي
 سکالي دغن فواق دي. تکه ايت راج ساول دوق اد
 دکمفوغ کيبياه، فس دي دوق باوه فوهون کايو بسر اتس
 بوکيت دسيو. دي اد لمبيغ دتاغن فس اورغ ۲ دي دوق
 کلليغ دتمفت ايت.

7 ساول فون کات کا اورغ ۲ دي: دغرله فواق مو اورغ
 بينجامين اين. انق جسي ايت جنجي نق بري تانه دغن کبون
 زبيت که؟ اتوا نق بري جادي کتوا اتس عسکر ۲ دي،
⁸ انتوق نق بري فواق مو درهاک کا اکو بالسان اين؟

تاءاد سياف هق براني ماري رويت، تکه انق کو دوق بوات ستوجوان دغن انق جسي ايت. تاءاد سئورغ فون هق کسياغ بلس کا اکو، نق بري تاهو کات انق کو دوق سوکوغ همب کو ايت، فس لاني دي چاري فلواغ نق بونوه اکو، سروف هق دغر هاري اين.

9 فس اورغ ايدوم هق نام دوئيک ايت دوق سکالي دغن منتري ۲ ساول هاري ايت. دي کات: يا توانکو، امب تيغوق داءود ايت جوک دکمفوغ نوب، تکه دي کي چاري امام اھيميلخ بين اھيتوب. ¹⁰ اھيميلخ ايت دوق مينتاء بري توهن تنجوق جالن کا داءود، فس ايت بري بکل مکانن کا دي، سکالي دغن فدغ هق کوليات اورغ فلسيا ايت.

11 بيلا دغر بالس ايت، راج ساول سوروه اورغ کي فغکيل امام اھيميلخ ماري سلالو سکالي دغن واري ۲ دي هق جادي امام دکمفوغ نوب. سموا ايت فون ماري کا تمفت ساول. ¹² فس راج ساول کات: دغرله اھيميلخ. اھيميلخ فون جواب: يا توانکو، رويته امب ننتي نق دغر.

13 فس ساول تان: باءاف مو دغن داءود انق جسي فاكت نق درهاک کا اکو بالس ايت؟ سبب اف مو بري مکانن دغن فدغ هق کوليات کا دي، فس دوق مينتاء بري توهن تنجوق جالن کا دي؟ لاني دي ماري نق لاون دغن اکو، فس دوق ننتي فلواغ نق بونوه اکو. هاري اين فون، دي دوق بوات سروف ايت.

14 اھيميلخ جواب: تافي داءود کاسيه ستيا کا توانکو لبيه فد سموا اورغ هق کرج کا توانکو. دي جادي منتو توانکو، فس جادي کتوا عسکر اتس فواق هق دوق جاک توانکو

سعمور. سمو اورغ درومه توانكو فون دوق حرمة كا دي.¹⁵
 بوكن هاري ايت ساج دق، هق امب مينتاً توهن تنجوق
 جالن كا دي. امب دوق مينتاً بالس ايت كا دي سعمور.
 جاغن سكالې توانكو امبيق بوكو اتس امب اتوا سمو واريس
 هق امب اين، کران امب تاء تاهو اف سکارا چارا حال ايت.

16 راج فون کات: هي اھيميلېخ، مو کنا ماتي سكالې دغن
 واريس ۲ مو سمو. ¹⁷ لفس ايت دي فالېغ سوروه عسکر ۲
 هق دوق جاک دي، کات: بونوهله امام ۲ اين، کران دي
 دوق سبله دائود. دي تاهو ده کات دائود دوق لاري کا
 اکو، تافي دي تاء ماري رويت اف سکارا. تافي عسکر ۲ ايت
 تاء براني نق بونوه امام ۲ هق دوق کرج انتوق توهن.

18 بېلا نمفق بالس ايت، راج فون فالېغ سوروه دوئېک،
 کات: موله کي بونوه دي. دوئېک اورغ ايدوم فون کي
 بونوه فواق امام ايت لفس سئورغ ۲ سمفي لافن فولوه ليم
 اورغ. سمو ايت جادي امام هق بوليه فاكي باجو ايفود
 بلاک. ¹⁹ لفس ايت ساول سوروه اورغ کي بونوه بري هابيس
 سمو هق دوق دالم کمفوغ نوب ايت، تاء کيرا جنتن بتينا
 اتوا بودق ۲ هق دوق ماکن فيق لاکي. فس سمو لمبو،
 هيمر، کمبيغ بيريغ دکمفوغ ايت، ساول سوروه بونوه بري
 هابيس.

20 تافي اد انق اھيميلېخ سئورغ هق نام ابياتر بوليه لاري
 لفس ديري، فس دي کي چاري دائود. ²¹ ابياتر فون رويت
 کا دائود کات: ساول بونوه هابيس امام ۲ هق کرج کا
 توهن. ²² دائود فون کات: تکه اکو نمفق دوئېک دوق

دسيتو هاري ايت، اكو تاهو ده تنتو دي كنا كي رويت كا ساءول. دغن سبب اكو اينيله اديق براديق دغن واريس مو سمو ايت كنا ماتي هابيس.²³ مو دودوقله دغن اكو، مو تاءكنا تاكوت ده. سوغكوه، ساءول نق بونوه كيت كدوا اين، تافي كالو مو دوق دغن اكو، مو نق بوليه سلامت.

باب 23

دائود كي تولوغ اورغ دموقيم كائيله

1 لفس ايت دائود دغر كات اورغ فلسيتيا دوق لاون دغن اورغ دموقيم كائيله، فس دوق رمفس كندوم هق بارو سوده مغم. ² دائود فون مينتاء دغن توهن بري تاهو كا دي. كات: اكو كنا كي لاون كا دق دغن اورغ فلسيتيا ايت؟ توهن فون بري تاهو كا دي، كات: كيله برلاون دغن فواق ايت انتوق بري سلامت كا اورغ كائيله.

3 تافي عسكر ۲ هق دائود كات: كيت دوق دالم يهودا اين فون دوق دغن تاكوت سعمور. تروق لاكي كالو كيت كي برلاون دغن عسكر ۲ فلسيتيا دكائيله. ⁴ سابيت ايت دائود مينتاء دغن توهن سڪالي لاكي، فس توهن بري تاهو كا دي، كات: مو كيله سلالو، کران اكو نق بري فواق فلسيتيا ايت كنا هاله كا مو.

5 دائود فون باوا اورغ ۲ دي كي برلاون دغن اورغ فلسيتيا دكائيله، فس بوليه بونوه بايق اورغ. بناتغ ۲ هق اورغ فلسيتيا فون، دائود امبيق انتوق فواق دي. بالس ايت له دي تولوغ اورغ كائيله بري سلامت. ⁶ تکه ابياتر انق امام اھيميلخ لاري كي چاري دائود، دي باوا ايڤود كي سڪالي دغن دي جوڪ.

7 فس راج ساءول دغر کات داءود توبيت کي کا موقيم کائيله. دي فون کات: لاني توهن بري داءود جاتوه کا تاغن اکو. دي ماسوق دالم کوت هق کاتوف هابيس، فس دوق کوروغ دالم فاکر ۲ دسيټو. ⁸ ساءول فون سوروه عسکر ۲ دي ماري برهيمفون نق بوات فرغ. فس دي تورون کي نق ليغکوغ داءود دغن اورغ ۲ دي هق دوق دالم کوت کائيله ايت.

9 داءود تاهو ده کات ساءول اد چادغن هق تاءموليق. دي فون سوروه امام ابياتر کات: باوا ماريله ايفود ايت. ¹⁰ فس ايت دي بردعا کات: يا ربي اتس سموا، توهن هق اورغ اسرائيل کيت، سمفي ده خبر کات ساءول نق ماري سيني بوات بناس کا کوت اورغ کائيله دغن کران اکو، همب توهن اين. ¹¹ اکو مینتا بري تاهو، فس اورغ کائيله نق سره اکو کا تاغن دي کا دق؟ ساءول نق تورون ماري سيني که؟ توهن فون بري تاهو کات: دي نق تورون ماري.

12 فس داءود تاڻ سکالي لاکي کات: فس اورغ کائيله نق سره اکو دغن فواق اکو کا ساءول که؟ توهن کات: نق سره. ¹³ بيلا دغر بالس ايت، داءود فون باوا فواق دي توبيت فد کوت کائيله، برجالن کي دغن تاءبرادو لام دمان. فد ماس ايت فواق داءود جادي انم راتوس اورغ ده. بيلا ساءول دغر کات داءود لاري کي ده، دي فون فاليغ کليق کا تمفت دي.

دءود دوق منوسوف دکليواسن بوکيت

14 داءود دوق دغن منوسوف دالم بوکيت دکليواسن زيف دتمفت اورغ تاءاد. ساءول فون دوق چاري دي تافي توهن تاءبري تمو.

15 تکه داؤد دوق دکليواسن ايت، دي برادو دتمفت نام هوريش، فس دي دغر کات ساءول توبيت ماري نق بونوه دي.¹⁶ فس يوناتن کي تمو دغن داؤد دهوريش ايت. دي تولوغ بري داؤد دوق قواة سماغت سمولا دغن کواس هق ماري دتوهن.¹⁷ يوناتن کات: مو تائسه تاکوتله داؤد، ايه اکو تائليه بوات اف کا مو. موله هق نق جادي راج اتس اورغ اسرائيل، فس اکو نق دوق باوه فرينته مو. ايه اکو فون تاهو ده حال اين.

18 لفس ايت دي کدوا دوق بوات فرجنجين دافن توهن سمولا. بيلا سود بوات هق ايت، يوناتن فون کليق کا رومه، فس داؤد دوق دهوريش ايت لاکي.

اورغ زيف تولوغ راج ساءول

19 لفس ايت، اد اورغ زيف کي مذهباف راج ساءول دکمفوغ کيبياه، کات: فواق امب تاهو ده تمفت داؤد دوق منوسوف اتس بوکيت² دکليواسن کيت. دي دوق دهوريش اتس بوکيت هاکيله، باليق هولو فد جسيمون.²⁰ ماريله بوات سموا کهندق هاتي توانکو، کران فواق امب نق سره دي کا تاغن توانکو.

21 ساءول کات: اکو مينتاء بري توهن تورون رحمة اتس فواق مو هق دوق ايغت کا اکو بالس اين.²² مو کليق کي فريقسا دولو بري چرف. چاري اورغ هق بيلاس تمو دغن داؤد دالم هوتن ايت. اورغ² دوق کات داؤد ايت چرديق سوغکوه.

23 مو کنا چاري سهيڻڪ مو تاهو ده سموا تمفت هق دي
کي منوسوف. بيلا تنتو ده، ماري رويت کا اکو فول، بارو
اکو نق کي سکالي دغن مو. بلرله تمفت منوسوف دنکري
يهودا ايت بايق ستارا مان فون، کالو دأود دوق اد دالم
نکري يهودا، تنتو اکو نق بوليه تمو دغن دي.

24 اورغ ۲ زيف فون کليق کي دولو فد سأل. فد ماس
ايت دأود دغن فواق دي کي دوق دالم هوتن مئون
دکليواسن اربه، باليق هولو فد جسيمون.

25 فس سأل باوا فواق دي کي چاري دأود کو ايت،
تافي اد اورغ کي رويت کا دأود. دي فون برجالن توجو
کو بوقيت باتو هق اد دتغه هوتن مئون. بيلا سأل دغر
بالس ايت، دي تورت کي کا تمفت ايت سلالو.

26 سأل فون دوق برجالن کو کاکي بوقيت سبله باليق
اين، فس دأود برجالن کي سبله باليق نون. دي دوق لاري
کادوه ۲ کران سأل دوق تورت دکت ۲ ده، نق بوليه
ايکت دي.

27 کتيک ايت جوک، اد اورغ ماري رويت خبر کا سأل
کات: باغتله توانکو، اورغ فلسيا دوق سرغ نکري کيت.
ماريله کليق سلالو. ²⁸ سبب توله سأل برادو فد همبت
دأود، فالیغ کليق نق برلاون دغن اورغ فلسيا. لفس فد
ايت اورغ لتق نام بارو کا بوقيت باتو دسيتو، فغکیل
«بوقيت لاري بوليه لفس».

29 دأود فون براليه کي دوق تمفت لاین فول، دالم
بوقيت دکليواسن عين کيدي.

باب 24

دأود تاءسير بونوه ساءول

1 بيلا ساءول كليق برلاون دغن اورغ فلسيا، دي دغر خبر
 کات دأود براليه کي دوق دکليواسن عين کيدي فول.
 2 ساءول فون باوا عسکر ۲ دي تیک ريبو اورغ هق فندي
 سکالي دالم نکري اسرائيل، کي چاري دأود دغن فواق
 دي، دالم بوكيت ۲ د عين کيدي. فواق ساءول فون نايک
 سمفي کا تمفت اورغ فغکيل «بوکيت باتو کمبيغ هوتن».

3 دي فون برادو دتمفت اد کندغ بيریغ. دتمفت ايت اد
 جوک کوا بسر دتفي جالن. ساءول فون ماسوق دالم کوا
 ايت نق کنچيغ. بتولن دأود دغن اورغ ۲ دي دوق
 منوسوف دسيتو، باليق دالم لاکي. 4 اورغ ۲ دأود فون
 کات: ها! اين. فلواغ هق توهن جنجي ده کات: سترو نق
 جاتوه کا تاغن توان اين. کيله بوات کا دي ايکوت کهندق
 توان. دأود فون توبيت کهور ۲، کي کرت بيراي کائين هق
 ساءول سچوفيغ.

5 لفس ايت دأود براس سسل اتس هق دي بوات ايت.
 6 فس دي کات کا فواق دي: مينتاله توهن تاهن هاتي کو،
 جاغن بري بوات اف کا راج کيت، هق توهن فيليه ايت،
 کران توهن سنديري هق لتق دي جادي راج. 7 بالس توله
 دأود تکه فواق دي دغن لارغ تا بري بوات اف کا ساءول.

لفس ايت ساءول فون توبيت فد کوا نق برجالن کي فول.
 8 فس دأود توبيت فد کوا جوک، فغکيل ساءول کات:

يا توانكو! ساءول فون فالیغ تیغوق کوۋ بلاکغ، نمفق
دأود دوق دافن کوا ایت. دأود فون سجود نق تنجوق
حرمة کا ساءول، دغن کات بالس این:

9 سبب اف توانکو دوق دغر کا هاسوتن اورغ هق
کات امب نق بوات خیانة کا توانکو؟¹⁰ ایغته، هاري
این توهن بري توانکو جاتوه کا تاغن امب دالم کوا
این. فس اد اورغ هق سوروه بونوه، تافي امب
تأبوات اف سکارا کران تأسیر جاتوه تاغن اتس
توانکو هق توهن لتق ده جادي راج.

11 يا توانکو هق جادي ایه کیت. تیغوقله، کائین
توانکو دوق دتاغن امب. امب کرت کائین ساج،
تأبونوه توانکو، کران نق بري تاهو کات امب تأسیر
بوات درهاک کا توانکو سام سکالي. امب تأبیاس
بوات ساله کا توانکو، ولو فون توانکو دوق چاري
جالن نق بونوه امب سعمور.¹² مینتأ بري توهن
سندیری کرت سین کات هق مان ساله کیت کدوا این.
بري توهن جاتوه حکوم هق سوغ اتس توانکو، کران
امب تأسیر بوات اف ده کا توانکو.

13 هق اورغ توا دوق کات: «فربواتن جاهت توبیت
دهاتي هق جاهت.» تافي امب تأسیر بوات اف کا
توانکو.¹⁴ راج اورغ اسرائیل توبیت ماري نق لاون
دغن سیاف؟ دغن انجیغ هق ماتي ده که، اتوا دغن
کوتو سئیکور که؟¹⁵ مینتأله بري توهن کرت سین
اتس بوکو کیت کدوا این. بري دي تنجوق کات
امب این تأساله اف ۲ دغن بري توبوه امب سلامت
فد کواس توانکو.

16 بيلا دأود سود كيچيق بالس ايت، سألول كات:
جيلا كه، سوارا انق كو دأود؟ فس سألول دوق ترياق
مناغيس. ¹⁷ لفس ايت دي كات:

سوڭكوه، هاتي مو بتول فد هاتي كو لاكي. مو دوق
بالس كا اكو دغن بائيك سعمور، تافي اكو دوق بالس
هق تالموليق ساج. ¹⁸ هاري اين اكو بوليه نمفق ده
ستارا مان مو دوق بوات بائيك كا اكو. كران توهن
بري ده اكو جاتوه كا تاغن مو، تافي مو تالبونوه.
19 اورغ مان ۲، كالو دي تمو ده دغن سترو دي، نق لفس
بري كي ساج كه؟ مينتاله توهن تورون رحمة اتس
مو، كران هق مو بوات هاري اين موليق سوڭكوه. ²⁰
لاني اكو تاهو ده كات موله هق كنا جادي راج اتس
اورغ اسرائيل، فس دالم فرينتاھن مو، نكري اين نق
دوق كجت دغن ماجو سعمور. ²¹ فس اكو نق مينتال
سكارا دغن مو: برسومفله اتس نام توهن، كات مو
تأبري باك كو ماتي هابيس، نق بري اد لاكي
كتورونن هق بوليه ايغت كا نام كو.

22 دأود فون جنجي سروف هق دي مينتال ايت. لفس ايت
سألول كليق كا رومه، تافي دأود دغن فواق دي نايك
دوق اتس بوكيت ايت لاكي.

باب 25

كماتين نبي سموئيل

1 سموئيل فون ماتي، فس اورغ اسرائيل فاكت ماري
ملاوت رات ۲ تمفت دالم نكري. مایت سموئيل، اورغ
تانم دكت دغن رومه دي درامه.

دائود تمو دغن اورغ بتينا نام ابيگيل

فد ماس ايت جوڪ، دائود براليه تمفت دي، ڪي دوق دفادغ فارن (اتوا معون). ² اد سئورغ نام نابل هق تورون دفواق ڪاليب. دي دوق دمعون، تافي تانه دي دوق دموقيم ڪرميل. دي اورغ ڪاي سوغڪوه، بيرغ دي اد ٽيڪ ريبو ايكور، فس ڪمبيغ سريبو ايكور. فد ماس ايت دي دوق ڪونتيغ امبيق بولو دبيريغ ² دي دالم موقيم ڪرميل. ³ نابل اين اد بيني نام ابيگيل، اورغ چرديق، روف فون چوميل، تافي لاکي دي اورغ ڪدڪوت، فراغي فوغه.

4 فس دائود، هق دوق دالم فادغ دڪليواسن ايت، دغر ڪات نابل دوق ڪونتيغ بولو بيرغ دسيٽو. ⁵ دائود فون سوروه اورغ ² دي سفلوه اورغ ڪي ڪيچيق دغن نابل دتمفت ايت، ڪات:

6 دائود انق جسي نق ڪيريم سلام ڪا توان اين، فس نق مينتا توهن بري قوم ڪلوارڪ توان سڪالي دغن سموا هق جادي مبيق توان اين، بولي دوق دغن سلامت بلاڪ. ⁷ دائود دغر ڪات لاني فرياغ توان دوق بوات ڪرج ڪونتيغ بولو بيرغ، فس دي نق بري توان تاهو ڪات اورغ ميرا هق توان دوق دڪليواسن ڪيت لام ده، فس ڪيت تائبوات اف ڪا دي. تاء اف سڪارا هق هيلغ سلام فواق دي دوق دفادغ ايت. ⁸ ڪالو توان نق تاهو، بولي تاڻ فواق توان سنديري. سبب توله، فواق امب ماري رويت ڪا توان فد هاري ماڪن جاموان اين، ڪران نق مينتا توان تنجوق بايڪ ڪا فواق امب ڪاتيغ دغن بري سڪيان هق سوغ انتوق فواق امب هق ماري دسائين توان، دائود ايت.

9 اورغ ۲ دأود فون کي رويت کا نابل بالس ايت، فس دوق ننتي دسيتو. ¹⁰ سود سکالي نابل بري جوافن کا دي کات: سياف دي دأود ايت؟ مو کات انق جسي. اورغ مان جسي ايت؟ لاني اد کولي بايق اورغ هق لاري کا توان دي نق دوق دغن بيس. ¹¹ اکو تأسير بري روتي دغن اير زيت اتوا داکيغ هق سمبليه انتوق فواق ۲ هق کرج دغن اکو، بري کا اورغ هق تأتاهو ماري دمان.

12 اورغ ۲ دأود فون فالیغ کلیق رويت سمو ايت کا دأود. ¹³ دأود فون کات سلالو: کیله سیمفن سنجات مو ماسیغ ۲. سمو اورغ فون کي برسیمفن. فس دأود سندیري باوا، امفت راتوس اورغ توبیت کي. دوا راتوس اورغ لاکی دي سوروه دوق جاک بارغ دتمفت دي.

14 فد ماس ايت جوک، کولي نابل سئورغ کي کیچیق دغن ابیکیل، بیني نابل ايت، کات:

چي، فوان دغر کا دق، دأود ايت سوروه اورغ ماري کیریم سلام کا توان کیت، فس دي جواب دغن تأمولیق. ¹⁵ تافي فواق دأود ايت بائیک دغن کیت. دي تأبیاس بوات خیانة اتوا امبیق اف هق کیت سلام کیت دوق دکت دغن دي دفادغ ايت.

16 سسوغکوهن دي دوق جاک کیت سعمور، تکه کیت دوق فیرا کمبیغ بیریغ دسيتو. ¹⁷ چي، کنا فیکیرله نق بوات بالس مان؟ تنتو اورغ ايت نق ماري بوات خیانة کا توان کیت سکالي دغن سمو اورغ دکمفوغ این، فس توان کیت بیغکیغ، تألیه کیچیق دغن دي.

18 ابيڪيل فون ڪي امبيق ڪادوه ۲ روتي دوا راتوس توڻڪول، اير بواه زبيت دوا بڪس هق بسر، بيريج ليم ايكور هق سمبليه سيف ده، دبو ڪندوم ٽيڪ ڪنٽغ، بواه زبيت ڪريج سراتوس ڪوڪوس، بواه ارا دوا راتوس توڻڪول. دي ڪي موات سموا ايت اتس هيمر ۲، ¹⁹ فس سوروه ڪولي ۲ دي ڪات: مو ڪيله دولو، اڪو نق تورت بلاڪغ. تافي دي ٽايري تاهو اف سڪارا ڪا لاکي دي.

20 لفس ايت ابيڪيل نائيڪ هيمر توبيت دغن فواق دي ڪي ڪو ڪاڪي بوڪيت، فس تيبا ۲ تمو دغن داود دوق هادف ماري ڪو ايت دغن اورغ ۲ دي. ²¹ تڪه ايت داود دوق فيڪير ڪات: روڪي اڪو دوق ڄاڪ سموا هق جادي ميليق اورغ ايت تڪه دوق دفادغ، ٽايري هيلغ اف سڪارا. فس دي بالس دغن ٽاموليق ساج. ²² ڪالو اڪو ٽابونوه اورغ ۲ جنتن دي بري هابيس بلوم سمفي ايسوق فاڪي، مينٽاله بري توهن بوات لبه لاکي ڪا اڪو ڪو داغن.

23 بيلا ابيڪيل تمو دغن داود دي تورون فد هيمر سلالو سڄود دافن داود، ²⁴ فس ڪات ڪا دي:

يا توانڪو، مينٽا بري توانڪو دغر هق مان همب توانڪو اين نق رويت. همب نق ٽغڪوڻ جواب اتس سموا هق ساله ايت. ²⁵ توان ٽاڪنا امبيق بوات ڪيرا هق نابل دوق ڪيچيق ايت. دي اورغ ٽايرفاڪي ساج. نام دي نابل (معناڻ بودوه) فس فراغي دي سروف ايت جوڪ. سسوڻڪوهڻ همب ٽاهاو ڪات فواق توانڪو ماري ڪلمارين. ²⁶ تافي همب بوليه ڄامين اتس نام توهن يڻ مهايدوف فس اتس پاوا توانڪو سنديري

کات هاري اين توهن هق تاهن توانکو، تاءري بالس
کا اورغ هق جادي سترو ايت دغن بونوه دي.
سسوځکوهن سمو اورغ هق بوات سترو کا توانکو اين
اتوا نق بوات خيانه اف ۲ فون، تنتو دي نق کنا حکوم
کوء دافن، سروف دغن نابل.

27 لاني همب نق مينتا توانکو تريما بارغ ۲ هق
همب باوا ماري اين، انتوق نق بهاکي کا اورغ ۲
توانکو²⁸ فس همب نق مينتا معاف اتس کسلاهن
همب اين جوک. موده ۲هن توهن نق اځکيت توانکو
بري دوق دتمفت تيغکي، سمفي کا کتورونن توانکو
کوء دافن. کران توانکو دوق بوات فرغ انتوق توهن،
فس تنتو توانکو تاءسير بوات اف هق تاءموليق سعمور
هيدوف.

29 کالو اد اورغ هق دوق کاچغ نق بونوه توانکو
فون، تنتو پاوا توانکو دوق کمس دالم ليغکوغن اورغ
هق توهن نق بري سلامت. تافي سترو ۲ هق توانکو
ايت بريله توهن چابوت پاوا دي کي تاهوق، سروف
امبيق انق باتو بيدس بري کي جائوه.

30 فس بيلا توهن بري سمفرن ده سموا فرکارا هق
دي جنجي انتوق توانکو اين، توانکو فون بوليه نايک
ده جادي راج اتس اورغ اسراييل،³¹ فد ماس ايت،
جاغله بري توانکو براس سسل دغن سوسه هاتي کران
بونوه اورغ دغن تاءاد سبب، سروف کي کا اورغ
انتوق ديري توانکو سنديري. فس بيلا توهن بري ده
سموا فرکارا ايت، همب فون مينتا نق بري توانکو
ايغت کا همب اين کاتي.

32 دأود فون کات:

فوجيله کا رتي هق دوق اتس سموا توهن اورغ
اسرائيل کيت، سابيت دي باوا، مو ماري بري تمو
دغن اکو هاري اين. ³³ اکو اوچف تريما کاسيه کا
توهن اتس فيکران مو هق موليق، فس نق مينتا توهن
تورون رحمة اتس مو، کران موله هق تاهن اکو تکه نق
کي بونوه اورغ سابيت نق بالس کا دي انتوق ديري
کو سنديري.

34 فس توهن تاهن اکو تاءبري بوات اف کا فواق مو اين
جوک. لاني اکو نق سومفه اتس نام توهن يغ
مهايدوف هق اورغ اسرائيل کيت، کات سوغکوه،
کالو مو تاءتوبيت باغت ۲ ماري تمو دغن اکو دسيني،
تنتو اورغ جنتن سموا دالم فواق مو ايت، تاءتيغکل
سئورغ هابوق سمفي ايسوق.

35 لفس ايت، دأود تريما سموا بارغ هق ابيکيل بري
ايت، دغن کات بالس اين: مو کليقله دغن سلامت سجهترا.
اکو دغر ده هق مان مو رويت، فس اکو نق بوات ايکوت
اف ۲ هق مو مينتا.

36 ابيکيل فون کليق کا رومه، کي چاري لاکي دي نابل.
تکه ايت نابل لاکي دي دوق ماکن جاموان لاکي، سروف
سئورغ راج. دي فون دوق سوک ۲ کران مابوق سوغکوه.
سابيت ايت، ابيکيل تاءرويت اف کا دي سمفي ايسوق.

37 فاکي ايسوق، بيلا دي هيلغ مابوق ده، بارو ابيکيل
ماري رويت کا دي سموا هق جادي کلمارين. بيلا دغر
بالس ايت، نابل فون لمه سماغت جادي کرس تاءليه برکرق.

38 لفس فد ايت سفولوه هاري، توهن جاتوه حكم اتس نابل بري دي ماتي. ³⁹ بيلا دأود دغر كات نابل ماتي ده بالس ايت دي كات:

فوجيله كا توهن، کران دي بري نابل ماتي جادي بالسن اتس کيچيفن دي هق بري اكو ساکيت هاتي. فس توهن تاهن اكو ده تأبري بوات اف ۲ هق تأموليق. فس لاني توهن بري کجهاتن هق نابل ايت جاتوه اتس ديري دي فول.

لفس ايت دأود سوروه اورغ کي سلالو نق مينتأ ابيکيل منيکاح دغن دي. ⁴⁰ اورغ ۲ ايت فون کي تمو دغن ابيکيل دموقيم کرميل، کات: دأود سوروه امب ماري مينتأ بري چي فوان سفکوف نق منيکاح دغن دي.

41 ابيکيل فون سجود سلالو، کات: همب توان مو اين دوق سيف ده نق کرج انتوق دأود سمفي کا باسوه کاکي سمو اورغ هق ماري کا رومه دي. ⁴² لفس ايت دي کي برسيفن سلالو، نأیک هيמר دي کي سکالي دغن اورغ ۲ دأود. دي باوا بودق بتينا هق دي ليم اورغ کي جوک. بالس توله ابيکيل جادي بيني دأود.

43 فد ماس ايت، دأود اد بيني سئورغ لاکي نام احينوام هق ماري دموقيم جيزريل. کدوا ايت فون جادي بيني دأود. ⁴⁴ ميخل انق سؤول، هق بياس جادي بيني دأود ايت، سؤول امبيق کي منيکاح ده دغن اورغ نام فلتيعيل انق لائش، هق ماري دموقيم کاليم.

باب 26

دأود اد فلواغ بوليه بونوه ساءول سڪالي لاڳي

1 لفس ايت اورغ ماري دڪليواسن زيف نق رويت خبر ڪا راج ساءول دڪمفوغ ڪيبياه، ڪات داءود دوق منوسوف داتس بوڪيت هاڪيله دافن موقيم جسيمون. ² ساءول فون باوا، عسڪر دي ٽيڪ ريبو اورغ هق فندي سڪالي دالم نڪري اسرائيل، توبيت ڪي سلالو نق چاري داءود دالم ڪليواسن زيف ايت.

3 فس ساءول دوق برخيمه دتفي جالن اتس بوڪيت هاڪيله، دڪت دغن موقيم جسيمون، تافي داءود دوق دالم ² بوڪيت لاڳي. بيلا دي دغر ڪات ساءول ماري چاري دي دتمفت ايت، ⁴ داءود فون هنتر اورغ ڪي دولو جادي مات ڪلف، فس فواق ايت بري تاهو ڪات سوغڪوه خبر چارا حال ساءول. ⁵ لفس ايت داءود سنديري ڪي تيفوق تمفت ساءول دوق برخيمه، فس دي نمفق بالس مان ساءول دوق تيدور دتمفت دڪت دغن ابير انق نير، ڪتوا عسڪر دي، فس سموا عسڪر دي ايت دوق تيدور ڪليليغ تمفت راج.

6 فس داءود دوق ڪيچيق دغن اھيميليخ اورغ بڻسا حيت، دغن ابيشائي اديق يو، اب، مق دي نام زروجه. داءود تان: سياف نق ماسوق دالم خيمه ساءول سڪالي دغن اڪو؟ ابيشائي جواب: امب نق ڪي دغن توان جوڪ. ⁷ مالم ايت جوڪ، داءود ڪي دغن ابيشائي ماسوق دالم خيمه ² هق ساءول، فس تمو تمفت ساءول دوق تيدور. لمبيغ دي دوق چوچوق دتانه دڪت ڪفلا دي. ابير دغن سموا عسڪر فون دوق تيدور ڪليليغ تمفت ساءول.

8 فس ابيشائي كات كا دأود: هاري اين توهن بري ده سترو كيت جاتوه كا تاغن توان. بنرله بري اكو امبيق لمبيغ ايت تيكم دي بري لكت دتانه، سكالې چوكوف ده، تاكنا تيكم سمفي دوا كالې. ⁹ تافي دأود كات:

9 جاغن بواتله. كيت تالّيه بوات خيانه كا راج هق توهن فيليه ده. تنتو توهن نق حكوم كا اورغ هق بوات بالس ايت. ¹⁰ اكو بوليه جامين اتس نام توهن يغ مهايدوف كات تنتو توهن نق تورون بالا اتس ساول بري ماتي، تاكيرا نق كي ماتي دالم فرغ اتوا نق سمفي ساكت دي ساج. ¹¹ مينتالّيه بري توهن تاهن هاتي كو تا بري بوات اف كا دي، كران دي راج هق توهن فيليه ده.

فس دأود سوروه ابيشائي كات: كيله امبيق لمبيغ دي دغن بكس اير دي ايت، بري كيت باوا كي. ¹² بالس توله دأود امبيق بارغ هق دوق دكت كفلا ساول، فس توبيت كي. تاءاد سياف تاهو تاءاد سياف تيفوق، تاءاد سياف جاك تيدور كران توهن بري سموا اورغ دوق جندرا راليف.

13 دأود فون برجالن كي لفكه لمبه، نايك اتس بوكيت سا لاكي، هق سفكغ فد تمفت فواق ساول ايت. ¹⁴ فس دي فغكيل دغن سوارا درس كات: ابنير، هي ابنير انق نير، مو دغر كا دق؟ ابنير فون جواب: سياف دوق فغكيل كا راج؟

15 دأود كات: هي ابنير، مو اورغ هق براني سكالې بوكن؟ تاءاد اورغ بوليه بنديغ دغن مو دالم سموا اورغ اسرائيل. بااف مو تاءاد جاك راج هق جادي توان مو؟

16 سائي اورغ ماسوق ده دالم خيمه راج نق بونوه دي.
 هق مو بوات ايت تاءموليق. اكو بوليه كات دغن نام توهن
 يغ مهايدوف، سوغ فاتوتله مو نق كنا جاتوه حكوم بونوه
 سابيت تاءجاك توان مو، راج هق توهن لتق ايت. كيله
 تيفوق لمبيغ هق راج دغن بكس اير هق دي ايت دوق
 دمان؟

17 ساول چم سلالو كات سوارا داءود. دي فون كات:
 هي داءود اتق كو، سوارا مو كه هق دوق فثكيل ايت؟
 داءود جواب كات: يا توانكو، جيلا سوارا امب¹⁸ سبب
 اف توانكو دوق همبت نق بونوه امب هق دوق كرج كا
 توانكو؟ امب بوات اف؟ مان كسلاهن امب؟

19 دغرله هق مان امب نق روپت كا توانكو. كالو توهن
 سنديري هق كرق هاتي توانكو بري موريه كا امب، بځكالي
 بوليه بائيقي دغن بوات قربان انتوق دي؟ تافي كالو اورغ
 هق كوسيق هاتي توانكو، امب مينتاء نق بري توهن سومفه
 دغن تورون بالا اتس دي، كران اورغ ايت هق بري امب
 كنا لاري توبيت فد نكري اين هق جادي ميليق توهن، فس
 كنا كي دوق دنكري هق تاءليه سمبه كا توهن، ملينكن كنا
 كي سمبه كا برهالا دغن فواق ايت ساج.

20 اوه يا توانكو جاغله بري امب ماتي كنا بونوه دنكري
 اورغ جاءوه فد تمفت بوليه كي مځهادف توهن. بااف راج
 اورغ اسرايل كنا توبيت ماري نق بونوه امب اين سروف
 كوتو سئيكور؟ اتوا سروف اورغ كي نق ايكت بوروغ
 سئيكور ساج دالم بوكيت؟

21 بيلا سائول دغر سموا ايت، دي کات: يا انق کو داءود، اکو ساله سوغکوه. ماريله نق کليق. اکو تائسير بوات خيانه ده کا مو. اکو نمفق ده کات پاوا اکو مهل انتوق مو، کران مو تائبونوه اکو مالم اين. دولو ۲ اکو بودوه، فيکران کو سيلف.

22 تافي داءود کات: اينيله لمبيغ هق توانکو. سوروهله اورغ ماري امبيق. ²³ کالو سئورغ بوات هق بتول دغن بوليه هارف سعمور، تنتو توهن نق بالس هق بائیک کا دي. توهن سره ده توانکو کا تاغن امب مالم اين، تافي امب تائبوات اف، کران توهن لتق ده توانکو جادي راج. ²⁴ مالم اين امب کيرا کات پاوا توانکو مهل انتو امب، فس امب دوق هارف جوک، توهن نق کيرا کات پاوا امب اين مهل کا دي. فس ماس کو دافن، دي نق باوا امب بري لفس فد سموا کسوساهن اين.

25 سائول فون کات: يا انق کو داءود، مينتائله توهن تورون رحمة اتس مو، کران تنتو مو نق برجاي اتس سموا کرج هق تاغن مو دوق بوات. لفس ايت داءود فون کي ايکوت جالن دي، فس سائول کليق کا رومه.

باب 27

دءود کي دوق دغن اورغ فلسيا فول

1 داءود دوق فيکیر دالم هاتي کات: کالو اکو دوق دسيني، تالام سائول بوليه بونوه اکو. بائیک اکو توبيت کي کا نکري اورغ فلسيا. سائول فون نق برادو تاءوروت اکو ده، فس اکو فون بوليه لفس فد تاغن دي.

2 سابت ايت، دأود باوا عسكر دي انم راتوس اورغ كي
 كا كوت كت، نق تمو دغن اخيش انق معوك هق جادي راج
 دسيتو. ³ لفس ايت دأود دغن فواق دي باوا ماري انق
 بيني بري دوق سڪالي دكوت كت ايت. دأود فون دوق
 دغن بيني دي دوا اورغ ايت، نام احنوام اورغ موقيم
 جيزريل دغن ابيكيل اورغ موقيم كرميل، بكس بيني نابل
 هق ماتي ده دولو. ⁴ بيلا ساؤل دغر كات دأود لاري كي
 دودوق دسيتو، دي فون برادو تائوروت دأود ده.

5 فس دأود كي كيچيق دغن راج اخيش كات: كالو توانكو
 فرچاي كا هاتي امب، بنرله بري ساتو كمفوغ كا فواق امب
 دودوق ددارت، فس همب توانكو تائنا دوق دالم كوت،
 دكت دغن توانكو. ⁶ راج فون بري كا دأود تمفت دودوق
 دصيقلك. فس تمفت ايت جادي ميليق راج ۲ يهودي سمفي
 كا ماس لاني. ⁷ دأود فون دوق دسيتو سمفي انم بلس بولن.

هيدوفن دأود فد ماس ايت

8 فد ماس ايت دأود باوا عسكر دي كي سرغ كمفوغ ۲
 اورغ بغسا لائين. دي بياس ماسوق تمفت اورغ كشور،
 اورغ كيزري دغن اورغ عماليك. فواق ۲ اين دوق دكليواسن
 بوكيت هق نام شور، كوء جالن نق كي كا نكري مصير. ⁹ تکه
 دأود ماسوق سرغ ايت، دي بونوه هابيس اورغ دتمفت ۲
 ايت، فس امبيق كمبيغ بيریغ لمبو هيمر دغن اونتا، سمفي
 كا كائين فكاين فواق ايت فون، باوا كليق كا راج اخيش.
¹⁰ فس، بيلا راج اخيش تاں دي: مو كي سرغ فواق مان
 هاري اين؟ دأود فون جواب: هاري اين امب كي سرغ

كليواسن نيكيب هق اورغ يهودا، اتوا هاري اين امب کي سرغ نيكيب هق فواق جرهميل، اتوا نيكيب هق اورغ کيني. ¹¹ فس داود بونوه هابيس اورغ ۲ ايت جنتن بتينا سروف، کران دي تأسير بري سياف بوليه ماري رويت حال ايت دکوت کت. بالس ايتوله هيدوفن داود سلام دي دوق دنکري اورغ فلسٲيا.

12 راج اخيش فون فرچاي هاتي کا داود. دي فيکير کات: لاني فواق اسرائيل سموا دوق بنچي سوغکوه ۲ کا داود. تنتو دي نق کرج کا اکو سعمور.

باب 28

اورغ فلسٲيا نق بوات فرغ دغن اورغ اسرائيل

1 فد ماس ايت عسکر ۲ اورغ فلسٲيا ماري برهيمفون انتوق نق توبيت کي بوات فرغ دغن اورغ اسرائيل. فس اخيش کات کا داود: مو فهم ده بوکن، کات فواق مو کنا توبيت کي بوات فرغ سکالي دغن اکو؟ ² داود جواب کات: تنتو امب دوق کرج کا توانکو ده. ننتي توانکو نق تيغوق ستارا مان فواق امب نق برلاون دالم فرغ اين. اخيش کات: موليقله. کالو بالس ايت، اکو نق بري فواق مو جادي اورغ هق دوق کافيت توبوه کو سعمور.

سأول کي چاري بومور هنتو

3 فد ماس ايت، نبي سموئيل ماتي ده، فس سموا اورغ اسرائيل فاکت کي ملاوت دغن توروبت مایت کي کا قبور، هق اورغ بوات دالم تانه دي سنديري درامه. تکه ايت،

اورغ هق جادي بومور منيغوق اتوا بومور هنتو فون تاءاد
دالم نكري اسرائيل، کران راج ساءول همبت سمو ايت
توبيت هابيس.

4 فس عسکر ۲ فلسيا ماسوق ماري لتق خيمه دي دتمفت
نام شونيم. ساءول فون سوروه عسکر ۲ سمو ماري
برهيمفون، فس دي کي لتق خيمه فواق اسرائيل دبوکيت
کيلبوا. ⁵ بيلا ساءول تيغوق عسکر ۲ فلسيا ايت، دي براس
تاکوت ساغت. ⁶ دي فون مينتا فرتولوغن دغن توهن،
تافي توهن تاءجواب اف کا دي، کو جالن نبي، کو جالن
ميمفي اتوا کو جالن اوريم فون.

7 لفس ايت ساءول سوروه منتري ۲ دي کي چاري اورغ
بتينا هق جادي بومور منيغوق، کران دي نق کي تمو اورغ
سروف ايت. منتري ۲ فون رويت سلالو کات: اد بومور
سروف ايت. دي دوق دموقيم عيندور. ⁸ ساءول سالين
فکاین لائين تائسير بري اورغ کنل، فس فرياغ مالم دي
باوا فواق دي دوا اورغ کي کا تمفت بومور بتينا ايت.
ساءول فون سوروه بومور کات: فغکيلله روح اورغ ماتي
نائک ماري بري رويت اف هق نق جادي کو دافن، فس
اکو نق رويت نام اورغ ماتي ايت.

9 بومور ايت کات: توان تاءتاهو که، راج ساءول بياس
همبت توبيت هابيس سمو بومور ۲ تاءبري دودوق دالم
نكري کيت. سبب اف توان ماري نق بري امب کنا فرغکف
بالس اين؟ توان نق بري امب ماتي کنا حکوم بونوه که؟
¹⁰ ساءول جنجي دغن سومفه اتس نام توهن يغ مهايدوف
کات: مو تاءکنا تاکوت کا حکومن اتس فرکارا اين.

- 11 بومور فون تان دي: نق فغكيل روح اورغ مان بري نايك؟ ساول جواب كات: روح سموئيل.¹² تافي بيلا بومور نمفق روف سروف سموئيل، دي فون جریت دغن سوارا درس كات: اكو كنا تيفو. مو جادي راج ساول بوكن؟
- 13 تافي ساول كات: مو تاسه تاكوتله. اف هق مو نمفق ايت؟ بومور كات: اكو نمفق روف سروف ديوا دوق نايك دالم تانه.¹⁴ ساول تان فول: بالس مان روف ايت؟ دي جواب كات: روف اورغ جنتن توا هق فاكي كائين فوتيه. ساول تاهو سلالو كات سموئيل. دي فون سجود موك كا تانه نق تنجوق حرمة كا سموئيل.
- 15 فس سموئيل كات كا ساول: سبب اف مو دوق كوسيق اكو دغن فغكيل نايك بالس اين؟ ساول جواب: اكو جاتوه دالم كسوساهن بسر. اورغ فلسيتا ماسوق ماري، فس توهن تيغكل تاسير تولوغ اكو ده، كوئ نبي اتوا كوئ ميمفي فون. سابيت ايت اكو فغكيل توان ماري رويت جالن هق مان اكو كنا توروت.
- 16 سموئيل كات كا دي فول: كالو توهن تيغكل مو ده، باء اف مو فغكيل اكو ماري؟ لاني مو جادي سترو ده دغن توهن.¹⁷ هق توهن بوات كا مو اين، سروف هق دي رويت كوئ مولوت اكو دولو. دي چابوت ده فريغكت راج هق مو، بري كا دائود هق بياس دوق سكالي دغن مو.¹⁸ کران مو تاسير توروت سوروهن توهن. دي سوروه مو كي جاتوه حكومن دي اتس اورغ عماليك بري سموا ايت بناس هابيس، سابيت توله توهن بري فركارا اين جادي اتس مو لاني.¹⁹ فس توهن نق سره مو سكالي دغن اورغ²

دالم نڪري مو، بري جاتوه ڪا تاغن اورغ فلسطينا. ڪران ايسوق، مو دغن انق ۲ جنتن مو ايت، نق تورون ڪا تمفت اورغ ماتي سروف اڪو اين. فس توهن نق سره سموا عسکر ۲ اسرائيل ڪا تاغن اورغ فلسطينا.

20 بيلا دغر فرڪتائ سموئيل ايت، ساول فون ربه سلالو دوق تيارف ڪران ٽاڪوت سوڳڪوه، فس دي هابيس ريغ ڪران تائماڪن اف سهارى سمالم. ²¹ بيلا بومور بتينا تيغوق ساول دوق ٽاڪوت ستارا ايت، دي فون ماسوق دڪت ڪات ڪا ساول: امب جوغ ماتي ڪنا حڪوم بونوه دغن توروب سوروهن توانڪو سائي. ²² فس لاني امب نق سوروه توانڪو فول: ماڪنله اف ۲ هق امب سيمفن اين، بارو توانڪو نق اد ريغ بوليہ برجالن ڪي فول.

23 ساول ڪات دي تائسير ماڪن اف تافي منٽري سڪالي دغن بومور بتينا ايت فاڪت دوق داي دي سوروه ماڪن. دي فون ستوجو، لفس ايت باغون ڪي دودوق اتس ڪرغ. ²⁴ اورغ بتينا فون بري سمبليه لمبو مودا هق دي سنديري نق بري ماڪن ڪا راج. فس امبيق ڪندوم بوات روتي هق تائبوبوه ايبو. ²⁵ بيلا سيف ده دي فون اڱڪيت بارغ ۲ ايت بري ماڪن ڪا ساول دغن منٽري دي. سوده ماڪن ايت، ساول فون توبيت ڪي سلالو تائنتي چره.

باب 29

ڪتوا ۲ فلسطينا شڪ هاتي ڪا داود

1 فد ماس ايت، سموا عسکر ۲ فلسطينا دوق برهيمفون دڪليواسن افيق دالم نڪري اورغ اسرائيل. فس عسکر ۲ اسرائيل دوق برخيمه دڪت دغن مات اير هق توبيت دڪاڪي بوڪيت جيزريل.

2 تکه ایت، کتوا ۲ هق اورغ فلسټیا دوق برجالن نائیک سکالي دغن عسکر ۲ دي، جادي فواق سراتوس اورغ اتوا فواق سريبو اورغ. داود دغن فواق دي فون دوق توروبت راج اخيش باليق بلاکغ سود. ³ فس کتوا ۲ فلسټیا تان راج اخيش کات: سبب اف اورغ عبراني دوق سکالي دغن کيت دسيني؟ راج اخيش فون رويت کا دي: اينيله داود، هق بياس جادي منتري راج ساول هق اورغ اسرائيل. دي دوق دغن اکو لام ده، فس جق دمولا ۲ ماري دوق سيني، اکو تائباس نمفق دي بوات ساله اف ۲.

4 تافي کتوا ۲ فلسټیا براس نق موريه کا راج اخيش کات: مو سوروه دي کليقله کا کمفوغ هق مو بري کا دي ده. دي تائليه کي بوات فرغ سکالي دغن فواق ۲ کيت. تاکوت تغه دوق برلاون دي نق فالیغ جادي سترو کيت. کالو دي نق کليق جادي بائیک دغن توان دي ایت موده ساج دي فالیغ بونوه اورغ فواق کيت تغه دوق برلاون ایت. ⁵ بوکن داود اين که هق اورغ اسرائيل بياس پاپي تغه دوق مناري ایت کات:

ساول بياس بونوه بريبو ۲ اورغ،
تافي داود بوليه بونوه برفولوه ۲ ريبو.

6 راج اخيش فون فغکیل داود ماري: اکو بوليه رويت دغن نام توهن یغ مهايدوف، کات مو دوق طاعة ستيا کا اکو سعمور. فس اکو ستوجو نق بري مو ماسوق بوات فرغ سکالي دغن اکو. جق دماس مو ماري کا تمفت اکو سمفي کا ماس لاني فون، اکو تائنفق مو بوات ساله اف ۲. تافي کتوا ۲ لاین دالم فواق اکو تابرکنن کا مو. ⁷ بائيقله مو کليق دغن سلامت دوق دکمفوغ مو، فس جاغن مو بوات اف هق کتوا ۲ کيت تابرکنن.

8 تافي دأود کات: يا توانکو، امب بوات ساله اف جق دمولا امب ماسوق کرج دغن توانکو سمفي کا ماس لاني؟ توانکو تمو اف کاتيک هق بري امب تائييه کي برلاون دغن سترو ۲ توانکو اين؟⁹ راج فون جواب: اکو تاهو ده مو تايياس بوات ساله اف ۲ فس مو دوق سوچي سروف ملايکه. تافي کتوا ۲ سمو ايت تايبر بري مو ماسوق بوات فرغ سکالي.¹⁰ فاکي ايسوق، مو توبيت کيله دغن سمو فواق مو هق بياس جادي رعية ساول دولو. جاغن بري لمبتله. با چره فاکي ايسوق مو کنا توبيت کي سلاو.

11 چره فاکي ايسوق دأود فون باوا سمو فواق دي توبيت کي نق کليک کا نکري اورغ فلسطينا. فس عسکر هق راج ۲ فلسطينا فون برجالن هادف کي کو جيزريل.

باب 30

دأود کنا کي برلاون دغن اورغ عماليک

1 دالم ماس تيک هاري هق دأود دوق برجالن کليک ايت، جادي، اورغ عماليک توبيت ماري سرغ تمفت ۲ دالم کليواسن نيکيب، ترماسوق تمفت دأود دکمفوغ صيکلک.² اورغ عماليک فون باکر هابيس رومه ۲ دکمفوغ ايت. اورغ دي تايونوه، تافي امبيق کي هابيس اورغ ۲ بتينا دغن بودق ۲ تايکيرا کچيک بسر.

3 بيلا دأود دغن فواق دي سمفي کا رومه، دي تيغوق تمفت ايت ترباکر هابيس. فس انق ۲ بني دي کنا امبيق کي جوک.⁴ سمو فواق دأود فون دوق ترياق مناغيس سمفي کريغ اير مات.⁵ بني دأود دوا اورغ ايت فون کنا امبيق کي جوک. نام دي احيانوام اورغ جيزريل دغن ابيکيل،

بکس بيني نابل دموقيم کرميل. ⁶ فس دأود دوق سوسه لاکي، سابيت فواق دي کات نق بونوه دي دغن فيکنوځ باتو، کران سموا اورځ ساکيت هاتي ايغت کا انق ² بيني دي. تافي ربي اتس سموا، توهن هق دأود دوق هارف سعمور، بري دي قواة سماغت سمولا.

7 دأود فون فڅکيل امام ابياتر انق اهي ميلخ ايت امبيق «ايفود» ماري، فس سوروه دي فاكي ايفود ايت انتوق مينتا توهن بري تاهو: موليق کا دق اکو کي تورت فواق ايت؟ فس کالو تورت، نق تمو کا دق؟ توهن فون بري تاهو کات: تورت کيله، تنتو مو نق تمو دغن فواق ايت فس نق بوليه کليق انق ² بيني مو دغن سلامت.

9 دأود فون باوا انم راتوس اورځ تويت کي سمفي کا چارق بيسور، فس دي تيڅکل دوا راتوس اورځ بري دوق دسيتو، ¹⁰ کران فواق ايت هابيس ريځ تارق نق برجالن ده. تافي دأود تبیغ تورت اورځ عماليک کي دغن امفت راتوس اورځ هق اد ريځ لاکي.

11 فس فواق دأود تمو اورځ مودا بغسا مصير دوق سئورځ دتغه ² بوکيت ايت. دي فون باوا اورځ ايت ماري کا دأود بري ماکن اير سيکيت دولو. ¹² فس ايت بري بواه زيت کريځ دوا تاكر دغن بواه ارا کريځ. سوده ماکن ده، دي فون براس سکر سلالو، کران دي تاءماکن اف تيک هاري تيک مالم ده.

13 دأود فون تاڻ دي: مو ماري دمان؟ سيف دي توان مو؟ اورځ مودا کات: امب اورځ مصير هق جادي همب کا اورځ عماليک. دي تيڅکل امب دسيني تيک هاري ده،

کران امب دوق ساکیت. ¹⁴ فواق کیت بارو کلیق سرغ
تمفت ۲ هق اورغ خیریت دکلیواسن نیکیب ایت. کیت
ماسوق دالم تمفت ۲ هق اورغ یهودا جوک کي سمفي کا
تمفت هق فواق کالیب فول. سود سکالي کیت کي باکر
کمفوغ هق نام صیقلک.

15 دأود کات کا دي: مو بولیه کا دق باوا کیت کي
سمفي کا تمفت فواق هق ماسوق سرغ نکري این؟ اورغ
مودا کات: بولیه. تافي توان این کنا جنجي اتس نام توهن
کات تأسیر بونوه امب اتوا سره کلیق کا اورغ عمالیک
ایت. ¹⁶ اورغ مودا فون باوا فواق دأود کي سمفي کا
تمفت اورغ عمالیک. فس دي نمفق فواق ایت دوق چلوري
رات ۲، دوق ماکن مینوم دغن تاري مناري کران سوک ریا
اتس بارغ باقی فرکارا هق دي. بولیه ده داورغ فلسیتا دغن
اورغ یهودا.

17 دکت متھاري نق جاتوه فواق دأود کي سرغ اورغ
عمالیک، فس دوا فواق ایت دوق برلاون سمفي متھاري نق
جاتوه ایسوق فول. اورغ ۲ عمالیک فون ماتي باقی تأاد
سیاف سلامت ملینکن امفت راتوس اورغ ساج هق دان
نائیک اونتا لاري کي. ¹⁸ دأود بولیه کلیق سموا هق
کنا رمفس ده، ترماسوق بیني دي سنديري دوا اورغ،
¹⁹ تأهیلغ سئورغ جنتن بتینا توا مودا. فس هرت بندا
سموا فون، دي بولیه کلیق هابیس.

20 بناتغ ۲ هق فواق ایت فون، بولیه کا دأود جوک. فس
دي سوروه اورغ دي هیلغ بناتغ ۲ ایت کي دولو. اورغ ۲
ایت فون کات: سموا این بارغ هق بولیه کا دأود.

21 بيلا دأود كليق كا تمفت دوا راتوس اورغ هق تارغ
برجالن كنا ننتي دچارق بيسور ايت، فواق ايت توبيت
ماري سمبوت دأود دغن فواق دي سلالو. دأود فون
اوچف سلامت كا دي.²² تافي اد اورغ دالم فواق دأود هق
فيكران تالموليق. دي كات بالس اين: فواق اين تالماسوق
سكالي دغن كيت. تاكنا بري اف سكارا كا دي، ملينكن
بري دي فيمفين انق بيني دي سنديري كليق ساج.

23 تافي دأود كات: اوه اديق براديق كو، تاليه بوات
بالس ايت دغن بارغ هق كيت بوليه كليق دغن رحمة توهن.
توهنله هق بري كيت منغ برلاون دغن فواق ايت، فس كيت
فون بوليه سلامت.²⁴ تاءاد سياف نق ستوجو دغن فيكران
مو. اورغ هق كنا توغكو بارغ دغن اورغ هق توبيت كي
بوات فرغ، كدوا ايت كنا تريما سروف.²⁵ جق دماس ايت
دأود بوات ايكوت اتوران ايت سعمور فس اورغ اسرائيل
دوق توروت اتوران ايت سمفي كا ماس لاني.

دأود كليق كا تمفت دي دصيقلك

26 بيلا دأود كليق ده كا صيقلك، دي بهاكي سمو بارغ ۲
هق بوليه ايت، سوروه اورغ باوا كي سكيان بري كا كتوا ۲
دكمفوغ يهودا هق جادي سائين دغن دي. دي كات: اينيله
بارغ سيكيت انتوق توان ۲، هق دأود بوليه كليق داورغ
عماليك، هق جادي سترو دغن توهن.

27 اينيله نام تمفت ۲ هق دأود هنتر بارغ كي:
بيت ايل، رامه هق دالم نيكيب ايت، جاتير،
²⁸ اروعير، سيفموت، عيشتيموا دغن راكل.
²⁹ دي هنتر كي جوک كا فواق جرهميل دغن فواق كيني،

³⁰ فس کا تمفت ۲ حق فواق داءود بياس برجالن کي ماري دولو، ³¹ سروف هر مه، بوراشن، اتخ دغن حيبرون.

باب 31

کما تين راج ساءول سکالي دغن انق دي

1 فد ماس ايت اورغ فلسطينا دوق برلاون دغن اورغ اسرائيل. اورغ اسرائيل فون فاليغ لاري کا عسکر ۲ فلسطينا، فس بايق اورغ ماتي دکاکي بوکيت کيلبوا. ^۲ عسکر ۲ فلسطينا فون دوق توروت ساءول، فس دي بوليه بونوه انق ۲ راج، نام دي يوناتن، اينادب دغن مليکي شوا. ³ اورغ حق دوق کفوغ ساءول فون برلاون کهور ۲ قوا لاکي. سود سکالي عسکر ۲ فلسطينا ماري فانه کنا توبوه ساءول بري لوک تروق.

4 فس ساءول سوروه اورغ مودا حق دوق باوا سنجات دي کات: چابوتله فدغ مو بونوه اکو بري ماتي سلالو، تاکوت اورغ کفور ايت نق تاکير توبوه اکو مائين ۲ ساج سمفي ماتي. تافي اورغ مودا تاکوت ساغت، تأسير بوات کا راج بالس ايت. سابيت ايت ساءول کنا بونوه دير دي دغن رمبس توبوه دهوجوغ فدغ دي سنديري. ⁵ بيلا اورغ مودا نمفق کات ساءول ماتي ده، دي فون امبيق فدغ بونوه دير دي سروف ايت جوک، کران نق ماتي سکالي دغن راج.

6 بالس توله، ساءول سکالي دغن انق ۲ دي، اورغ مودا حق باوا سنجات دي، فس سموا عسکر ۲ دي، ماتي سکالي فد هاري ايت جوک. ⁷ بيلا اورغ ۲ اسرائيل حق دوق باليق سان فادغ فرغ، سمفي کا اورغ حق دوق باليق سان سوغي يردن فون، نمفق کات عسکر ۲ اسرائيل لاري هابيس،

فس راج ساءول دغن انق ۲ دي ماتي ده، سمو ايت فاكت
تيغكل كمفوغ ۲ دي لاري كي هابيس، فس اورغ فلسطينا
ماري دودوق دكمفوغ ۲ ايت.

8 ايسوق، اورغ فلسطينا كي نق چابوت فركاكس ۲ فرغ
دمايت اورغ هق ماتي دفادغ ايت. فس دي تمو دغن مائت
ساءول دوق سكالې دغن انق دي تيك اورغ دكاكي بوكيت
كيلبوا ايت. ⁹ دي فون كرت كفلا ساءول، فس امبيق فكاين
فرغ دتوبوه دي، لفس ايت سوروه اورغ كي رويت خبر
بائيك ايت سرات تمفت دالم نكري فلسطينا، نق بري تاهو كا
برهالا ۲ دي دولو، فس ايت سمفي كا سمو اورغ دالم
نكري. ¹⁰ فركاكس فرغ هق ساءول فون دي باوا ماسوق دالم
رومه برهالا بتينا هق نام استروت بري دوق دافن دي.
توبوه ساءول ايت دي باوا كي اغكيت كيغكيغ اتس فاكر
كوت بيت شن.

11 تافي بيلا اورغ اسرائيل هق دوق دكوت جابيش دالم
نكري كيلباد دغر كات اورغ فلسطينا بوات سيقسا كا مائت
ساءول. ¹² اورغ ۲ هق براني دالم فواق ايت فون توبيت كي
برجالن سمالمن بارو سمفي كا بيت شن. دي امبيق تورون
مائت ساءول دغن انق ۲ دي هق دوق كيغكيغ اتس فاكر
كوت ايت باوا كليق كا تمفت دي دجابيش، فس ايت باكر
مائت ۲ دي، ¹³ بارو كي تانم تولغ ۲ دي دباوه فوهون كايو
بسر دسيتو. فس اورغ ۲ جابيش ايت فاكت اود ماكن سمفي
توجوه هاري بوات فرايغاتن كا ساءول.

